



ისტორიული გეგვიდრაობა

სამეცნიერო-პოპულარული ჟურნალი, 2015 წ. ივნისი, №6(58), ფასი 3 ლარი

შალვა
ქიქოძე –
ფარმაცი, პრაქტიკოსი,
ქარიკატურ-
47 რისტი

ოტია იოსელიანი – 85



«გამოღინარ და გეუბნები, ვაშენებ ქვეყანას, ქი, მაგრამ მე ისეთი შტური ვარ, ვარ 4 დავინახე ეს აშენებული ქვეყანა?! ამაზე მეტი შეუკახეყოფა რაღა გინდა?»

წყალი – ეროვნული სიმდიდრე

შატა გიორგაძე:

«საქართველოს შეუქვია, თავისი ბუნებრივი სასმელი წყლის მარაგებიდან გარკვეული წილილი შეიტანოს დადაინის მოსახლეობის სასმელი წყლით უზრუნველყოფის გლობალური პრობლემის გადაწყვეტაში... ქვეყნის ყოველწლიური ფულადი შემოსავალი გაიზარდებ 12 მლრდ ანუ დოლარით»

16



**1 ივნისი
წმ. ნინოს
ხსენების
ღღა**

„მივცით ღმერთსა ნინოსსა დიდება, რამეთუ იგი არს საუკუნითგან ღმერთი და მას მსოფოსა შუენის დიდება უკუნისამდე“

18

**მიხეილ 43
ვორონოვი
– საქარ-
თველოვი
ქობისა და
სიყვარულის
ღამენიკბავი**





სარჩევი

მაგულიშვილი

■ ოტია იოსელიანი – 85	4
ზეზინი სავსესური აქვეყნიური საქმით	5
იუბილე	
■ ქანი ქავსაქა – 80	
«მეუ, ვინაა პატრიოტი?»	10
ილიას გაკვეთილები	
■ ილია ჭავჭავაძე: კანონის წინაშე თანასწორობა სოციალური წესიერი აგებულების საფუძვლის ქვაკუთხედი	14
ამბულური თემა	
■ წყალი – ეროვნული სიფიქსა	16
რელიგია	
■ ლევან სანიქია: ნიუ განმანათლებელი	18
ქართვლები საზღვარგარეთ	
■ ანთიმოზ ივარიელი	25
თვალსაზრისი	
■ საქუთარი თავის გაქარდა	28
დედაქალაქის ისტორია	
■ იოსებ ბრიგუნილი: ქველი თბილისის ბიბლიოთეკა	32
ჩვენი ისტორია	
■ როინ ვებრევილი: საქართველო და ჩრდილოეთის მეზობლები	37
■ დავით გოგიუნილი: ეკაქლე მეფეზე უკეთესი ნაბიჯი ქვეყნის გადსარჩენად არავის გადაუდგამს	41
მართალი ისტორია	
■ ვორონევი – საქართველოში ქობისა და სიყვარულის დამნარბავი	43
სელოვნება	
■ შალვა ქიქოქა – შარბნარი, გრაფიკოსი, კარიკატურისტი	47

გამომცემელი: არასამენარმეო იურიდიული პირი
„ისტორიული მემკვიდრეობა“

სარედაქციო კოლეგია

პასუხისმგებელი რედაქტორი ღარეჯან ანდრიაძე

მისამართი: თბილისი, დავით ბაქრაძის ქ. № 6 ტელ.: 234-32-95

UDC (უბკ) 050 (479.22)

0-892

ოტია იოსელიანი — 85

იმერეთში, ერთ დროს სიცოცხლით სავსე ქალაქ-კურორტ წყალტუბოში, ხელოვნების ქუჩაზე ცხოვრობდა მწერალი **ოტია იოსელიანი**.

შემოქმედის უჩვეულო სამყარო, ღრმა და უფაქიზესი სული მისი ორიგინალური კარ-მიდამოს ერთი ნახვითაც იგრძნობოდა.

„როცა პოეტი კარგი გლენია, თვითონ მიწასაც უყვარს ასეთი, ვაზი აივნებს შემოხვევია, რთავს სილამაზეს სილამაზეთი“.

ეს სტრიქონები პოეტმა ფრიდონ ხალვაშმა ამ ოჯახში სტუმრობის შემდეგ დაწერა. მწერლის ეზოში ყველაფერი მართლაც რომ ოტიას დაკოჟირილი ხელებით იყო ნასათუთევი, ყველაფერს გამოცდილი მეურნის მზრუნველობა ეტყობოდა, აშენებდა, თოხნიდა, ამყნობდა ვაზს, გაზაფხულზე ოციოდე ნერგს, მის ეზოში ადგილი რომ არ ქონოდა, მეზობლისას დარგავდა ან გზის პირზე... „თვალის კაკლებში ვუყურებ ჩემს ხალხს, რა სტკივა ან რა უხარია, ვნერ, მიყვარს და ვნერ“... — ასე ცხოვრობდა და იღვწოდა მწერალი, რომელსაც გაჩენის დღიდან დიდი ტკივილის გარეშე ნამცეცი სიხარული არ ღირსებია, დარდად ქცეოდა ქვეყნის ვარამი, სტკიოდა აფხაზეთი და სამაჩაბლო, ნაჭერ-ნაჭერ გაყიდული ქართული მინა; აფიქრებდა წიგნს დაპორებული ახალგაზრდობისა და დამახინჯებული ქართული ენის ბედი; უკვირდა, როცა ირგვლივ ამდენი უსახლკაროა, როგორ ელხინება მავანს, როგორ იშენებს სასახლეებს...

„სადა ხარ, ღმერთო, შენი შექმნილი ქვეყანა რომ ხელიდან მიდის?“ — აღმოსდება გულდამდურულ მამულიშვილს და ამჯერად თავისი სათქმელი პოეტურ სტრიქონებად ამოთქვა და ბატონი ოტიას შემოქმედებაში რომანის, ნოველის, მოთხრობის, პიესის, იგავ-არაკის გვერდით სა-



«ბაგოდინარ და მუხანაზი, ვაჟენაზ ქაყანასო, კი, მაგრამ მე ისეთი შტარი ვარ, ვარ ღვიინახა ეს აუენაბული ქაყანა?! ამაზე მათი შეუკახსყოფა რაღა ბინდა? კახი უღაბნოვი რომ მოხვდება, ყვირის, მიუხედავად. კი იხის, ვეკავინ რომ ვარ უხვალის, მაგრამ მაინც ყვირის, ღალუპის შიში აყვირებს. სწორად ასე ვარ ახლა მე. კი ვიხი, ამათ რომ არ აუკახათ, მაგრამ მაინც ყვირი, ქაყანის ღალუპის შიში აყვირებს»

უცხოო ლექსებმაც დაიდო ბინა. ბედნიერია ადამიანი, რომელიც უკან მოიხედავს და განვლილ გზაზე შრომისა და სიკეთის კვალს დაინახავს. სწორედ ასეთ კვალს ავლებდა ბატონი ოტია. მარტის ერთ მზიან დღეს უკანასკნელად გვიმასპინძლა თავისივე ხელით აგებულ ოდაში. „თავს როგორ გრძნობთ, ბატონო ოტია, როგორ ხართ?“ — ამ შეკითხვაზე ბატონ არმაზ სანებლიძეს, რომელსაც იმ დღეს მწერალთან თურმე ბოლო ინტერვიუ ჩაუნერია, უპასუხა: **„კარგად მტერი იქნა ახლა. თუ ვინმეა კარგად, ცოტა შორს გოუარეთ, არაფერი**

მოგწიოთ! გაასწარით! ჩვენ უკვე განწირული ქვეყანა ვართ... რა ვქნათ ახლა, ამ გაზაფხულზე? ვინაა რამეს გამკეთებელი? ყველამ უნდა მოკიდოს საქმეს ხელი, თორემ ვის ატყუებ — საკუთარ თავს? შენ უნდა მიიღო მოსავალი, ხომ? მოსავალი რომ მიიღო, უნდა შექმნა. ამას უნდა გლენი, რომელიც, სამწუხაროდ, აღარ არსებობს...“ (ეს ვრცელი ინტერვიუ გაზეთ „საქართველო და მსოფლიოს“ სამნომერში დაიბეჭდა, რომელსაც შემოკლებით ქვემოთ გთავაზობთ).
ეს იყო 2011 წლის გაზაფხული... მალევე გარდაიცვალა.
დარეჯან ანდრიაკი



ზეხიური სამსახური ამჟვენიური საქმით

— ბატონო ოტია, თქვენ ეკლესია ახსენეთ, და მინდა გკითხოთ: შეძლებს ეკლესია ჩვენს სულიერ აღორძინებას? ეყოფა ძალა სამისოდ? მოვერევით მისი ძალისხმევით ჩვენს პრობლემებს?

— ყველაფერი შეუძლია რელიგიას. მართლმადიდებლობამ მოიტანა ჩვენი ქვეყანა აქამდე. „საქმემან შენმა გამოგაჩინოს შენ“, — გვითხრა ეკლესიამ. შენ რას აკეთებო, ვისაც სახელი გაქვს, მამის სახელი და გვარი? საქმეს რომ გთხოვს იგი, საქმით უნდა უპასუხო. თუ ხელს არ გაანძრევ, მეც ვერ გიშველიო.

რელიგიურობა ის არ არის, შეხვიდე ეკლესიაში, პირფარეზი გადანიეო, გამოხვიდე და მერე იქურდო და იმამაძალო.

ჭეშმარიტი რწმენა რომ ჰქონდეს კაცს, მან უნდა იცოდეს, რომ უნდა გათხოვოს, მოსავალი მოიწიოს, გაჭირვებულს უნდა მიეხმაროს.

— ამჟვენიურ საქმეს მიხედვს?

— ერთადერთი, რითაც შეიძლება ვიბრძოლოთ ახლა, ჩვენი პატრიარქის ნათქვამ სიკეთეს უნდა მივყვეთ. ჩვენ ძალიან კარგი მეგობრები ვართ. მაგრამ იმასთან შეხვედრის მეშინია — ოთხ საათს ვერ დაეფცქვენები ხელიდან. სულ გეკითხება და გისმენს, გეკითხება — გისმენს, გეკითხება — გისმენს.

— ხელისუფლებას რა ჭირი შეეყარა, არაფერს რომ არ გვეკითხება?

— სწორედ მაგი.

— ბატონო ოტია, თქვენს ნათქვამს გაგახსენებთ: „მე მორწმუნე ვარ, მხოლოდ ჩემი ეკლესიის გუმბათზე ფრესკად საქართველოს რუკა“.

— ეს ასეა... მაგრამ იცი, რა? არ შეიძლება ჩვენთან არც კოლექტივი, არც კოოპერატივი, არც არაფერი, იმიტომ, რომ ქართვე-

ლის ბუნება საშინელებაა ამ მხრივ. მამა რომ გარდაიცვლებოდა და ორი ძმა დარჩებოდა, მაშინვე იყოფდა მამისეულს. ე, ბიჭო, ორი ძმა ხართ, იმუშავეთ აგერ, მოინიეთ და შეგარგოთ ღმერთმა. არა! ჩემსავით მაი არ მუშაობსო. შეიძლება, მონეული მერე მიეცა, მაგრამ მინას — არა, არ დათმობდა. სარის სიმსხოზე რომ გადმოენია საზღვარი, იმ სარს ხეთქავდა თავში ძმას, რომელიც უყვარდა. მინაა გლეხის ასავალ-დასავალი, მისი საარსებო, მისი რწმენა, მისი საქმე.

— „გიყვარდეს მტერი შენი, ვითარცა თავი შენიო“?

— ღვთიური ნათქვამია, რა დონეზეა აყვანილი! მტერი უნდა მოიშორო, მარა უსიყვარულოდ კი არა. სიძულვილს როგორც კი შენს სულში ჩადებ, გაბოროტდები. მარა შევძლებთ კი ამას? არა მგონია, იმიტომ, რომ მათხოვარს აღარც ერთის თავი აქვს, აღარც — მეორის.

მაგი იყო, ლექცია რომ წავიკითხე აკადემიაში, სასულიეროში. იქ დავაყენე მაგ საკითხი. ამგენს რატომ ჰგონიათ-მეთქი, რომ ეკლესია ფულის საკეთებელი ადგილია?! ქართველი ფულს ხელის ჭუჭყს ეძახოდა. რა უნდა ჭუჭყს ეკლესიაში?! წმინდათაწმინდა ადგილია ეკლესია.

— შე ოჯახაშენებულო, — ვუთხარი, — თუ არა აქვს, არ მონათლავ? თუ არა აქვს, არ დანერჯვარს? თუ შემოგწირავს, ეგ მისი საქმეა, შენ ვალდებული ხარ, ღვთისმსახურება შეასრულო: მირონი თუ გაყიდე, მირონი აღარ არის. გაყიდულია.

საშინელება ტრიალებს!

ჩემს სოფელში პატარა სალოცავი მინდა ავაშენო. არაო. პროექტი უნდა იყიდოთ საპატრიარქოდანო. მე შევუთვალე: არაფერი სოფელს არ გააჩნია, რომ ჩამოკიდო, ათ ლარს ვერ იშოვი. მაგრამ

არის მუშახელი, ხელოსანი. სახურავის მასალას, ლურსმანია თუ რალაცას, მე ვუყიდი. თქვენ რაში მომეხმარებით-მეთქი? ასე შევუთვალე... იქით მივცე ფული?

— სად დგანან, ბატონო ოტია, ცის დანიშნული და ერის გაზრდილი ჩვენი მწერლები?

— სადაა მწერლები, კაცო?! რომ გამოყრი ქუჩაში, ჯერ ერთი. მეორე, იქაც — მწერალთა კავშირში, ხომ ხედავ, რა ამბები დატრიალდა? შენ ცის დანიშნული ხარ, რომ „წარუძღვე წინა ერსა“, და ვინ მოგცა უფლება ჩხუბის და კინკლაობის?! თუ რამე საკამათოა, ვერ დაჯდები და ვერ ილაპარაკებ, პოლიციის გასაშველებელი რომ არ გახდე?

აჰ! ეს არ არის მწერლობა!

ვინ მოიგონა მწერლების ჩინმენდლები და ვინაა, რომ მაჯილდოვებს? იცის, რა დავწერე?

ავსტრიაში ვიყავი სამკურნალოდ. ვეკითხები იქოურებს: ჯორჯია — გეორგია, საქართველო ხომ არ გაგიგონიათ? კაცს არ გოუგონია. ორი აღმოვაჩინე სასწაულად განათლებული. კიო, ვიცეო, მითხრა ერთმა. არ გადამრიო, რა იცი-მეთქი? ის ვიცი, რომ თქვენ რუსები არ უნდა იყოთო. ესაა ყველაზე კარგი მცოდნე იქ.

აქეთ რომ გკითხოს, ვინა ხარო, რას შობი? დოუდვეი აგერ ნახატი, რომელსაც თარგმნა არ უნდა, აგერ — მუსიკა, შენ ხარ ჩემი ბატონი, აგერ — სათარგმნელი თუ გაქვს ლიტერატურა.

ესა ვარ მე!

სხვა შენ არაფერი არა ხარ! ხელგაშვერილი მათხოვარი ხარ!

— სიტყვამ მოიტანა და მინდა გკითხოთ, ლექსების ტომს როდის გამოსცემთ?

— მეათე ტომი ლექსები უნდა იყოს, მაგრამ რავალი საქმეა საქართველოში ტომების წერა ლექსებისა?

ჩემთან, აქ რომ მოხვიდე, გური-



ელის ქუჩა უნდა გეიარო, უშველები ქუჩა მამია გურიელისა. არც აქოური იყო, არც არაფერი, მაგრამ ქუჩა მისი სახელობისაა. ერთი ლექსი აქვს დანერვილი. მაგრამ ერთი ლექსი საქართველოში ნიშნავს უზარმაზარ ეროვნულ სულიერებასაც, ზნეობასაც და კულტურასაც. გვყავს ჩვენ თითო-თითო ლექსების ავტორები, არც ერთი არ დაგვივიწყებია.

შენ კი ტომებს უბათქუნებ ამ ქვეყანაში?

აგერ პატარა ნიგნი გამოვეცი. ასი ლექსი გალაკტიონის მერვე ვერ გავბედე და 99 გამოვაქვეყნე, პატარა ტირაჟით. ეს რა გამოცემაა — 300, 400, 1000 ეგზემპლარი. უნინ ათი ათასი ერთი ტირაჟი იყო, ოცი ათასი — ორი ტირაჟი და ა.შ.

— და ჰონორარსაც გაძლევდნენ, ფულს გიხდიდნენ.

— დიდუ! ფულს მაძლევდნენ?! ჩემდენი ფული ვის ჰქონდა მაშინ! ნიგნებში მაძლევდნენ და ასობით თეატრი რომ დგამდა ჩემს პიესებს, იქიდანაც ფული შემომდიოდა... ამ პატარა ნიგნში ლირიკაა, სატრფიალო ლექსები.

ჭადნატენა და პურნატენა მაინც...

— რომელ წლამდე შეიძლება კაცს უყვარდეს?

— სიყვარულს საზღვარი არ აქვს. თუ არ უყვარს, ესე იგი, არ არსებობს. სიყვარულია ერთადერთი, რისთვისაც ღირდა, ამ გათახსირებულ წუთისოფელში რომ მოსულიყო ადამიანი.

ერთ ტელეარხზე არის გადაცემა — „ცხოვრება მშვენიერია!“. ჩვენში, კაცო?! შენ მოგეკიდა ცეცხლი! ისედაც ჯოჯოხეთია. ასე შეზღუდული რომ იქნება აზროვნება, რამ უნდა გადაარჩინოს ეს ქვეყანა?!
(და ბატონი ოტია იწყებს ლექსის კითხვას, რომელიც მისი ნიგნის „სიშორით სიახლოვის“ შესავალია და ეწოდება „წინათქმა“, ერთადერთი სათაურიანი ლექსი 99-ს შორის, დანარჩენი დანომრილიაო, — მითხრა. კითხულობს

და რებლიკებს ურთავს. გთავაზობთ):

— ეს ჩვენი ცინცინატუსები არც მხედართმთავრებად რომ არ უქნია ღმერთს და არც მიწის მუშებად?

— ამიტომაც გადმოდგებიან ბედოვლათები და — ხუთჯერ გავზრდით მოსავალსო. რანაირად?

ფრანგმა, მოსავალი რომ მიელო, გლახზე თქვა უარი. მე რომ შემეძლოს კიდევ, ამის გამკეთებელი არ ვარ: რად მინდა მთელი სოფელი, ერთი კაცის მეტი თუ არ იქნება?!
რა ვქნათ ახლა ჩვენ? ის კაცი ამბობს, რომ ხუთმაგი მოსავალი უნდა მივიღოთო. მაგრამ ხომ უნდა იცოდდე, რის გაკეთებას აპირებს საამისოდ?

არ ვიცი.

— და არც გვექნება პური ჩვენი არსობისა?

— ის პური, ჩვენ რომ ვჭამთ, ის პური არ იჭმევა. ავსტრიაში, ახლა რომ ვიყავი, კილო პური ღირს ჩვენს ფულზე 10 ლარი. ბავშვს რომ აჭამონ, ის ხუთი კილომეტრით ტრასას დაშორებულ ყანაში უნდა იყოს მოწეული.

შარშან, მართალია, ცუდი მოსავალი იყო, მაგრამ დათესილიც რომ არ იყო? ვინ ხნავს? ვინ თესავს? ტრაქტორიც რომ მისცე, ყველას უნდა დაურთიგო: ერთს ხომ არ გამოაკლებ? მაგრამ იგი ერთ დღეში მოხნავს, რაც მას სჭირდება, მერე დააყენებს.

რას ვაპირებთ?

თუ რამეს ვაპირებთ, მე უნდა ვიცოდდე, რადგან ერთი კაცი ვარ საქართველოში, ვინც წერა-კითხვა იცის და — მიწა. ამათ ან არაფერი არ იციან, ან ერთი თუ იციან, მეორე — არა.

უნდა შემეძლოს, გიპასუხო, რა ვქნათ ჩვენ იმისთვის, ჭადნატენა და პურნატენა მაინც რომ არ ვიმათხოვროთ?

ვერ გეტყვი.

მე რომ ვიცი ჩვენი (!) ხასიათი, ჩვენი ბუნება და ვიცი ჩვენი ეროვნული გამოთავყვანება, არაფრის შემქნელი აღარ ვართ. ახლა რასაც დასთესავ, იმას მოიმკი. მაგრამ კაცი ინძრევა ვინმე?

შემოდგომაზე ხუთჯერ მეტ მო-

სავალს მივიღებთო! ისე აშენდა შენი პატრონი! არ არის ის კაცი, ვინც ამას გააკეთებს. მე საიდან მოგიყვან: ამერიკა გამომიგზავნის ჰუმანიტარულ გლახს?!

ბატონი ოტია განსაკუთრებით ნუხს იმის გამო, რომ ასიათასობით ჰექტარი ჩაის პლანტაციები სრული უყურადღებობით გატყიურდა, პრაქტიკულად გაქრა საქართველოს ეკონომიკის ეს დარგი, რომელსაც მნიშვნელოვანი მოგება შეჰქონდა სახელმწიფო ბიუჯეტში. გაიძარცვა ჩაის ფაბრიკები.

— ახლა მე და შენ ჩაის დაღვევა რომ მოგვინდეს, აზერბაიჯანის „აჰმად ჩაით“ უნდა დავეკმაყოფილდე, არადა, უზარმაზარი საბჭოთა კავშირის მოთხოვნას მთლიანად ჩვენ ვაკმაყოფილებდითო.

არც ჩაის პლანტაციები გვაქვს, არც ყანა, არც ტყე არ დაგვრჩა და ძვეყანა ფეხზე რომ გორ უნდა დავაყენოთ?

ტყეაში გვლაში მომრავლდნენ — ორფენები ჩინაჰენ და ყილიან, ოთხფენები სოფლებს თავს ესხმიან და პირუტყვს ყალს დადრავენო.

არავინ რომ არ ლაპარაკობს ჩაის კულტურის აღდგენაზე, გადაამუშავებელი ქარხნების ხელახალ აღჭურვაზე, უპკირს მწერალს და მამულიშვილს, იმაზე, რაც ძვეყნის სოფლის მეურნეობის წალში გამართვას შეუწყობს ხელს.


— ბატონო ოტია, საქართველოს დამოუკიდებლობის მეოცე წელს შეგვიძლია ვთქვათ, რომ შევქმენით ჩვენი ოცნების ქვეყანა?

— ვერავითარი!

„საით ჰხვალ?“

— სად ნევიდეთ, სად გადავცვივდეთ, რა წყალს მივცეთ თავი?

ის, რაც იყო თამარ მეფის დროს, ის ახლაც კია. სარწყავი არხები, ტერასები... ნიქოზიდან სოფელ-სოფელ მოვდიოდით, იქა მყავს ერთი მეგობარი მეუფე ისაია. გო-



რის რაიონში შემოვედით. გვალვა იყო მაშინაც. ერთ სოფელში სასწაული დევინახეთ, კაცო: სიმინდის ყანა ღალანობს ქარში. გავაჩერეთ მანქანა. ჩამოვედით. მომესია ხალხი. რა ხდება აქანე-მეთქი? ესაო, ბატონო, სარწყავი გვაქვს აქო. ვინ გაგიკეთათ სარწყავი-მეთქი? ეგო თამარ მეფის დროინდელი იყო. გავწმინდეთო. მოვრწყეთო. ხოდა, თუ მორწყავ და მზე ექნება, მეტი რა უნდა ამ ყანას!

რაც უნდა გავაკეთოთ გაზაფხულზე, ყველა სოფელზე უნდა იყოს გათვლილი, ყველა ოჯახზე, თუ არის ასეთი, მარა გამოკეტილია კარები.

— რახან არ არის, იმიტომ ხომ არ გვეუბნებიან, ტურიზმის ქვეყანა უნდა გავხდეთ?

— არის ასეთი ქვეყნები და არის ტურიზმი შემოსავლის ერთ-ერთი წყარო. მაგრამ შენთვის ეგი არ არის მიზანშეწონილი, იმიტომ, რომ, ტურისტი რომ მოგივა, უნდა აჭამო. რა უნდა აჭამო, შენ რომ შენთვის არაფერი გაგაჩნია?! უნდა იყიდო თურქეთში, მოუტანო იმ კაცს და თურქეთის ბა-

ზარი უნდა გაამდიდრო.

ტურიზმი მაშინაც კარგი, როცა მოსავალი გაქვს მოწული, გიჭირს მისი გასალაბა იმ ფასში, უნდა რომ გინდა. და, როცა ტურისტები მოგასაუბრან, იმათზე უნდა გაასალო. ჯერ ეს უნდა გააკეთო და მერე იმდენი ტურისტი უნდა შემოიყვანო, რამდენის დაპურებასაც შეძლებ. სხვაფერი მაგი იქნება...

— ბლუფი?

— ბლუფი! სხვისი საქმის გაკეთება იქნება — შემოსავალს ვერაფერს დაგიტოვებს. შენ თვითონ ვინცხვისგან ნამათხოვრები პურით, რომელსაც ის კაცი თვითონ არ ჭამს, იმით უმასპინძლებ და აშენდები მოგებით?! არ დეიჯერო!

— კულტურას — ლიტერატურას, ხელოვნებას რა ეშველება? დარჩება დღევანდელივით გარიყული „პრიორიტეტული მიმართულებების“ ეზოს გარეთ თუ მეოცე საუკუნის დიდი კულტურის გზას გაჰყვება?

— ეს არის ერთადერთი, რაც ბოლოს და ბოლოს ამ ქვეყანას

რჩება. შენ რა სვი, რა ჭამე და იქეიფე, არავინ კითხულობს. მთავარი ისაა, რაც შენ შექმენი.

მკითხეს ახალგაზრდებმა — რა აზრისა ხართ ჩვენზე? მე ვეუბნები — შვილო, არ წამიკითხია და რა გითხრა? ის ჟურნალები რომ იყო — „ცისკარი“, „მნათობი“, „დროშა“ და რომ მესისპო, იგია ლიტერატურა.

ომი რომ იყო გაცხარებული... რომელში ხარ დაბადებული?

— 1936-ში.

— შენ პატარა იქნებოდი მაშინ. მე ცოტა უფროსი ვარ. **მახსოვს: აქედან 10 კილომეტრში სოფელია ცხუნაური. იმ ჩამოსხა გერმანელმა დესანტი. მაშინაც კი ლიტერატურული ჟურნალი არა მართო გამოდიოდა, მოჰქონდათ სახლში. ახლა კაცია არაა პატრონი: დეიხურა „მნათობი“. დეიხურა „ცისკარი“... „დაჩის ზღაპრები“ 50 ათასი ტირაჟით რომ გამოვიდა, ერთ კვირაში გეიყიდა.**

ორტომეული გამოვეცი მე ადრე — ჯერ ორმოცდაათი წლისამ, მერე — სამოციწისამ. სამოცი ათასი იყო ტირაჟი. არც ერთი ერთ კვი-



რაში აღარ იყო. ახლა რომ გამოვა 200 ცალი თუ 500, არაფერს ნიშნავს. დასაბეჭდად შენ უნდა მიუტანო ფული. საიდან უნდა მიუტანოს მწერალმა? ქურდობა დეინყოს?

ახლა 250 კაცი ერთად მიუღიათ მწერალთა კავშირში. ორი წიგნის ავტორი უნდა ყოფილიყავი, დადებითი რეცენზიები უნდა გქონოდა, მიმღები კომისია მიგიღებდა თუ არა, კიდევ საკითხავი იყო...

მირა, კაცო, ბილწიანობას რა უნდა ლიტერატურაში?! მწერლობა დახვეწილი ენა, კულტურა, ზნეობა!

ქრისტიანმა ქრისტიანი მოკლა, რა დააშავა იმ კაცმა ასეთი? დედა შეაგინაო. ხოო, მაშინ ქე მოკლავდაო. ესაა ქართველის ბუნება.

იგინები, ილანძლები და ამას უძახი შენ მწერლობას?!

— შექმნის თუ არა XXI საუკუნე ისეთ ლიტერატურას — ისეთი წონისა და მნიშვნელობისა, რომელიც თქვენმა — XX საუკუნემ დაგვიტოვა?

— ვერაფერს გეტყვი... იმიტომ, რომ მწერალს კვალში უნდა უდგე. კაი, აგერ წავიკითხე ერთი ავტორი. ახლა მეორე ნომერში უნდა წავიკითხო — რა ქნა? ისევე ისეა, თუ ნოუმატა რაღაცა? მერე — მეორე, მერე — მესამე და ასე შემდეგ. მერე — წიგნშია ყველაფერი თავმოყრილი. წიგნი რომ გამოდიოდა გამომცემლობა „საქართველოში“, იქ მწერლები იჯდნენ — ჯავახიძე, ფანჯიკიძე, ჩარკვიანი, ქემერტელიძე. უცნობი ავტორის წიგნი რომ გამოდიოდა, ის სამ მწერალს უნდა წაეკითხა კიდევ. იმათ უნდა მიეცათ დასკვნა — გამომცემულიყო თუ არ გამომცემულიყო.

— ახალგაზრდა პოლიტიკოსებს თუ ხედავთ ჰორიზონტზე?

— ქვეყანა რო წავა ხელიდან, ის ყოველწინადად წავა. ხომ გითხარი, „პოლიტიკოსებს არ ვუშვებ სახლში...“ მაგრამ იმან იეშმაკა — ალასანიამ. ახალი ჩამოსული იყო, შედარებით წესიერი ჩანდა. მაგრამ გადმოდგა სცენაზე, ხო გახსოვს, და — ათ დღეში გადადგესო ისო, რა ჰქვია...

— სააკაშვილი.

— სააკაშვილი. მე ვთქვი, ათ დღეს რომ ამბობს, ალბათ, გათვლილი აქვს, აბა, ასე ხომ არ იტყვის, ზეპირად! თითებზე ვითვლიდი. გვეიდა ათი, ოცი. სადაა?

მევიდა ჩემთან მისი გამოგზავნილი კაცი — მანქანა იქნება, ყველაფერი და ხომ არ ჩამობრძანდებითო? არა-მეთქი, მე მაქანე არ ჩამოვალ. მე რომ ჩამოვიდე, თუ შეიძლებაო? **მე ვუთხარი, შენ რომ ჩამოხვიდე, კიდეც რომ მოხვიდე, მე არც ერთ შენ სიტყვას არ ვინდობი საერთოდ და რაფარ შეიძლება ჩვენი საუბარი, როცა შენ პირბატინილი კაცი ხარ-მეთქი?!**

გაჩუხდა.

მერე ინრიალა რაღაცა. ავსტრიაში რომ ვიყავი, ელჩი იყო იქინე ვიქტორ დოლიძე. მე იმას არ ვიცნობდი, მაგრამ გადაამყვანა თავზე. ოპერაციების დროსაც კი იქ იყო, კლინიკაში. იმისთანა კაცს როგორ არ ვცემ პატივს!

— იმან ვთხოვათ?

— ის მოუძებნია ალასანიას. დამირეკა: როგორც პოლიტიკოსი — არა, როგორც ადამიანი, მკითხველი, თუ შეიძლება, მიიღეო.

კაი. მოვიდა. ვისაუბრეთ. რა დონეა, იცი? რო ელაპარაკები, აგებიებ... გლახობაზე ვილაპარაკეთ, მინის სიყვარულზე, მინაზე, იმაზე, რაც საამაყო უნდა გვქონდეს და მაგრამ გვეთაკილება — თოხს ვურტყამ ახლა მინას, ვბარავ იქინეო? **გალაკტიონი კი ამბობდა, ფხვირები თუ არ გაიარაო... მაგრამ მაგიც არ გიშველის, თუ კოჭაბაძე მიწას არ შემოიყრი, მიწას ვერ იბრძნობ-მეთქი. მაშინ შენ უნდა იყო დარბული ხე-სავით.**

ქარხანა ჩატანილი გაქვს ოსმალეთში ჯართად, ტექნიკას შენ რაფერ შექმნი? იაპონია არ ხარ... სხვათა შორის, ჩემთან აქ იყო იაპონიის ელჩი, ახლადდანიშნული, მეუღლესთან ერთად. ძალიან კარგი შთაბეჭდილება დატოვა. როგორც მითხრეს, „დაჩის ზღაპრებს“ სკოლებში ვასწავლითო...

გაბრწყინდება საქართველო?

— რა ვაკეთოთ, რის საშუალებით, რა მუშახელით, რა მინის სიყვარულით, რა შრომისმოყვარეობით? არც ერთ ამაზე პასუხი არ აქვთ.

აბა, რით და როგორ უნდა მოიპოვოს ხალხმა პური მისი არსობისა, რით უნდა იარსებოს ქვეყანამ?

— აბა, როგორ გაბრწყინდება საქართველო? თქვენ რომ ყურს გიგდებთ, ეჭვი მეპარება.

— ეს „გაბრწყინება“ რაღა უბედურებაა, რას ნიშნავს?! იგიც უნდა ითქვას — რაფერ. მე რომ მკითხო მაგი, ვერ დაგისაბუთებ. იგი ქე ტორტლავს, გოუგონია რაცხა — იმედი უნდა იქონიო. უიმედო იმედის ქონას არქონა ჯობია, იმიტომ, რომ დოუნყებ ძებნას იმედს. შენ რომ გგონია, გაქვს, ამ დროს ხელს რომ არ ანძრევ და არაფერი არ გაქვს, ესაა ყველაზე მეტად დამღუპველი.

— „სახალხო კრების“ შესახებ რას იტყვი?

— ნონას პატივს ვცემ. ნონას საპრეზიდენტოდ კი არ უნდა. მაგრამ ამას სჭირდება მეზრძოლი სული. ის თუ მეზრძოლი არ არის, დოუძახე და არ მოდის, რად გინდა ასეთი კრება, თუ არავინ გაყვება?! მიმინვიეს, როცა მაგი იქმნებოდა. ჩვევდი. ვესაუბრე. ვუთხარი: სადაა ეს ოპოზიცია, მეიყვანეთ ერთი და ველაპარაკოთ, რა უნდა? აგვისხნან, რას აპირებენ. მევიდნენ ზოგიერთები.

მე ვუთხარი: **ხომ არც ერთს არ ბინდათ მიზანი? კი, გატონო. მაშინ მივასოთ ყველა ამაზე ფხვი. ვიბრძოლოთ, ეს კაცი რაფერ, ყველა ერთად როგორ მოვიპოროთ თავიდან. აი, მირა ვიკითხოთ, შენ როგორ აპირებ ძველის აზნებას.** შენი ჯობია თუ ამისი, თუ იმისი? ძაღლების „ფილოსოფიას“ გასწავლით-მეთქი. მეზობლების ძაღლები ღეჭავენ ლობეს, ისე ებრძვიან ერთმანეთს, ვერ გუობენ. მაგრამ, აბა, გამოჩნდეს მგელი? იმ ნუთში ყვე-



ლა მიესევა იმას. აი, დავდგეთ-მეთქი ძაღლის „ფილოსოფიაზე“ და ვილაპარაკოთ, ვინ რისი მაქნისი ვართ.

— რა თქვებს?

— რა უნდა ეთქვათ, როცა არც კი იციან, რა ქვეყანაში არიან, რისი გამკეთებელია ჩვენი ხალხი?

— ალასანიამ — რაო?

— მეორეჯერაც მოვიდა. გისმენს და აცნობიერებს. არც ერთი პოლიტიკოსი თუ პარტიები არ ზრუნავს ხალხის ცნობიერებაზე.

* * *

საუბარში ორი საათი მაინც ისე მიილია, რომ ვერც გავაცნობიერეთ. ბატონი ოტია სიგარეტს სიგარეტზე ენეოდა — ხან ერთი მუხდმტუქით, ხან — მეორეთი, რომელთა „პატარეა“ გულის ჯიბეში ედო.

— რატომ ეწვევით ამდენს, ბატონო ოტია?

— ერთადერთი, რაც მე ჯავრი მაქ და რაცხა უბედურება, ამით ვიტან და ეგიც რომ არ იყოს, რა გამაძლებინებს?

შემოქმედებაშიც საერთოდ ეგიც ძალიან გეხმარება, როცა წერ — მაშინ. ბალზაკი რომ სვამდა ორმოც ჭიქა ყავას, არ იცოდა, რომ წყენდა?! მაგრამ ვერ წერდა სხვანაირად...

გამომშვიდობებისას, რიკულეზიან აივანზე რომ გამოვედით, კიბის თავზე, ბატონმა ოტიამ ერთი სევდიანი და ჭკუის სასწავლებელი ისტორია გაიხსენა — ძაღლების „ფილოსოფია“ — ადამიანე-



ბისთვის ჭკუის სასწავლებელი:

— კაცთან ველარ ვახერხებ მეგობრობას, იმიტომ რომე კაცი არ არის ქვეყანაზე და ძაღლებთან მაქ ძალიან დიდი ურთიერთობა.

როცა უძაღლოდ დავრჩი, კინოლოგი როა გია გიორგაძე, იმან ჩამომიყვანა ქართული ნაგაზი. კაი სამი თვის იყო. ვმეგობრობდით ძალიან — მეხმარებოდა, დამყვებოდა. სათოხარში ერთად დავდიოდით — ვთოხნიდი, გვერდით იწვა.

გადმოვედით ერთხელ იქედან, ამ სახლის ლაფაროში რომ მოვედით, დაეტაკა პატარა ფაცურას, თუ იგი დაეტაკა, არ ვიცი. ამას, პატარას, ჩემი იმედი მიეცა და ამანაც შეუტია. გადევრიე და გოუნყერი ნაგაზს: ამას უყადრი თავს? ძაღლს ოცი სიტყვა ესმის. ძალიან გავუნყერი. გავლანძღე,

რომ არ ჩაედინა მეორედ.

— სუსტი არ დაეჩაგრა?

— კი. მკაცრად ველაპარაკე — გათახსირებული ყოფილხარ, რა მოგივიდა ასეთი, რას მაყურებინე! წამოვედი. ლაფაროში დავტოვე იქინე. საჭმელი გამოვუტანე. დოვუძახე. არ მოვიდა. ვუძახი. არ მოდის. გავედი ლაფაროში. იქვე, სადაც გავლანძღე, მკვდარი ეგდო — გულგახეთქილი. თბილი იყო ჯერ. აბა, რა იქნებოდა. გავლანძღვა ვერ აიტანა!

დღეს ლანძღავ და კაცს არ ეყურება!

* * *

ესეც, ძვირფასო მკითხველო, — ამ დიდი ინტერვიუს შეგონება, ანუ მორალი.

ესაუბრა
არმაზ სანაბლიძე



ოტიას საფლავი წყალტუბოში, მისსავე ეზოში

კახი კავსაძე — 80

საქართველოს სახალხო არტისტს, პოპულარულ და ყველასთვის საყვარელ მსახიობს — კახი კავსაძეს 80 წელი შეუსრულდა, და რუსთაველის სახელობის სახელმწიფო დრამატულმა თეატრმა ღვაწლმოსილი შემოქმედის იუბილედ ჰარბუდის პიესის კაპანაძისეული სპექტაკლით აღნიშნა.

ერთი მხრივ, ქართული დრამატურგიის გმირები, კლასიკა — სიმონ ჩაჩავა (ბრეჰტის „კავკასიურ ცარცის წრეში“) და ლორდ კასტინგის (შექსპირის „რიჩარდ III-ში“) და მათ შორის, 25 როლი ბრწყინვალედ განსახიერებული რუსთაველის თე-

ატრის სცენაზე; მეორე მხარეს — ქართული და რუსული კინოხელოვნების 80 კინოგმირი (ზოგი კინოთეატრში არ ყოფილა ამდენჯერ); მათ შორის, დონ კიხოტი, აბდულა, ელიზო, მიხეილ კოროშელი — შედეგები.

ბატონი კახი ჟურნალისტების სასურველი რესპონდენტი. არც ჩვენი რედაქციაა მისთვის უცხო.

გთავაზობთ ინტერვიუს შემცირებულ ვარიანტს კახი კავსაძესთან, რომელიც მსახიობს ჩამოართვა ჟურნალისტმა არმაზ სანებლიძემ და „საქართველო და მსოფლიოში“ 2011 წელს გამოქვეყნდა.

«მეუ, ვინაა პატრიოტი?»

ინტერვიუსთვის მივედი და ერთი მსახიობის თეატრში აღმოვჩნდი. წარმოდგენაზე, რომელიც სავსე იყო ემოციითა და აზრით, იყო მაქსიმალურად გულახდილი და დიდოსტატურად შესრულებული, უნიკალური სპექტაკლი, რომლის ავტორი, რეჟისორი, მთავარი და ერთადერთი გმირი დიდი მსახიობი კახი კავსაძე ბრძანდებოდა. დღეს 27 მაისია.

გუშინ იყო ბართლომეს ღამე თბილისში, რუსთაველის პროსპექტზე, მომიტინგეთა, როგორც შემდეგ ლევან გაჩეჩილაძე იტყვის, ხალხის ჩაძაღვების ღამე.

— ბატონო კახი, ჩვენი საუბარი პოლიტიკის გარეშე უნდა წარმართულიყო, მაგრამ წუხანდელი დარბევის შემდეგ, ეტყობა, თვალს ვერ დავხუჭავთ და სმენას ვერ დავიხშობთ.

— მე გულს, იცით, რა მიკლავს? სამოქალაქო დაპირისპირება! ქართველი ქართველს რომ დაუპირისპირდა. აი, თქვენც ბრძანეთ, ის აქეთ არის, ესენი — იქით. ესე იგი, თქვენც გაყავით საზოგადოება.

სწორედ ეს არის საშინელება!

რას ჰქვია დავყოთ, ვინ უნდა დავყოთ? ეს საიდან წამოვიდა? ააა, შენ იქითა ხარ, აქეთ — არა? მაშ, ვინა ხარ?

შენ თუ ჩემთან არა ხარ, არარაობა ხარ. ერთი ამბობს ამას.

მეორე უპასუხებს, არარაობა ხარ შენ!

როცა პირველად სამოქალაქო დაპირისპირება მოხდა, ქართველებმა რომ ესროლეს ერთმანეთს, მაშინ ვთქვი: — დავიღუპეთ-მეთქი.

გამსახურდიას დროს ვამბობ.

სამოქალაქო დაპირისპირება რომ იწყება, სამოქალაქო ომი რომ იწყება, აღარ მთავრდება! ისტორიიდან ვიცი, რომ არ მთავრდება, დაუმთავრებელი ამბავია!

ექვს თვეში დაამთავრეს ქართველებმა და მაშინ ვთქვი, — არა, ქართველი ბრძენია-მეთქი.

ინტერვიუ ჩამოვართვი უწმინდესს კინოფილმისთვის, მაშინ ვუთხარი, ქართველების სიბრძნემ განმაცვიფრა-მეთქი.

— კიო, — მიპასუხა...

თურმე შევცდი მე: სამოქალაქო დაპირისპირება არ დამთავრებულა. რაც მოხდა გუშინ, უფრო ადრე — 7 ნოემბერს და იმაზე ადრე, ეს სულ გაგრძელებაა და ეს არის უბედურება. ხოლო ვინ დაინყო, ვინ რა გააკეთა, დეტალებია.

საშინელებაა სამოქალაქო დაპირისპირება: იმათ მიიღეს, ამათ — არა, ესენი ვაჟკაცურად მოიქცნენ, ისინი — შეშინებულები არიან...

ეს პატრიოტიზმი, იციან თქმა. რა



არის პატრიოტი? პატრიოტი ისაა, ვინც მაგრად ირტყამს მკერდზე მჯილს, თუ ის, ვინც ბევრს ყვირის — ნიინი! გაუძღვება წინ და მერე, გაპონის არ იყოს, მიატოვებს ხალხს.

თუ პატრიოტი ისაა, ვინც ჩუმაღზის, თავისთვის, არ ყვირის და ქვეყნის საქმეს აკეთებს?

თუ ჩვეულებრივი ქართველი ბიჭია პატრიოტი, რომელიც იძახის ქართველი ვარო და ისე იქცე-



ვა და ისე ცხოვრობს, რომ სხვები — ქართველები და უცხოელებიც ამბობენ: — შეხედეთ, რა ბიჭია!

მას ქართველობა ტვირთად დააქვს და ძირს არ უნდა დადოს ეს ტვირთი.

ერთხელ იმის მოწმეც ვიყავი, როცა ბიძინა ივანიშვილს ისეთი ქება შეასახეს, რომ ყოველგვარ ზღვარს გადავიდნენ: — აი, ბატონო ბიძინა, თქვენ, და როცა თქვენ... და ასე — აღმატებულად.

მართლა ძალიან არ უყვარს ბიძინას შექება, ძალიან ცუდ დღეში ვარდება. ბევრჯერ ვარ ამის მომსწერი.

— თქვენი ჭირიმი, არ თქვათო, — შეხვეწნიან.

— როგორ არ ვთქვათო, — შეპასუხებიან, — როცა ამას აკეთებთ და ამაზე მეტსაცო.

— არა, ბატონო, მე შემოძლია და იმიტომ ვაკეთებო. შემოძლიაო...

— სხვას რომ შეუძლია და არ აკეთებს?!

— ეს მისი პრობლემა არისო. მან იფიქროს ამაზე. მე რაც შემოძლია, იმას ვაკეთებ და იმიტომ მაგარი ვარო? გმადლობთო, მაგრამ ამისთვის ნუ მაქებთ, თქვენი ჭირიმიო.

ასე თქვა ბიძინამ.

— თქვენთვის?

— მე მინდა ისეთი არტისტი ვიყო, რომ ყველას ვაჯობო. თუმცა ყველა ქართველი მსახიობი ჩემი მეგობარი და ძმაკაცია. ყველას გამარჯვება მიხარია! ამას მართლა გულით ვამბობ, იმიტომ, რომ, რაც უფრო ბევრი კარგი არტისტი იქნება, ხელოვნების, თეატრის

თამასა უფრო მაღლა აიწევს და უფრო დიდ სიმაღლეებს წავეპოტინებით.

სხვა სფერო, სხვა საქმე მე არ ვიცი. არ მესმის, რა არის პოლიტიკა. მაგრამ რახან მკითხეთ, გიპასუხებთ, რომ, ჩემი აზრით, ეს არის ადამიანთა ურთიერთობა: რომელ მოღვაწეს, პოლიტიკოსს როგორ უნდა ველაპარაკო, არ ვიცი. მე ვიცი, როგორ უნდა ველაპარაკო ჩემს კოლეგებს, კარგ რეჟისორს, როგორ დავემორჩილო მას, როგორ დაველაპარაკო ჩემს პარტნიორს ან დრამატურგს — როგორ ვთხოვო მას, ვთქვათ, რომელიმე სცენის გადაკეთება. ეს ვიცი.

ვინმეს გვერდზე დავდგე? მაშასადამე, ამით სხვისი მოწინააღმდეგე გავხდე?

ეს გინდათ?

არ გამოვა!

მე არტისტი ვარ და ყველანი ჩემი მაცურებლები არიან. მაცურებელი კი ჩემს შვილზე მაღლა დგას. უპატივცემულის ხალხია.

მისი უდიდებულესობა მაცურებელი! იგი მოდის, რომ მნახოს. მე ამ მაცურებლის მომხრე უნდა ვიყო და იმ მაცურებლის — არა?

— როგორც ექიმისთვის ყველა ავადმყოფი პაციენტი და სხვა არაფერი.

— აბსოლუტურად! როგორც კი ვინცე მაცურებლის გრადაციას, შინაგანად ვირღვევი. ერთხელ დანერეს ჩემზე — კახი ყველა სპექტაკლს თამაშობს ბოლომდეო.

სხვანაირად არ შემოძლია.

ამას თუ დამიშლი, მე შენი ვერ ვიქნები.

— თქვენი ამ მონოლოგიდან ასეთი დასკვნის გამოტანა შეიძლება: არა დაპირისპირება, არა-





და ამას მოჰყვება შეშლილის წერილები.

— ცხოვრებაშიც ხომ არსებობენ ადამიანები, რომლებიც ფიქრობენ, რომ ესპანეთის მეფეები არიან? მეფეები თუ არა, მთავარი ვეზირები მაინც.

— რა უნდა უთხრას ამ დროს ფსიქიატრმა გიჟს? კი, გენაცვალე, მეფე ხარ. ჩემი მეგობრის სიდედრი ლილი ნაკაშიძე იყო გენიალური ქალბატონი და არაჩვეულებრივი ფსიქიატრი, სულ გენაცვალეთი ელაპარაკებოდა სულით ავადმყოფებს, ეთანხმებოდა ყველაფერში... იყოს რა, გაკლდება ამით რამე?

ერთი უცნაური თვისება მჭირს, როცა კინოში როლს შევასრულებ, გავახმოვანებ და მეტყვიან, მორჩა ყველაფერიო, აღარ მაინტერესებს იმისი ბედი. აღარ ვნახულობ. რომ გითხრათ, „ღვინის ქურდები“ არ მინახიაო, დამიჯერებთ?

— არა, რადგან მე ყოველთვის სიამოვნებით ვუყურებ, აღარც კი ვიცი, მერამდენად.

— ძალიან მიჭირს ჩემი თავის ყურება. ერთადერთხელ იყო, როცა გოლდონის „სასტუმროს დიასახლისში“ თვალი მოვკარი მომენტს, როცა რალაცას ვჭამდი (ჭამის განსახიერება ეკრანზე ძალიან ძნელია. სცადეთ და დამეთანხმებით), ბოლომდე ვუცქირე, ვთქვი, ვა, რა სწორად ვჭამ! ავდექი და წავედი.

ერთხელაც რომელიღაც ფილმში დავინახე, რომ დავრბივარ. ვააა, რა ჯანმრთელად დავრბივარ! დანარჩენით არ დავინტერესებულვარ.

ახლა ჯანმრთელობის მხრივ რალაც პრობლემები მაქვს და ჩემი თავი დავიჭირე, რომ მიინდა რალაცები მოვასწრო.

ამასწინათ უცხოეთიდან ჩამოვიდნენ ქართველები, ჩვენი სპექტაკლის — „მოხუცი ჯამბაზების“ ნახვა მოისურვეს. თქვეს, რომ კახი ავად არის, გვინდა, მოვასწროთ, თურმე ძალიან სერიოზულად არის საქმეო. საქმე მართლაც სერიოზულადაა... მოვიდნენ, მიყურეს და, სპექტაკლი რომ და-



მთავრდა, ერთს უთქვამს: — ეგ თუ ავად არის, მე მკვდარი ვყოფილვარო.

— ისევეა, როგორც „შენ თუ ამას დაღევ... შენ თუ ამას დაღევ“...

— (გულიანად იცინის). სოფიკო ამბობდა კოტეზე, გრძნობდა, კარგად რომ ვერ იყო და რალაცა უნდოდა მოესწროო...

მეც ჩემი თავი დავიჭირე ამ სურვილზე — რალაცა უნდა მოვასწრო.

— ეს იქნება საზოგადოებრივი საქმე?

— არა! თუ საზოგადოებრივ მუშაობაში გადავყავი თავი, მე დავივინყებ ჩემს საქმეს. მგონია, რომ ჩემი პროფესია ბოლომდე არ ვიცი. ყოველთვის ისეთ შინაგან რალაცას აღმოაჩენ, რომ, ვაი, დედა, როგორ ვბედავდი ამ როლის თამაშს...

— ახლა რაზე მუშაობთ?

— ფოლკლორული ცენტრი არის ასეთი, რომელსაც გიორგი უმიკიშვილი ხელმძღვანელობს. მთხოვეს, კავსაძეების სალამო ვაკეთოთო, მამაჩემის — დათაშ-

კა კავსაძის 100 წლისთავთან დაკავშირებით. მამამ ქართველი ტყვეების მომღერალთა გუნდი ჩამოაყალიბა და 1943 წლის 26 მაისს საქართველოს დამოუკიდებლობის დღესთან დაკავშირებით გამართა კონცერტი.

— იქ?!

— იქ, აბა?! ომის დამთავრების შემდეგ საქართველოში რომ ბრუნდებოდა, სოჭში დააპატიმრეს. 1952 წელს გადასახლებაში გარდაიცვალა თუ მოკლეს, არ ვიცი.

ჰოდა, გამართეს მამაჩემისადმი მიძღვნილი სალამო ფოლკლორულ ცენტრში მომუშავე კარგმა ადამიანებმა. ამ სალამოს დაესწრო ჩემი ქალიშვილის მეგობარი, რეჟისორი ნანა ჯანელიძე და გაგიჟდა, ისე მოეწონა. ნანასთან ერთად რამდენიმე ფილმზე გვიმუშავია.

— მე უნდა კინო გადავიღო, — გადანყვიტა. ახლა ეს ფილმი უკვე დამთავრებულია (30 მაისს გამართა პრემიერა კინოთეატრ „ამირანში“. — ა.ს.). „ნეტავი, იქ თეატრი არის?“ — ასე ჰქვია ამ ფილმს.

P.S. ნეტავი! სანეტარო დროის დადგომისთვის ზოგი ხმალამოლებული იბრძვის, ზოგი — პოლიტიკური, „მშვიდობიანი“ ხერხებითა და მეთოდებით.

კახი კავსაძის სანეტარო დრო ერთიანი, გაუხლებჩავი, დაუპირისპირებელი საზოგადოება ერთიან და მთლიან საქართველოში.

მას თავისი გზა აქვს არჩეული, სხვას — სხვა.

ასე იქნება თუ ისე, უნდა დადგეს ეს დრო, რადგან ასეთია კაცობრიობის განვითარების ლოგიკა.

ესაუბრა არმაზ სანებლიძე



ილია ჭავჭავაძე:

კანონის წინაშე თანასწორობა საზოგადოების წესიერი აგებულების საფუძვლის ქვაკუთხედი

კანონის წინაშე თანასწორობა ყველასი ერთად და თვითვეულისა ცალკე ერთი უმთავრესი ქვაკუთხედი იმ საფუძვლისა, რომელზედაც დამყარებულია კაცთა საზოგადოების წესიერი აგებულება.

იგი კანონი კანონი არ არის, თუ მის წინაშე დიდპატარაობას, მაღალ-მდაბლობას ადგილი და სავალი ექმნება კაცთა მოქალაქურ ცხოვრების გზაზედ. რაკი ერთსათვის ერთი კანონია და მეორესათვის — მეორე, კანონი ჰკარგავს თვის უდიდეს მნიშვნელობას საყოველთაო მფარველობისას და შემწეობისას, რადგანაც თვის მადლს და თვის მსჯავრს ერთნაირად ვერ მოჰყვანს ყველასა, ვინც კი მისკენ მიიმართება გაჭირების დროს. **გუნებათად კანონი ყველასათვის ერთნაირი დავალებაა, ერთნაირი უფლება და, როცა იგი ერთს ერთნაირად ეძცევა და მეორეს სხვანაირად, მაშინ იგი სხვა არა არის რა, თუ არ რჯულად შექმნილი უპირატესობა ერთისა მეორის წინაშე.**

ვერა, წესიერად მოწყობილი მოქალაქური ცხოვრება ვერ შეიფერებს ამისთანა უსწორმასწორობას უიმისოდ, რომ თვით ზედ არ გადაეგოს, პირქვე არ დაემხოს და ამიტომაც არ არის ქვეყანაზედ არც ერთი იმისთანა განათლებული სახელმწიფო, საცა ყველას თანასწორობა კანონის წინაშე დედააზრად, სათავედ არ ედვას ყოველს კანონმდებლობას, ყოველს რჯულიერებას. რუსეთის სახელმწიფოშიაც ეს თანასწორობა ყველასი კანონის წინაშე ცხადად გამოთქმულია. განსვენებუ-

ლის იმპერატორის ალექსანდრე II განსამართლების რჯულდებამ ეს თანასწორობა მტკიცე საფუძველზედ დააყენა რუსეთის იმპერიაში და აწ არსებული და მომქმედნი კანონები ყველას ერთგვარად და განურჩევლად უქადიან მფარველობას და შემწეობასა.

თუმცა რჯულიერება კანონის წინაშე ეგრე გვასწორებს ყველასა, მაგრამ, ჩვენდა სამწუხაროდ, თვითონ ცხოვრება, რომელსაც ვერ ვერ აღმოუფხვრია ძირიანად ძველნი ზნენი და წადილნი, ვერ კიდევ ეურჩება კანონს და დიდი ჰბედავს შებლაღვას პატარის უფლებისას მარტო იმ აზრით, რომ მე დიდი ვარ და ის პატარაო.

ამ მავნებელის ზნის აყოლა მიეტივება გაუნათლებელს კაცსა, იმისთანა კაცსა, რომელსაც არ ესმის, რომელსაც ვერ ვერ მიუგნია, რა დიდი მადლია ქვეყნისათვის, კაცთა საზოგადოების ბედნიერად ცხოვრებისათვის თანასწორობა კანონის წინაშე. ხოლო არ მიეტივება მას, ვინც გარეგანის ნიშნებით მაინც საგულისხმოა, რომ სწავლაში ყოფილა, განათლების შუქი ცოტად თუ ბევრად მოჰყვანია და თვის საზოგადოებაშიც იმისთანას მდგომარეობა აქვს, რომ მოეთხოვება სამართლიანი მართებული ქცევა ყველგან და ყველას წინაშე, დიდი იქნება თუ პატარა.

ყოველივე ეს გვათქმევინა ერთ-



მა შემთხვევამ, რომელიც დღეს ახალს ამბებშია დაბეჭდილი ჩვენს გაზეთში. ერთი იმერელი მოსამსახურე გაუგზავნია თავის პატრონს ფაეტონის მოსაყვანად. დიდხანს ჰცდილა ეს მოსამსახურე, მრავალს მეფაიტონეებს შეჰხვეწენია, მაგრამ არავინ გამოჰყოლია. ბოლოს, როგორც იყო, უშოვნია ფაეტონი. იქაც მახლობლად მდგარა სამი სამხედრო ნოდების კაცი, ერთს მათგანს უბრძანებია მოსამსახურის მიერ დაჭერილ მეფაიტონესათვის, მე წამიყვანეო, მოსამსახურე უარზედ დამდგარა, ძლივძლივობით ვიშოვე ფაეტონი, ჩემი დაჭერილია და ვერ დაგიტომობთო. სამხედრო ნოდების კაცს ბევრი აღარ ულაპარაკნია, ფაეტონი წაურთმევია, დაუძახნია პოლიციელისათვის და უბრძანებია, ურჩი მოსამსახურ-

რე სადმე გამაცალეო.

ამისთანა ძალმომრეობა ხშირია ჩვენში, მაგრამ იშვიათად გამოძვლავნდება ხოლმე. სამართლამდე რომ მივალნო ამ საქმემ, რასაკვირველია, ამ ძალმომრეობას, მარტო დიდპატარაობისა და მაღალ-დაბლობაზე დაფუძნებულს, თავისი შესაფერი მსჯავრი დაედებოდა, მაგრამ სანუხარო ეს არის, რომ დიდმა იცის, პატარა ამებებს არ გამოუდგება და დანაშაული შეერჩება დამნაშავესა. უსათუოდ ამისთანა ბოლოც ექმნება ამ საქმესა: მოსამსახურე არ იჩივლებს და ეს ამბავი ჩაილულის ნყალს დალევს. ჩვენ კი არ შეგვეძლო ხმა არ ამოგველო ამ საგანზედ. კანონის მიერ მონიჭებული

თანასწორობა საჯარო უფლებათა, ერთნაირად კუთვნილი ყველასი და მასთანადმი, ერთნაირად კვირვასი ყველასათვის. ამიტომაც იგი თანასწორობა ერთნაირად გასაფრთხილებელია, ერთნაირად საქომამაგებელი, ერთნაირად დასაცველი, თუ კაცს ცოტა რამ ამ ქვეყნიერობისა შეუგნია და სიყვარული წესიერობისა და რიგიანობისა გულს ჩასახვია. დარღვევა ამნაირის თანასწორობისა თვითვეულის ჩვენგანის უფლების დარღვევაა და ამიტომაც საქმეებურია გულწყრომა იმისი, რომელმაც ეს ამბავი გვაუწყა ჩვენ გაზეთში დასაბეჭდად და სამართლიანია იგი გულამღვრევა, რომელიც ამის

მომბეს უგრძენია ამ ამბავის მოხდენის დროს.

ეგ თანასწორობა, ეგ საჯარო უფლება რომ დაუსჯელად ილახებოდეს, მაშინ ვერავინ კარშიაც ფეხს ვერ გამოჰყოფდა, რადგანაც პატარას დიდი არ დაეღევა და დიდს კიდევ უფრო დიდი. ეს რომ ასე იყოს, მაშინ კაცთა საზოგადოება ცნობიერთა არსებათა კრებას კი არ წარმოადგენდა, არამედ შავის ტყის ნადირთა გროვას, საცა ვინც ძლიერია, მართალიც ის არის. ჩვენდა სასიამოვნოდ, ამისთანა ამბებს ან არსებულნი კანონები არ იწყნარებენ და სანატრელია, რომ არც ამ შემოსენებულს შემთხვევაში შეიწყნაროს.

ილიას გაკავთილაძე

* „ჩემი მსაჯული ჩემი ტვინია და ის პატარა ღმერთი, რომელსაც სინდისს ეძახიან“.

* „ხვალე არ უნდა ჰგავდეს დღევანდელს, თუ კაცს პროგრესი, წინსვლა ადამიანისა ფუჭ სიტყვად არ მიაჩნია“.

* „მართალია, დიდად წარმატებული გონება და გული უნდა ჰქონდეს, რომ კაცი შემძლებელი იყოს, თავისი თავი გაითვალისწინოს და თავისთავს მსაჯულად გაუხდეს პირუთვნელად, იმიტომ, რომ იგი ერთსა და იმავე დროს მსაჯულიც უნდა იყოს, მოსარჩლეც, ბრალმდებელიც და ბრალდებულიცა.“

* „დროთა ბრუნვამ სხვის მაყურებლად გაგვხადა, სხვაზედ იმედს შეგვაჩვივა და ამებმა სრულიად წარწყმიდეს ჩვენში ის თვითმოქმედების ძალ-ღონე, რომელიც უწინ იყო და რომელიც თუკი სადმე არის, ყველგან ხალხის ბედნიერების სათაურია და საფუძვლიც. ხსნა ჩვენი თვითმოქმედებაში და ერთიანობაშია, საცა კაცი თითონ არ არის, სხვისით არა გაკეთებულა რა, საცა ერთი ვერას იქმს, იქ ოცსა და ორმოცს ერთად შეუძლიან ჰქმნას.“

* „ულონობა ქვეყნისა მარტო უფულობა და უქონლობა კი არ არის, როგორც ეხლა ბევრსა ჰგონია, არამედ უფრო ისა, როცა სათნოებანი, კეთილ-მოქმედი, მაღალ-ზნეობის კაცი არა ჰყავს. სიმაგრე ქვეყნისა, ქვეყნის ძალ-ღონე, ერის შემნახველი და გამდიდებელი ქვითკირი ადამიანის ცხოვრებისა მარტო სათნოებაა და მარტო სათნოებანი კაცი ჰქმნის ამ ნუთისოფელს ტაძრად, — სადაც ღმერთს ადიდებენ, და სამოთხედ, — საცა ბედნიერება ადამიანისა ჰსადგურობს“.

* „ჭეშმარიტი განთლება განვითარებულ გონების და განუთვნილის ზნე-ხასიათის ერთმანეთთან შეუღლებაა განუყრელად. თუ კაცს ან ერთი აკლია, ან მეორე, იგი განათლებული არ არის, და ჩვენის ფიქრით, ისევე გონება განუვითარებელი და ზნე-ხასიათ განუთვნილი კაცი სჯობია, ვიდრე გონებაგანვითარებული და ზნე-ხასიათ გაუნვრთნელი, ამიტომაც დღევანდელ დღეს ადვილად შესაძლოა შეჰხვდეთ, — კაცი ცოდნით ერთი იყოს, მოქმედებით და ცხოვრებით კი — სრულიად სხვა“.

* „ზნე-ჩვეულების გაუნმენდებლობა და გაუნათლებლობა არის მიზეზი, რომ ქვენა გრძობანი ზენა გრძობათა ადგილას გამეუფდებიან ხოლმე, ტყუილი მართალის ნიღაბ ქვემ დაიარება და ყალბი ხალასად გადის“.

* „დღეს ყოველიფერი შენირული აქვს მარტო გონების გახსნას და დავიწყებულია, რომ ადამიანს ჭკვა-გონების გარდა გულიცა აქვს, რომელსაც კაი-კაცობისათვის ისეთივე წურთენა და გახსნა უნდა, როგორც ცოდნისათვის ჭკვა-გონებასა“.

* „გულდამჯდარად, აუჩქარებლად, მართებულად, გულმტკიცნეულად და გულწრფელად ნათქვამი სიტყვა, თუნდაც წუნისა, უფრო მჭრელია, უფრო შემძლებელი, ვიდრე ნიშნმოგებელი, განინმატებული და გაბოროტებული ავციობითა და წინლაკიანობითა“.

* „ჩუმი, მშვიდობიანი, დინჯი, არა-მყვირალა და ჩხავანა მოღვაწეობა, — საცა უნდა იყოს, — თუ გულმზურვალეობით არის გამთბარი, გულმოდგინეობით წარმართული, ერთგულობით ძირმაგარი და პატიოსნებით ნათელცხებული, — უტყუარი ნიშანია თითონ მოღვაწის დიდ-ბუნებოვანობისა.“

წყალი – ეროვნული სიღვიძრა



საქართველოს ბიოლოგიურად აქტიური მინისქვეშა ბუნებრივი სასმელი წყლის ინდუსტრიის განვითარებაზე საქართველოს საინჟინრო აკადემიის მეცნიერებმა, აკადემიკოს პაატა გიორგაძის ხელმძღვანელობით, შეიმუშავეს საქართველოს სასმელი წყლის რესურსების რაციონალური გამოყენებით ქვეყნის სოციალურ-ეკონომიკური სწრაფი განვითარების კონცეფცია-პროგრამა. კონცეფცია-პროგრამის საფუძველზე შემუშავებულია ლოჯისტიკურ-ინოვაციური პროექტი „წყალი – ეროვნული სიღვიძრა“, რომელიც 2005 წლიდან სერტიფიცირებულია „საქპატენტის“ მიერ. ამ პროექტის მიხედვით ქვეყნის მუნიციპალიტეტებში გათვალისწინებულია მინისქვეშა ბუნებრივი სასმელი წყლის ჩამომსხმელ-დამფასოებელი საწარმოების შექმნა და პარტნიორ-ინვესტორის დახმარებით მზა პროდუქციის გატანა საერთაშორისო ბაზარზე. გვესაუბრება აკადემიკოსი პაატა გიორგაძე:

— საქართველოს, მიუხედავად მდიდარი ბუნებრივი რესურსების სხვადასხვა მარაგებისა, არ გააჩნია მსოფლიო დონის ისეთი საბადოები, როგორც ბუნებრივი მაღალხარისხოვანი მინისქვეშა სასმელი წყლის საექსპლუატაციოდ დასაშვები მარაგებია. სწორედ ამით გამოიჩინა ქართული, „ბიოლოგიურად აქტიური“ ბუნებრივი მინისქვეშა სასმელი წყალი მსოფლიო ბაზარზე დამკვიდრებული და ბრენდის „ხელოვნურად გამდიდრებული“ (სასმელი წყლის სტანდარტამდე მიყვანილი) არსებული წყლებისგან.

საქართველოს ეკონომიკაში ამ რესურსის პრიორიტეტულობა შეიძლება განისაზღვროს შემდეგი ფაქტორებით: ბუნებრივობა, ბიოლოგიური აქტივობა, სტაბილურობა, მუდმივგანახლებადობა, არასეზონურობა, მაღალი ხარისხი, კონკურენტუნარიანობა, ასევე, მსოფლიო ბაზარზე სასმელ წყალზე (მწვავე მსოფლიო დეფიციტის ფონზე) მზარდი მოთხოვნილება და დაბანდებული კაპიტალის უკუგების ხანმოკლე პერიოდი.

ჩვენი პროექტის მიხედვით, ქვეყნის მუნიციპალიტეტებში

გათვალისწინებულია მინისქვეშა ბუნებრივი სასმელი წყლის ჩამომსხმელ-დამფასოებელი საწარმოების შექმნა და სტრატეგიულ პარტნიორ-ინვესტორის დახმარებით მზა პროდუქციის გატანა საერთაშორისო ბაზარზე. ამ გზით მიღებული პროდუქციის კომერციალიზაციით ქვეყნის წლიური ფულადი შემოსავლები გაიზრდება 12 მლრდ აშშ დოლარით, საიდანაც ქვეყნის ბიუჯეტში მობილიზებული იქნება 3 მლრდ აშშ დოლარი. ხაზგასასმელია, რომ ბუნებრივი სასმელი წყლის საექსპლუატაციოდ დასაშვები მარაგებიდან — 301 მ³/წმ-დან გამოყენებული იქნება მისი მხოლოდ 0,75%. ამასთან, სასმელი წყლის სახელმწიფო მარაგების, კაპიტალიზაციის ტექნოლოგიებისა და მსოფლიო ფინანსურ რესურსებში ჩართვის მექანიზმების გამოყენება მოგვცემს გრძელვადიანი მცირეპროცენტის ფულადი რესურსების მოზიდვის რეალურ საშუალებას, რაც ქვეყნის სოციალური და ეკონომიკური განვითარების სტაბილური გარანტია იქნება.

გაეროს მონაცემებით, 4,5 მლრდ ადამიანზე მეტი განიცდის სასმელი წყლის კატასტროფულ უკმარისობას. საქართველო მხოლოდ მაშინ გადარჩება და დაიმკვიდრებს ღირსეულ ადგილს მსოფლიოში თუ ის, თავის ტრადიციებზე დაყრდნობით, შექმნის თანამედროვე ტექნოლოგიებსა და მიღწევებზე დაფუძნებულ ქართულ სახელმწიფოს.

საქართველო კი მაღალხარისხოვანი ბუნებრივი სასმელი წყლის რესურსებით მთელ კონტინენტზე ერთ-ერთი უმდიდრესი ქვეყანაა. წყლის ძირითადი წყაროა მუდმივგანახლებადი მინისქვეშა დაბალმინერალიზებული ბუნებრივი სასმელი წყლები, რომლებიც მაღალი ხარისხითა და უხვი დებეტით გამოიჩინა.

ჩვენს ქვეყანაში აღრიცხულია



26 ათასზე მეტი მდინარე, რომელთა სიგრძე 59 ათასი კილომეტრია, ჯამური მდინარეული ჩამონადენი — 65 800 კუბური მეტრი.

მტკნარი წყლების ბუნებრივი მარაგები საქართველოს ტერიტორიაზე არათანაბრადაა განაწილებული, აქედან 67% დასავლეთ საქართველოზე მოდის, 33 — აღმოსავლეთ საქართველოზე.

მყინვარები თავმოყრილია დიდი კავკასიონის სამხრეთ კალთის ცენტრალურ ნაწილში. მათი რაოდენობა 734-ია. იქ აკუმულირებულია 30 100 კუბური მეტრი მტკნარი წყალი. აქედან ყოველწლიურ წყალბრუნვაში მონაწილეობს მხოლოდ 5%, დანარჩენი საუკუნო მარაგებია.

ტბების რაოდენობა 850-ს აღწევს. აქედან 97,3% მტკნარია. ტბებით ყველაზე მდიდარია სამხრეთ საქართველო;

საქართველოს ტერიტორიაზე ექსპლუატაციაშია 44 წყალსაცავი, რომლებშიც დარეგულირებულია 3,32 კუბური კმ ჩამონადენი, რომელიც, ძირითადად, ირიგაციასა და ენერგეტიკაში გამოიყენება.

საქართველოს შუაშია, თავისი მაღალსარისხოვანი გუნებრივი სასმელი წყლის მარაგებიდან გარკვეული ნაწილი შეიტანოს დედაქალაქის მოსახლეობის დაფარვაში. გუნებრივი სასმელი წყლით უზრუნველყოფის გლობალური პრობლემის გადაწყვეტაში (აღსანიშნავია, რომ წყალი შედის ჰუმანური დახმარების პროგრამის აუცილებელ რაციონში), ისე, რომ ქვეყანას ზიანი არ მიადგეს მოსახლეობის სასმელი წყლით უზრუნველყოფის საქმეში.

ცნობილია, რომ ადამიანის ფიზიოლოგიური ნორმის დასაკმაყოფილებლად დღე-ღამეში 2,5 ლიტრი წყალი საჭირო, ანუ მსოფლიოს მოსახლეობის დასაკმაყოფილებლად საჭირო იქნება არანაკლებ 18,4 მილიარდი ლიტრი სასმელი წყალი. საქართველოს შეუძლია ამ დეფიციტის დაფარვა ისე, რომ ზიანი არ მიადგება ქვეყნის სასიცოცხლო მნიშ-



ვენელობის რესურსებს — დღე-ღამეში დაგვრჩება არანაკლებ 7,6 მილიარდი ლიტრის ოდენობის წყალი.

კაცობრიობის ერთი მესამედი ცხოვრობს წყლის საშუალო და მაღალი დეფიციტის მქონე რეგიონებში. 2025 წლისთვის კი ანალოგიურ პირობები შეექმნება მოსახლეობის ორ მესამედს.

წყლის კრიზისის პრობლემის გადაწყვეტა მდგომარეობს არა ახალი ტექნოლოგიების დანერგვაში, არამედ წყლის მოხმარების სქემის მართვის ცვლილებებში. ამისათვის საჭიროა „წყლის პოლიტიკის“ დადგენა და განხორციელება;

ამგვარი ტოტალური პრობლემის ფონზე, „საქართველოს სასმელი წყლის რესურსების რაციონალური გამოყენებით ქვეყნის სოციალურ-ეკონომიკური სწრაფი განვითარების „კონცეფცია-პროგრამის“ საფუძველზე შედგენილი წყლის პროექტის „წყალი — ეროვნული სიმდიდრე“ შემქმნელმა მეცნიერ-ავტორთა და დამფუძნებელთა ჯგუფმა მიზნად დაისახა ლოჯისტიკურ-ინოვაციური პროექტის შესაბამისად საქართველოს მიწისქვეშა ბუნებრივი სასმელი წყლის ნაწილის გა-

მოყენება კომერციული რეალიზაციის მიზნით. პროექტი ითვალისწინებს სასმელი წყლის ჩამომსხმელ-დამფასობელი ქარხნების, შავ ზღვაზე საკუთარი ტერმინალის მშენებლობას, შესაბამისი ინფრასტრუქტურის მოწყობას და ა.შ.

მოკლედ - ეკონომიკური შედეგის შესახებ

1. ინვესტიციები სრულად აისახება შემოსავლების სახით სახელმწიფო ბიუჯეტში, პროექტის სარეალიზაციო სამუშაოებში ძირითადად დასაქმდება ადგილობრივი მოსახლეობა;

2. კონცეფცია-პროგრამის განხორციელებით (ორ წელიწადში) ქვეყნის ყოველწლიური ფულადი შემოსავალი გაიზრდება 12 მლრდ აშშ დოლარით;

3. შეიქმნება მრავალათასიანი სამუშაო ადგილი საშუალო ხელფასით 1500 აშშ დოლარი;

4. მოიხსნება სიღარიბის პრობლემები;

5. შეჩერდება მიგრაციული პროცესები;

6. შეიქმნება ნავთობისა და გაზის საბადოების მფლობელი წარმატებული არაბული ქვეყნების მსგავსი უპრეცედენტო მოდელი, იმ უპირატესობით, რომ სასმელი წყლის რესურსი არამიღვევადი მუდმივგანახლებადი სასიცოცხლო დანიშნულების პროდუქტია;

7. სასმელი წყლის ბუნებრივი რესურსების კაპიტალიზაციის მოდელის მოქმედება (საერთაშორისო საფონდო ბაზრებზე მისი მატერიალიზება ფასიანი ქაღალდების სახით) იძლევა სრულ გარანტიას ჩვენი ქვეყნის კონკურენტუნარიანი უპირატესობის ამალღების თვალსაზრისით;

8. განხორციელდება სოფლისა და სატყეო მეურნეობის, ენერგეტიკის, მსუბუქი მრეწველობის და სხვა სტრატეგიული საინვესტიციო ეკონომიკური პროექტების დაფინანსება, რომელიც ქვეყნის ეკონომიკური დამოუკიდებლობის წინაპირობაა.

1 ივლისი წმ.ნიწოს ხსენების დღეა

ლეგან სანიკიძე

ნიწო განმანათლებელი

მესამე საუკუნის დასასრულიდან რომის მსოფლიო სახელმწიფო მხოლოდ გარეგნულად ინარჩუნებდა ერთიანობას. ნამდვილად კი იგი ორი ნაწილისაგან — აღმოსავლეთ და დასავლეთ იმპერიებისაგან შედგებოდა. მალე თვით რომს, „მსოფლიოს ცენტრსა და მარადიულ ქალაქს“, აღმოსავლეთში ახალი სატახტო დაუპირისპირდა. იგი ააგო იმპერატორმა კონსტანტინემ ბოსფორის სრუტისა და მარმარილოს ზღვის შესაყარში, ძველი ბერძნული კოლონიის, ბიზანტიონის ადგილზე. დამაარსებლის სახელის მიხედვით, ქალაქს ეწოდა „კონსტანტინოპოლის“ („კონსტანტინეს ქალაქი“), რომლის კურთხევა და ახალ სატახტოდ გამოცხადება, დიდი ზორვითა და ზარზეიმით მოხდა 330 წლის 11 მაისს. აქედანვე დაედო საფუძველი „აღმოსავლეთ რომის იმპერიას“, მეორენაირად — „ბიზანტიის იმპერიას“.



ლეგან სანიკიძე

ეს ის დროა, როცა მთელ რომის იმპერიაში, ატლანტის ოკეანედან მესოპოტამიამდე, სრულად გავრცელებულიყო ქრისტიანობა, რომელიც აქამდე მთელი სამი საუკუნის მანძილზე, მოღწეულიყო ვითარცა დევნილი და წამებული რელიგია.

და, რომის იმპერატორთაგან კონსტანტინე აღმოჩნდა პირველი, რომელმაც გონივრულად შეაფასა ძალა და სარგებლიანობა ქრისტიანობისა უწინარესად მისი უზენაესი ხელისუფლების განმტკიცებისათვის: მძლავრი კრიზისებით შერყეულ იმპერიას სწორედ ერთიანი, მონოთეისტური რელიგიური-იდეოლოგიური საძირკველი ესაჭიროებოდა, ხოლო ასეთ ერთიან იდეოლოგიად, მანამდელი მრავალმერტიანული, ლოკალური რელიგიებისაგან განსხვავებით, სწორედ ქრისტიანობა უნდა გამომდგარიყო. ამიტომ კონსტანტინემ მის წინამორბედ იმპერატორთა ანტიქრისტიანული პოლიტიკა დაგმო და ქრისტიანობა მთელს იმპერიაში ნებადართულ მოძღვრებად გამოაცხადა. მისივე ნებით, 325 წელს, ქალაქ ნიკეაში, მოწვეულ იქნა პირველი მსოფლიო საეკლესიო კრება.

როგორც ეტყობა, კონსტანტინეს ხელმწიფობის ჟამს, ქრისტიანობა ფართოდ და მტკიცედ ყოფილა გავრცელებული საქართველოშიც. ამაზე ნათლად მეტყველებს თუნდაც ის ამბავი, რომ ნიკეის მსოფლიო საეკლესიო ყრილობის მონაწილე 318 ეპისკოპოსიდან 111-ე ნომრით მოხსენიებულია **ბიჭვინტის ეპისკოპოსი სტრატოფილე**. ამდენად, დასავლეთ საქართველოში, უკვე **IV საუკუნის პირველ მეოთხედში, ქრისტიანობა ისე ფართოდ ყოფილა გავრცელებულიყო, რომ ამ საეპისკოპოსო ეპარქიაშიც კი არსებულა!**..

330 წლის მახლობლად ქრისტიანობა სახელმწიფო რელიგიად გამოცხადდა აღმოსავლეთ საქართველოში — იბერიაში.

მაშინ აქ მეფედ იჯდა მირიან მესამე.

ქართლში ახალი მოძღვრების გამოცხადებისა და ქართველი ხალხის მონათვლის („მოქცევის“) მთავარი გმირი შეიქნა ახალგაზრდა ქალი, სახელად — ნინო.

მისი სამშობლო იყო კაპადოკია — ქვეყანა, დასაბამითვე დასახლებული ქართველური ტომებით.

ჰყავდა წარჩინებული მშობლე-

ბი: მამა — ზაბილონ, დედა — სუსანა.

ზაბილონ კაპადოკიელს ჭაბუკობითვე სახელი გაეთქვა ნიჭით, სიმამაცით, სიქველით და მიუღწევია რომის იმპერიის მხედართუფროსობისთვის. მალე იგი ქრისტეს სჯულზე მოქცეულა და სხვაც მრავალი მოუქცევია. მერე იერუსალიმს წასულა ქრისტეს წმიდა ადგილთა მოსახილველად და სათაყვანოდ, თან მთელი თავისი ქონება წაუღია და ქვრივობოლთა და უპოვართათვის დაურიგებია. მოსწონებია და ცოლად შეურთავს ქრისტიანი ქალი სუსანა — იერუსალიმის პატრიარქის დაი. აქვე, იერუსალიმში დაორკეცებულა სუსანა. ცოლქმარი კაპადოკიაში დაბრუნებულა, ზაბილონის მშობლიურ ქალაქში, კალასტროში.

აქ დაიბადა ნინო.

როცა თერთმეტი წლისა გახდა, მშობლებმა ყველაფერი მიჰყიდ-მოჰყიდეს, ისევე იერუსალიმს ჩავიდნენ და ფული მთლიანად მათხოვრებს, საპყართ და ქვრივობლებს დაურიგეს. აქვე დასახლდნენ და შეუდგნენ ქრისტიანულ ღვთისმსახურებას.

ნინომ ბიძასთან, იერუსალიმის



პატრიარქთან ისწავლა ქრისტეს მოძღვრება და საქრისტიანო მსახურება. კარგად რომ ისწავლა და შეისისხლხორცა, ბიძას ლოცვა-კურთხევა გამოსწირა, მშობლებს დაემშვიდობა და წარმართ ადამიანთა ქრისტეს სჯულზე მოქცევას შეუდგა.

ასე, ქრისტეს მოძღვრების ქადაგებით, წინომ მიაღწია „სამეფოს ჰრომს“.

აქ იგი დაუახლოვდა ორ ქალს — რიფსიმესა და გაიანეს. ორივე გააქრისტიანა. მალე მათ გარდა წინომ კიდევ ორმოცდაათამდე წარმართი მოაქცია ქრისტეს სჯულზე.

ამასობაში რომში ქრისტიანთა მორიგი დევნა და ხოცვა-ჟლეტა დაიწყო.

წინო, რიფსიმე და გაიანე რომიდან გამოიქცნენ და დიდის გაჭირვებით მოაღწიეს სომხეთს.

რიფსიმე და გაიანე სომხეთში დარჩნენ, სომეხთა მოსაქცევად.

ხოლო, წინო, „ეგარდმო მინიშნებით“, წამოემართა საქართველოსკენ.

მოდოდა იგი, ქალწული უმშვენიერესი, სულით უმანკო და სხეულით უზადო, ტანად ალვა და პირად სახიერი, გონებით ნათელიერი და რწმენით შეგრძნებულ, ყვავილ-ბალახთა მესაიდუმლე და მესასწაულე აქიმ-მკურნალი.

სამი თვე მოდიოდა, ხან ფეხზე ხამლით, ხან ფეხშიშველი, ხელში არგანით, მკერდზე ჯვარცმით.

მეოთხე თვეს, ივნისში, ჯავახეთს შემოადგა ფეხი.

ქალი შეაძრწუნა მთებმა, რომელთაც ზაფხულშიაც არ მოეხადათ თეთრი ნაბდები.

დადგა თავფარავნის ტბასთან და იქვე დაივანა ორი დღე-ღამე.

თვალსა და გულს აჩვევდა ქართულ მიდამოს, გასაოცარ მიწას და ზეცას. ინახად მჯდარი გემოს უსინჯავდა თავფარავნულ თევზს. იხიბლებოდა აქაურ მწყემსთა თავაზიანობითა და სტუმართმოყვარეობით.

აქვე პირველად მოისმინა „არმაზ“ და „ზადენ“, რომელთაც მასპინძელი მწყემსები მოუხმობდნენ, მათ მიმართ ლოცვას აღავ-



ლენდნენ და ზორვას უმართავდნენ.

აქვე ამ უცნაური კერპების თაყვანისმცემლებს პირველად უხილავთ უცხო ქალწულის ქრისტიანული ლოცვა-ვედრება და ქრისტესათვის ცრემლის თხევა.

აქვე წინომ შეიტყო, რომ ეს გულკეთილი ადამიანები ყოფილან მცხოვრებნი „დიდისა ქალაქისა მცხეთისანი, სადაც ღმერთნი ღმერთობენ და მეფენი მეფობენ“.

და წინოც წამოვიდა ამა „დიდისა ქალაქისაკენ“.

კიდევ დიდხანს იარა ხამლით და უხამლოდ.

გზაზე მგზავრებს აპყვავა, მტკვარი გადმოიარა და მოვიდა ურბნისს.

ერთი თვე აქ დადგა და ისწავლა აქაური ხალხი, მათი ცხოვრება, ზნე და ჩვევა.

მერე დადგა დღე, როცა ხალხი დაიძრა „დიდად ქალაქად, სამეფოდ, მცხეთად, მოვაჭრებად სახმართა რათამე და ზორვად წინაშე არმაზ ღმრთისა მათისა“.

და წინოც გაჰყვა ხალხის მდინარებას.

მივიდა მცხეთას და იხილა ქალაქი საარაკო მშვენიერებით.

ორი მდინარის შესაყარში გაშლილიყო სამეფო ქალაქი ქართლოსიანებისა. მჭიდროდ და მრავლად დასახლებული, სახლები ტანსრული ხუროთმოძღვრული ანაგებით, წითელი კრამიტის სახურავებით, შუაგულში სამეფო სრა-სასახლით და ქალაქის თავ-



ზე უმტკიცესი აკროპოლისით. მდინარეთა მხრიდან მაფალი მთები დასცქეროდნენ მცხეთას.

ქალაქი ხალხს ველარ იტევდა „გამოვიდა ერი ურიცხვი, ვითარცა ყვავილნი ველისანი“.

ატყდა ცემა ბუკთა, საყვირთა და ზინზილაკთა.

სასახლიდან გამობრძანდა დედოფალი ნანა, და მის კვალდაკვალ — მეფე მირიან.

„და ნელად მოვიდოდა ერი და შეამკუნეს ყოველნი ფოლოცნი თვითოფერითა სამოსლებითა და ფურცლითა“.

მეფე-დედოფალი წინ მიუძღოდა ხალხს. პროცესია მთისკენ, არმაზ-ციხისკენ მიემართებოდა.

ნინოც მიჰყვებოდა.

„იგი ხედვიდა საკვირველებასა მიუწვდომელსა და ენითა გამოუთქმელსა“.

არმაზის მთაზე იდგა კერპი, თვითონ არმაზი, სპილენძის ბუმბერაზი, თავზე მუზარად-ჩაბა-ლახით, ტანზე ოქროს ჯაჭვ-საჭურვლით, ხელში ელვამკროთომელი მახვილით, სახით ზვიადი და მრისხანე, კუმტად შეკრულ წარბთა ქვეშე — ერთი თვალი ზურმუხტის ედგა, ხოლო მეორე — ბივრილიონის.

არმაზს ორის მხრიდან თითო მომცრო ქანდაკნი ედგა: მარჯვნივ — ოქროსი, სახელად გაც, ხოლო მარცხნივ — ვერცხლისა, სახელად გაიმ.

ხალხი შეუდგა ლოცვას და ზორვას კერპთა წინაშე...

დღე იყო შავლრუბლიანი და უნათლო.

შუადღე გადავიდა.

საკერპო მისტიერია ჯერ არ დასრულებულიყო, ზეცად ატყდა ჭექა-ქუხილი და წვიმაც დაუშვა კოკისპირულად. ელვას და ჭექას მალე საშინელი სეტყვაც მოჰყვა.

ხალხი მთიდან მოწყდა და დაბლობისაკენ დაეშვა.

მოსაღამოვდა. წვიმა ქარიშხლად იქცა. მთელი ღამე გრიგალი, ღვარნაფშვენი, ლეშხი, სეტყვის ხრიალი და ჭექა-გრუხუნის არყევდა ცასა და მიწას. როგორც იქნა, გათენებისას ჩადგა ქარიშხალი. ქვეყანა დაწყნარდა. ცამ პირი გა-

დაინმინდა.

ხალხი ალტაცებით შეხვდა მზის გამოჩენას.

მაგრამ მათი სათაყვანო კერპები უკვე აღარ იმზირებოდნენ არმაზის მთიდან. საშინელ ქარბორბალას, ნიაღვარსა და „ლიტრის სწორ“ სეტყვას კერპები დაელენნა, შეემუსრნა და ნამუსრევნი მათნი „მთაებნივან კლდეთა ნაპრალთა“.

„გამოვიდა მირიანმეფე და ყოველი იგი ერი, ეძიებდეს ღმერთთა მათთა და არა ჰპოებდეს, რომლისათვის დაეცა მათ შიში და ძრწოლა“.

ატყდა მითქმა-მოთქმა; ზოგი მართლა ძრწოლით და შიშით, ზოგიც გაბოროტებით — გაიძახდნენ, რომ ეს, სალოცავ-სათაყვანო კერპთა მსხვრევა დიდი ღვთის წყრომა და განუზომელი უბედურების მომტანი უნდა ყოფილიყო. ვინ რას გაიძახოდა ამ ღვთის წყრომის წყაროდ! ზოგი არმაზის დამანგრეველად ქალდეველთა ღმერთს, ითრუჯანს ასახელებდა.

იყვნენ ისეთებიც, რომლებიც მცხეთის კერპთა შემმუსვრელ ძალად იესო ქრისტეს ასახელებდნენ — ნაზარეველ ღვთაებრივ გმირს, თვით სასწაულმოქმედ ღვთაებას, კაცობრიობის ცოდვებისთვის ჯვარცმით ვნებულს და სისხლდათხეულს და მერე მკვდრეთით აღმდგარს და ზეცად ამალღებულს.

ეტყობოდა, მცხეთაში ბევრი უკვე კარგად იცნობდა ქრისტეს მოძღვრებას და შეფარვით კიდევ აღიარებდა მას.

მეზობელი სომხეთიდანაც მოდიოდა ნაირნაირად ნათქვამი. მათ შორის ერთ ასეთ სასწაულს ამბობდნენ: თურმე სომეხთა მეფე თრდატი „ქრისტეს ძალითა ეშუად ქმნილიყო, და ქრისტეს ძალითვე კუალად კაცად მოქცეულიყო“. ახლა კი მცხეთაში ბევრი იძახდა: ჩვენი კერპები სწორედ იმ ღმერთმა შემუსრა, რომელმაც კაცი ჯერ ღორად, მერე კი ის ღორი ისევ კაცად აქციაო.

ხოლო, სულ მალე დადგება დღე, როცა ხალხში ხმა გავარდება, დარწმუნებით და დაბეჯითე-

ბით: მცხეთა-არმაზის კერპთა შესამუსრავად ქრისტეს მოუხმო სწორედ ნინომ, კაპადოკიიდან მოვლენილმა უცხო ქალწულმა!..

იმ დღეს ნინო არმაზის მთაზე ავიდა და კერპთა ნამუსრევნი გულდასმით მოიხილა. მერე მთის ბოლოსკენ წავიდა და მივიდა იქ, სადაც აღმართული იყო მეფეთა საჩრდილობელი — ასწლოვანი აკაკის ჯიშის ხე, „შუენიერი, მაღალი და რტომრავალი“.

იმ ხეს მიადგა ნინო. დიდხანს ეწვალა და ზედ ნიში ამოჭრა ქრისტეს ჯვარცმის გამოხატულებით.

ექვსი დღე დადიოდა და ლოცულობდა მისგანვე ნაკვეთი ქმნილების წინაშე.

უკანასკნელ დღეს აქ მას, მუხლმოყრილსა და მხურვალედ მლოცველს, მოუსწრო სამეფო სახლეულთაგან რომელიღაც ქალმა, სახელად შროშანამ.

სეფექალმა ვინაობა ჰკითხა ნინოს.

ნინომ არ გაუმხილა თავისი წარმომავლობა და უბრალოდ უთხრა: მე ერთი უთვისტომო ტყვე ქალი ვარო. შროშანას შეებრა და შეუჩნდა — სასახლეში წამომყევით. ნინო უარზე დადგა.

კიდევ სამი დღე დარჩა ქრისტიანი ქალწული არმაზის ჯვარცმის წინაშე. მერე მთიდან დაეშვა, ხიდი გადმოიარა და სამეფო სასახლეს მიადგა.

აქ გამლილიყო მშვენიერი ნალკოტი, მრავალფერი ყვავილნარებით, ბუჩქნარებით, ხეებზე ახლართული ვაზებით.

ნალკოტის განაკიდურზე მებადის მცირე სახლაკი იდგა.

ნინო იმ სახლაკს მიადგა.

სახლიდან ქალი გამოვიდა, მებადის ცოლი, სახელად — ანასტო.

ანასტო დაატყვევა უცნობი ქალწულის საოცარმა სიმშვენიერემ და კდემამოსილებამ.

უძეო ცოლ-ქმარს უცხო ქალწული ღვიძლი შვილივით შეუყვარდა და შვილადვე შეიკედლა.

ცხრა თვე იცხოვრა ნინომ მათთან.

ნინო ანასტოსთან ერთად ბაღში დადიოდა, ყვავილებსა და ბა-

ლახებს კრეფდა, ხარშავდა, რა-
ღაც წამლებს ამზადებდა.

ანასტოსაც უსვამს ნინოს ნა-
ხარში წამალი და სასწაულსაც
აღარ დაუყოვნებია: მებაღის
ცოლს, მანამდე უძეოს, შვილი შე-
ეძინა.

ცადაფრენილი ცოლ-ქმარი ნი-
ნომ დაარწმუნა, რომ უძეობისგან
განკურნება და ყრმის დაბადება
ქრისტეს ნებით მოხდა. მებაღესა
და მის ცოლს ისლა დარჩენოდათ
სრული სინრფოებით მიეღოთ
ქრისტიანობა — „აღიარეს ქრის-
ტე და დაემონაფნეს ფარულად“.

მაღე ამის შემდეგ ნინო მახლო-
ბელ ბორცვზე ავიდა.

ბორცვი მაყვლის ეკალბარდს
მოეცვა.

და იმ დღესვე ნინომ ვაზის ნას-
ხლავ რქათაგან ჯვარი გამართა,
საკუთარი დალალიდან აკვეცილი
თმით შეკრა და ყველაზე მაღალი
მაყვლის ბუჩქის ქვეშ აღმართა.

ყოველ დღე-ღამე მოდიოდნენ
აქ ნინო და მებაღე ცოლ-ქმარი.

მოდიოდნენ და ლოცულობდ-
ნენ, ლიტანიობდნენ ამ პირველი
ვაზის ჯვრის წინაშე.

ხალხი მოდიოდა, შორიახლო
დგებოდა და გაშტერებით უც-
ქერდა უცხო რიტუალს.

დრო ვიდოდა. ნინო დაუცხრომ-
ლად იღვწოდა, ავადმყოფთ მკუ-
რნალობდა და განკურნებას ქრი-
სტეს ძალად და მადლად აცხად-
ებდა, და ასე — „ჰყოფდა კურნე-
ბათა და საკვირველებათა ძალი-
თა ქრისტესითა: მრავალნი განრ-
ღვეულნი განკურნა რეცა მიზე-
ზითა წამლისათა“.

ბევრი დაიმონაფა და გააქრის-
ტიანა.

მცხეთაში ახალი სჯული სწრა-
ფად ვრცელდებოდა.

მესამე წელი მიდიოდა ნინოს
მოსვლიდან.

მეფე მირიანი აქამდე მორჭმით
განაგებდა ქვეყანას. ჩრდილოე-
თიდან ჟამჟამად მოვარდნილ ხა-
ზართა და ალანთა ნიაღვარს ძლე-
ვამოსილად უკუაქცევდა. დიდი
ფარნავაზის საფლავს ძვირფასი
შესამკობლებით ამკობდა და მის
დიდ მამულიშვილურ საქმეებს

წარმატებით განასრულებდა.

ქართველ მეფეს დასავლეთის-
კენ ეჭირა თვალი, — ძველი ქარ-
თულ-პონტოური მიწების შემო-
ერთებაზე ოცნებობდა. პირველი
ცოლი რომ გარდაეცვალა, მეორე
ცოლად შეირთო პონტოელი მმარ-
თველის ასული, სახელად ნანა.

პონტოურ მემკვიდრეობაზე ხე-
ლის დადება რომის ხელისუფლე-
ბის გადამტერებას მოასწავებდა,
მაგრამ ამას იბერია-ქართლის მე-
ფე არც ერიდებოდა. იგი წინა აზი-
აში პირველობას სპარსელ მბრძა-
ნებლებთან ერთად ინაწილებდა.

მაგრამ მირიანის მეფობის შუა
ხანებში ერთბაშად მსოფლიო ნო-
ნასწორობის სასწორი ავისმა-
უნწყებლად შექანდა. რომის საიმ-
პერიო ტახტზე დიდი ხელმწიფე
დაბრძანდა. ეს იყო სწორედ კონ-
სტანტინე. მის გახელმწიფებას-
თან დაკავშირებით, აღმოსავ-
ლეთში ეს უცნაური ამბავი მოიჭ-
რა: 312 წლის 28 ოქტომბერს მდი-
ნარე ტიბრზე, მულვიუსის ხიდ-
თან, კონსტანტინე სამკვდრო-სა-
სიცოცხლოდ შეება საომარი ძა-
ლებით ოთხჯერ უძლიერეს მე-
ტოქეს, მაქსენსიუსს. და, ბრძო-
ლის წინ ღამეს კონსტანტინეს
ჯვარი გამოეცხადა, ზედწარწე-
რით: „ამით გაიმარჯვებ“ (ბერძნ.
„ტუტო ნიკა“); მეორე დღეს ბრძო-
ლად „ჯვაროსანი დროშით“ გავი-
და და მართლაც ბრწყინვალედ
გაიმარჯვა. გამოდის, კონსტან-
ტინე ქრისტემ აიყვანა ტახტზე!..
კონსტანტინეს დედა, დედოფალი
ელენე ხომ დიდი ხანია ქრისტი-
ანთა თავგამოდებული მფარველი
და ეკლესიათა დაუცხრომელი მა-
შენებელი.

მაღე კონსტანტინემ, როგორც
ითქვა, ახალი სატახტოც დააარ-
სა და ქრისტიანობაც სახელმწი-
ფო რელიგიად გამოაცხადა.

კონსტანტინე აღმოსავლური
პოლიტიკის თვალსაწიერიდან
ერთის წუთითაც არ უშვებდა ამაყ
ქართველთა ქვეყანას. იცოდა,
იქაურ ხელმწიფეს თვალი ქრის-
ტიანთა მოსისხლე სპარსეთისა-
კენ ეჭირა. ბოლოს და ბოლოს, მი-

რიანმა უარი ვეღარ შეჰბედა პირ-
ველი ქრისტიანი ხელმწიფის
მოთხოვნას და კონსტანტინოპო-
ლში მძევლად გაგზავნა თავისი ძე
— ბაქარი.

ქრისტე და ქრისტიანობა!

მაშ, სამასი წელიწადი გაისმის
ცისქვეშეთში ეს ღვთაებრივი იდ-
უმალებით აღსავსე სახელები.
რომის იმპერიის გარეთაც გაიდ-
გა ფესვები ღვთაებრივი გმირის
თავგადასავალმა. კავკასიის სა-
ნახებსაც დასაბამითვე შესდგო-
მია ევანგელური საგალობელი.
თვით მირიანის სამშობლოში სა-
მასი წელიწადი დადის ხმა შესახებ
იმისა, რომ ქრისტეს კვართი მა-
ინც და მაინც მცხეცის მინაში გა-
ნისვენებს...

მაშ, უკვე სამასი წელიწადი გა-
სულიყო ნინოს გამოცხადებიდან.
და დაბეჯითებით ამბობდნენ
მცხეთაში: ზეცით ფრინველნი
მოფრინავენ, მტკვარში ჩაეშვები-
ან, განიბანენ, განსპეტაკდებიან,
მერე სამეფო წალკოტში აფრინ-
დებიან, ვაზებს შეეფინებიან, ყუ-
რძენს მოესთვლებიან, კვლავ
ძირს დაეშვებიან, ყვავილებს დაჰ-
კორტნიან და... სტვენა-გალობით
ნინოს შემოესევიან, კალთასა და
უბეში ჩაუფრინდებიან...

ბევრი მიმდევარი გასჩენოდა
ქრისტიანობის მქადაგებელ ქალს.

მირიანიც, რაკი უკვე მასაც „აქ-
უნდა სურვილი ქრისტეს სჯული-
სა, არა დააბრკოლებდა ქადაგე-
ბად ნინოს და მონაფეთა მისთა“.

სამაგიეროდ, დედოფალი ნანა
გმობდა თურმე გულფიცხელად
ახალ მოძღვრებას და მის მოძღ-
ვარ ქალს.

მერე კიდევ ერთი სასწაულის ამ-
ბავი გავარდა მცხეთაში: ერთი
ვინმე ქვრივი ქალი ყოფილა, რო-
მელიც უშვერად აგინებდა ნინო-
საც და მისსათაყვანო ქრისტესაც.
ამ ქალს ერთადერთი ვაჟი ჰყო-
ლია, ჯერ უწვერული ყმანვილი,
რომელიც რაღაც მძიმე სენს შე-
უპყრია და სიკვდილის პირას მი-
უგდია. ზარდაცემული დედა
გრძობდადაკარგულ შვილს ქა-
ლაქში კარდაკარ დაატარებდა და
ყველას, სააქიმო საქმის მცოდნეს



და არმცოდნეს, შველას ევედრებოდა. ბოლოს, როცა ხსნა აღარსაიდან აღარ გამოჩნდა, სასონართმეული ქალი თავისი მომაკვდავი შვილით ნინოსთან მივიდა, მის წინ მუხლებზე დაეცა და სიკვდილისგან შვილის გამოხსნა სთხოვა.

ნინომ ავადმყოფი გასინჯა და თქვა — ამას ღმერთი ჩემი, ქრისტე განკურნავსო, და ყმანვილი რალაც ბენვიან საგებელზე დაანვინა, — საგებელზე, რომელზეც თვითონ ლოცულობდა და ავადმყოფებს კურნავდა. მერე მისდგა, უნამლა, ილოცა, შეულოცა და... „მასვე უამსა განიკურნა ყრმა იგი და განცოცხლებული მისცა დედასა მისსა“. ხოლო, სიხარულით შემლიღმა დედამ მაშინვე შესძახა:

„არა არს სხუა ღმერთი თვინიერ ქრისტესა, რომელსაც ქადაგებს ნინო“.

თქვა, ნინოს დაემონაფა და ისიც ქრისტეს სჯუს შეუდგა.

და, ბოლოს, სასწაული, რომელიც დაუკავშირდა უშუალოდ სამეფო სასახლეს: ლოგინად ჩავარდა დედოფალი ნანა. სენი აღმოჩნდა რალაც უცნაური და უმძიმესი, „რომლისა კურნება ვერავინ შეუძლო, რამეთუ ყოველთა ხელოვანთა მკურნალთა წარმოაცალიერნეს წამალნი მათნი და ვერ შეუძლეს კურნება მისი, ულონო იქმნეს და სასონარკვეთილ“.

რაკი სხვა რაიმე საშველი აღარ აღმოჩნდა, დედოფალს მოახსენეს „იმ ტყვე-ქალის“ შესახებ, რომელსაც თვითონ დედოფალი ავინებდა და დასცინოდა. ნინომ ხომ ყველა განკურნა თავისი სასწაულმოქმედი ლოცვა-კურთხევით და შენც დაგიბრუნებს ტანის სიმრთელესო, არწმუნებდნენ დედოფალს. ბოლოს ნანაც დათანხმდა და მსახურნი წარგზავნა ნინოს მოსაყვანად.

ნინო ისევ იმ მაყვლის ბურქთან იპოვნეს, ვაზის ჯვრის წინაშე მლოცველი და მუხლმოყრილი. კარისკაცებმა დედოფლის ავადმყოფობის ამბავი აცნობეს და დედოფლისავე ბრძანებით სასახლეში გამოცხადება მოსთხოვეს.

ნინომ მშვიდად უპასუხა: ბრძა-

ნებით ჩემი აქედან გასვლა არ შეიძლებაო და თვითონ დედოფალი მოვიდესო აქ, „საყოფელსა ამას ჩემსა“.

ნანა დედოფალსაც ისლა დარჩენოდა, ტყვე-ქალის ნება შეესრულებინა. და ტახტრევანზე მწოლარე დედოფალი, უფლისწულ რევისა და დიდძალი ამაღის თანხლებით, ეახლა ნინოს იმ ჯვარსასვენებელ მაღლობზე.

ნინომ დედოფალი ნანა იმ „საკურნებელსაგებელზე“ დაანვინა, დიდხანს ულოცა, მერე ჯვარი აიღო და ავადმყოფს ჯვარსახედ გარდასახა: „შეახო თავსა, ფერხთა და მხართა ჯუარის სახედ“.

და ისევ მოხდა სასწაული: დედოფალი ნანა „მეყსეულად განიკურნა და აღდგა განცოცხლებული“.

და ახლა ქართლის დედოფალმა ბრძანა სიტყვა დიდძალოვანი:

„არა არს სხუა ღმერთი, თვინიერ ქრისტესა, რომელსაც ქადაგებს ტყუე ესე დედაკაცი“.

თქვა და თვითონაც მაშინვე მიიღო ქრისტიანობა, დაემონაფა ნინოს და სხვებსაც მოუწოდა, შესდგომოდნენ სასწაულმოქმედი ღვთაების გზას.

მეფე მირიანი კი დიდის გულმოდგინებით გამოჰკითხავდა მეუღლე-დედოფალსა და მის მხლებლებს ქრისტეს ამ ახალი სასწაულის ამბავს. იგი უკვე „დაეპყრო“ ქრისტიანულ მოძღვრებას. კითხულობდა ძველთაძველ სჯულ-კანონებს, ძველალმოსავლურ და იუდაისტურ საღვთისმეტყველო წიგნებს, გულმოდგინედ უსმენდა, სწავლობდა, ჩხრეკდა და სინჯავდა ქრისტიანობასთან დაკავშირებულ ყოველ თქმულებას და გადმოცემას. და ბოლოს და ბოლოს, საქმე იქამდე მივიდა, რომ — მეფესაც „შეექმნა სურვილი ქრისტეს სჯულისა“.

ამას დაერთო კიდევ ნინოსგან, ასევე „ქრისტეს ნებით“, განკურნება მეფის უახლოესი ნათესავისა და თავგამოდებული კერპთაყვანისმცემელი მოგვისა.

ბოლოს, პირველი ქრისტიანული დრამის უკანასკნელი აქტიც

გათამაშდა.

ერთ შაბათ დღეს, შუა ივლისში, მეფე მირიანი ახლო ნათესავთა და კარისკაცთა თანხლებით სანადიროდ ნაბრძანდა მუხრანის ველზე. იგი ფრიად ჩაფიქრებული იჯდა ცხენზე. მისი გონება რალაც მძიმე საზრუნავსა და საჭმუნავს დაეტვირთა. ერთგან მეფემ ცხენი შეაყენა და ამაღას მდუმარედ მიუბრუნდა. მერე იმათგან ოთხი უახლოსი და უერთგულესი კარისკაცი გაიხმო და მათთან ერთად განაპირდა. და უთხრა მეფემ იმ ერთგულ ოთხეულს: დიდი შეცდომა და შეცოდება ჩავიდინეთ, რომ გრძნულ და მაცდურ ქრისტიანებს ჩვენს ქვეყანაში ლაგამი ავჰყარეთ და მათს ნებაზე საპარპაშოდ მივუშვით; ახიც იქნება, ამისთვის ჩვენმა ღმერთებმა დაგვსაჯონ; ახლა მე გადავწყვიტე, ყველა ქრისტიანი და ქრისტეს ჯვრის მიმდევარი ამოვწყვიტო და ისევ ქართლის ძველ-მპყრობელ ღმერთებს შევუდგეთო; მე ამას ჩემს მეუღლესა და თანამეცხედრეს, დედოფალ ნანასაც ვუბრძანებ და მოვთხოვ, დაუტეოს და განიშოროს ქრისტიანობა, ხოლო უკეთუ არ შეისმენს, სხვებთან ერთად იმასაც სიკვდილს შევეყრიო.

ეს თქვა მეფემ და ოთხივე კარისკაცს ფიცი ჩამოართვა ამ დიდ განზრახვაში თანადგომა-თანაბრძოლისათვის.

მერე გზა განაგრძეს და ნადირობად მოედგნენ მთასა და ბარს.

მუხნარის სანახები მოილიეს და თხოთის მთაზე ავიდნენ. იქიდან მეფემ კარგა ხანს ათვალიერა კასპისა და უფლისციხის მიმოსახედნი.

სამხრობის დრო რომ დადგა, უცებჩამობნელდა. მზე თითქოს ჩაქრა, დღე გაიცრიცა, ნყვდიადი ჩამოდგა.

მეფე შეძრწუნდა. მთიდან დაემშვა. ციცაბოებსა და უსიერ ტყე-მალნარებში გზას ძლივს იგნებდა ზარდაცემული და გაოგნებული. მოდიოდა და საშველად მოუწოდებდა ქართლის ძველ ღმერთებს — არმაზს და ზადენს, გაცსა და



გაიმს. მაგრამ საშველი მაინც არა და არ ჩანდა. ასე, რომ ძველმა ღმერთებმა სულ დაჰკარგეს მეფის თვალში ყოველგვარი პატივისცემა და აღიარება.

„მშობლიურ ღმერთთაგან“ მიტოვებულ მირიან მეფეს ისლა დარჩენოდა, შევედრებოდა ნინოს სათაყვანო ღმერთს, მის ჯვარსა და ჯვარცმას. ოღონდ შენ მიხსენ, ნინოს ღმერთო, ეს ბნელი გამინათე, გზა-კვალი მაჩვენე და სამაგიეროდ შენს სახელსაც ვალიარებ, ჯვარსაც აღვმართავ, თავვანსაც ვცემ, ჩემთვის საქრისტიანო სალოცავ სახლსაც ავიშენებ და მუდამ ნინოს სჯულის მორჩილი და მოთაყვანე ვიქნებიო — იძახდა მეფე.

და აი, წყვილიად ნელ-ნელა შეუდგა ნათელიერი; ცამ ისევ გადინწინდა, მზე ისევ გამობრწყინდა და კვლავ დღის სულმა დაიპყრო ქვეყანა. და მირიანსაც უტყუარი მტკიცება მიეცა ქრისტეს სასწაულისა — აკი სწორედ მაშინ გაირღვა ბნელი და იქმნა ნათელი, როცა იგი ქრისტეს ევედრებოდა!..

მეფე ცხენიდან გარდახდა, ხელები აღმოსავლეთისკენ აირთხა და შეჰღალადა:

„შენ ხარ ღმერთი ყოველთა ზედა ღმერთთა და უფალი ყოველთა ზედა უფალთა, ღმერთი რომელსა ნინო იტყვის; და საქებელ არს სახელი შენი ყოვლისა დაბადებულისაგან, ცასა ქუეშე და ქუეყანასა ზედა. რამეთუ მიხსენ მეჭირისაგან და გამინათლე ბნელი ჩემი. აჰა, ესერა, მიცნობიეს, რამეთუ გინდა ხსნა ჩემი, ლხინება და მიახლება შენდა, უფალო კურ-

თხეულო. ამას ადგილსა აღვმართო ძელი ჯუარისა, რომლისა იდიდებოდის სახელი შენი და ისენიებოდის საქმე ესე სასწაული უკუნისამდე“.

და მოინიშნა მეფემ ის ადგილი, მოინიშნა და წამოვიდა. დაბნეულმა და გაფანტულმა ამალამაც მოიყარა თავი მეფესთან. მირიანი ახლა მათ მიუბრუნდა და უბრძანა:

„მიეცით ღმერთსა ნინოსსა დიდება, რამეთუ იგი არს საუკუნითგან ღმერთი და მას მხოლოსა შუენის დიდება უკუნისამდე“.

სალამო ჟამს ღართის კართან ნანა დედოფალი და სრულიად მცხეთის მოსახლეობა შემოეგება მეფეს.

მხოლოდ ერთი არ მოსულა მის შესახვედრად.

და ეს ერთადერთი ისევ იყო ნინო, რომელიც იმჟამად მწუხრის ლოცვას აღავლენდა მაყვლოვანში აღმართული ვაზის ჯვრის წინაშე.

მირიანმა ხალხს თვალი მოაგვლო და შესძახა:

„სადა არს დედაკაცი იგი უცხო, რომელ არს დედა ჩემი და ღმერთი მისი — მხსნელი ჩემი?!“

„მაყულოვანსა არს და ილოცავს“, — იყო პასუხი.

მაშინ მირიანმა მცხეთა სასწრაფოდ გაიარა და მთელი სამეფო სახლეულით, ხალხით და ლაშქრით, ნინოს ეახლა. მისვლისთანავე დაქვეითდა, მლოცველი ქალწულის წინაშე მოწინებით წარსდგა და თვალცრემლიანმა შეჰღალადა:

„ან ღირს ვარ სახელის-დებად სახელსა ღმრთისა შენისასა და

მხსნელისა ჩემისასა“.

შემოეგება ნინო მეფეს, აღმოსავლეთისაკენ პირი აქნევინა, მუხლებზე დააჩოქა, ჯვრით ჯვარი გარდასახა და აღსარებას შეუყენა.

ხელმწიფის მოქცევას სამარისებური მდუმარებით უცქერდა ხალხი.

ტიროდა მეფე, ტიროდა დედოფალი, ტიროდა ერი.

ეს იყო ტირილი რელიგიური აღტკინებისა და სარწმუნოებრივი გარდასახვისა.


ის ღამეც გასრულდა და დილის დადგომისთანავე მირიან მეფემ მოციქულები აფრინა კონსტანტინოპოლს. იგი იმპერატორ კონსტანტინეს სწერდა ქართლში მომხდარ ქრისტესმეორე სასწაულთა ამბებს და სასწრაფოდ მღვდლებს სთხოვდა სრულიად ქართლის მოსანათლავად. მავეს სწერდა ნანა დედოფალი კონსტანტინეს დედას, ელენე დედოფალს.

სანამ კონსტანტინოპოლიდან მღვდლები ჩამოვიდოდნენ, მირიანმა ნინო მოიხმო და უთხრა, ძალიან მეჩქარება ქრისტეს სახლი ავაშენო და მითხარი, სად ავაშენო. ნინომაც მაშინვე უპასუხა:

„სადაცა მეფეთა გონება მტკიცე არს“.

ამაზე მირიანმა თქვა: მე ის მაყვლიანი შემეყვარდა, სადაც შენი ვაზის ჯვარი დგას და ქრისტეს სახლსაც იქ ავაშენებდი, მაგრამ ახლა ასე გადამინყვეტია, არ მოვერიდო არცა ჩემს სამეფო წალკოტს, არცა მის ნაძვთა სიმაღლეს, არცა ვაზთა ნაყოფიერებას, თუ ყვავილთა სურნელებას და ქრისტეს ტაძარი სწორედ ამ წალკოტში უნდა ავაშენო, რადგან ის ციური ფრინველნი, მტკვარში განწმენდა-განსპეტაკების შემდეგ, სწორედ ამ წალკოტში მოფრინავენ და გალობით შენს კალთაში სხდებიანო.

თქვა და სასწრაფოდ შეუდგა ტაძრის მშენებლობას. სამენ მასალად სამეფო ბაღის ხე-ტყეც კმაროდა. უკვე კედლებიც ამოიყვანეს და იქვე მოჭრილ ნაძვთაგან სვეტებიც გამოაკოპიტეს. სულ





შვიდი სვეტის დამზადება იყო ათ-ვლილი. ექვსი კიდეც აღმართეს და მეშვიდეს, მთავარ დედასვეტს, ვერაფერი ვერ მოუხერხეს — მთელი დღე აწვალეს, ვერ აღმართეს და ვერ დააფუძნეს დანიშნულ ადგილზე. დაღამდა, გათენდა და აი, ხალხმა ისევ იხილა ახალი სასწაული: ეკლესიის მთავარი სვეტი უკვე იდგა თავის საფუძნებელზე. მაშინვე ხმაც გავრცელდა, რომ ეს საქმეც ნინოს მთელი ღამის ლოცვა-ვედრებამ, ჯვარსახვამ, ლიტანიამ და ცრემლთა თხევამ განასრულა, — რომ სწორედ ნინოს მოწოდებაზე ღამით მოიჭრა ვინმე ქაბუკი, „ყოვლად ნათლითა შემოკბილი, შებლარდნილი ცეცხლის ზენრითა“, რომელმაც ხელი ჰყო და აღმართა მთავარი სვეტი ეკლესიისა.

იმ დღიდან ნინომ ამ „ღვთაებრივ სვეტთან“ ახალ-ახალი სასწაულები მოახდინა. აქ, ამ „სუეტი — ცხოველის“ შეხებითა და ხილვით, მრავალი სნეული და სხეულგანრღვეული განკურნა და გაამთელა...

იმპერატორი კონსტანტინე და დედოფალი ელენე დიდი სიხარულით შეხვდნენ ქართველთა მოქცევას. ელენე უფრო იმით აღტაცებულა, რომ ქრისტეს სჯული ახალ დიდ ქვეყანას მოეფინებოდა, ხოლო კონსტანტინე იმის გამო იხარებდა, რომ იბერია ამიერიდან შეიქმნებოდა მოკავშირე ბიზანტიისა და მტერი სპერსეთისა.

და კონსტანტინოპოლიდან მცხეთაში ჩამოვიდა ეპისკოპოსი იოანე, ორი მღვდლისა და სამი დიაკონის თანხლებით. ჩამოვიდნენ და თან ჩამოიტანეს ლოცვა-კურთხევის, ძმობისა და დობის წერილები იმპერატორისგან და მისი დედისგან. ძღვნად ჩამოიტანეს მრავალი ძვირფასი ნივთი, მათ შორის დიდებული ჯვარი და ხატი იესო მაცხოვრისა, და კიდეც — სამსჭვალნი, რომლითაც იყო ჯვარზე გალურსმული თვითონ იესო.

მირიან მეფემ დიდის სიხარულით მიიღო სტუმრები. მას უკან სასწრაფოდ მოინვია ერისთავნი

და სპასალარნი მცხეთას.

და დაიწყო „მოქცევაი ქართლისაი“.

მირიან მეფე მონათლა ნინომ. მეფის სახლელი — დედოფალი ნანა და უფლისწულნი — მონათლეს კონსტანტინეპოლელმა ეპისკოპოსმა და მღვდლებმა. აკურთხეს მტკვარი.

იოანე ეპისკოპოსმა ქართველი მთავარნი და წარჩინებულნი მონათლა საგანგებოდ შერჩეულ ადგილზე, მოგვეთის ხიდის კართან, სადაც მონიშნული იყო ელიოზ მცხეთელის საცხოვრისი. და ამიერიდან ამ ადგილს დაერქვა მთავართა სანათლო. ხოლო, ცოტა ქვემოთ, მტკვრის პირას, ორ ალაგას, ინათლებოდა ხალხი.

მაშ, მცხეთა მონათლა. ქართლის შიდა დასახლებანიც მონათლა.

გაჩაღდა ეკლესია და ტაძართა მშენებლობა.

მაგრამ ბევრი ქართველთაგანი მტრულად შეხვედრია ახალი მოძღვრების შემოტანას. ნათილებზე უარი უთქვამს მირიანის სიძეს, ფეროზს, რანის ერისთავს. არც მისი საერისთაო აპირებდა ქრისტეს აღიარებას.

ქრისტიანობაზე უარი სთქვეს მთიელმა ქართველებმა.

მეფემ ნინო და იოანე იხმო და უთხრა: გადავწყვიტე მახვილის ძალით ვათაყვანო ქრისტეს მთიულეთი და ჩემი სიძე ფეროზიო. ამაზე ნინომ და იოანემ უპასუხეს:

„არა ბრძანებულ არს უფლისაგან მახვილისა აღება, არამედ სახარებითა და ჯუარითა პატიოსანითა უჩუენოთ გზა ჭეშმარიტი“.

მეფე დათანხმდა და მთიულეთისკენ „სახარებითა და ჯუარითა პატიოსანითა“ დაიძრნენ წმიდა ნინო და იოანე ეპისკოპოსი.

მაგრამ მირიანს მღვდელთა, ბერთა და მონაზონთა ლაშქრისთვის სამხედრო ლაშქარიც გაუყოლებია ერისთავის სარდლობით.

მივიდნენ მთიულეთს. დაიწყეს ქადაგება ქრისტეს მოძღვრებისა და მოუწოდეს ხალხს ნათლისღებად. მაგრამ აქაური ქართველო-

ბა კვლავ უარზე დადგა. აგრე არ უნდაო და „მაშინ ერისთავმან მეფისამან მცირედ წარმართა მახვილი მათ ზედა, და ძლევიტ შემუსრნა კერპნი მათნი“.

ნინოს „გამოცხადებიდან“ იდგა მეთოთხმეტე წელიწადი მთიულეთში ნათლობა და მლოცველობა დასრულებულიყო. ნინო თავისი ქრისტიანული ამალით რანისაკენ მიეშურებოდა, რანთა და მათი ერისთავის, მირიანის სიძის მოსანათლავად.

კუხეთის გავლით მიდიოდნენ. გზაზე, ბოდბეში, მოულოდნელად ნინო ავად გახდა.

მის სანახავად უჯარმიდან სასწრაფოდ მოვიდნენ უფლისწული რევი და მისი ცოლი სალომე.

სასწრაფოდ აცნობეს მცხეთას. მირიანმა აფრინა ეპისკოპოსი იოანე.

და ევედრა იოანე ნინოს მეფე-დედოფლის სახელით, დაუყოვნებლივ გაჰყოლოდა მცხეთაში.

ნინო უარზე დადგა.

მაშინ მცხეთიდან ეახლნენ თვითონ მეფე-დედოფალი, მირიანი და ნანა.

ნინომ კვლავ მტკიცე უარი თქვა იქიდან წასვლაზე და რაიმე მკურნალობის მიღებაზე.

„რამეთუ ესერა მოსრულ არს სული ჩემი ხორხად ჩემდა და მეძინების მე ძილითა დედისა ჩემისათა საუკუნოდ“.

ეს მისი უკანასკნელი სიტყვა იყო.

მისივე უკანასკნელი, ურყევი ნებით, დაკრძალეს იქვე, ბოდბეში — ადგილსა უჩინოსა და „შეურაცხსა“.

ასე აღესრულა წმიდა ნინო, განგებით მოვლენილი ქალწული, ქართველთა განმანათლებელი, მოციქულთა სწორი.

საქართველო ახალი საისტორიო სამანიდან იწყებდა ცხოვრებას — ახალი, ზნემაღალი სარწმუნოებითა და კულტურით.

ამიერიდან კიდეც უფრო განემტკიცა „ერთარსება ქართულობისა“:

ერთიანი რწმენა, ერთიანი ენა, ერთიანი მამული.



ანთიმოზ ივარიელი

სამშობლოდან მწარე და ბოროტი ბედისწერის წყალობით გადაკარგული, უცხო ხალხის ეროვნული ისტორიის მჭედელი, განმანათლებელი, სულიერი და სარწმუნოებრივი მოძღვარი, რეფორმატორი, ვახტანგ მეექვსის საყვარელი ადამიანი, „თანამესტამბე“, სვეგამწარებული სამშობლოს სულიერი აღზევებისათვის ბრძოლაში დაღუპული ქართველი — ეს იყო ანთიმოზ ივარიელი.

დაიბადა დასავლეთ საქართველოში, 1650 წელს. ყრმობის სახელი — ანდრია. მამა — ივანე (ან იონა). დედა — მარიამი. გვარი — დღემდე არავინ იცის.

საბედისწერო გამოდგა მისთვის 1716 წელი. თექვსმეტი წლის ბიჭი თურქებმა მოიტაცეს. ჰყიდნენ სტამბოლში, მონათა ბაზარზე. ბიჭი იყიდა იერუსალიმის პატრიარქმა დოსითეოსმა.

იერუსალიმის საპატრიარქო მაშინ სტამბოლში იყო და ოცდასამი წელიწადი აქვე დარჩა ანდრია.

ალბათ, იმჟამად დაერქვა ახალი სახელი — ანთიმოზ. იგი უთარგმნიდა საქართველოს კათალიკოსის წერილებს იერუსალიმის პატრიარქს და უდგენდა საპასუხო ეპისტოლეებს ქართულ ენაზე, საქართველოში გამოსაგზავნად.

საოცარი ნიჭიერება და მისწრაფება გამოაჩინდა სწავლა-განათლებისადმი, ბრწყინვალედ შეისწავლა საღვთისმეტყველო და საერო ლიტერატურა, ფილოსოფია, რიტორიკა და ხელოვნების დარგები. სრულად დაეუფლა ბერძნულ, არაბულ და თურქულ ენებს. იშვიათი უნარი ჰქონდა ძერწვისა, ქვაზე და ხეზე მკვეთელობისა, ოქრომჭედლობისა, მხატვრობისა, კალიგრაფიისა, ხუროთმოძღვრებისა, სასტამბო ხელოვნებისა.

1690 წელს ვალახეთის მთავარმა კონსტანტინე ბრინკოვიანუმ, რუმინეთის დიდმა კულტურულმა რეფორმატორმა, წაიყვანა ანთიმოზი სტამბოლიდან ბუქარესტში. წაიყვანა, რამეთუ მისი ხალხისა და ქვეყნისათვის მოხმარა ამ საოცარი ქართველი კაცის მრავალმხრივი განათლება და ოსტატობა.


ვალახეთში ანთიმოზი მალე დაეუფლა რუმინულ და საეკლესიო სლავურ ენებს.

1691 წელს ანთიმოზ ივარიელმა ბუქარესტში დააარსა სტამბა და იმავე წელსვე დაბეჭდა პირველი წიგნი, გადმოთარგმნილი ძველბერძნულიდან ახალ ბერძნულ ენაზე — „შეგონებანი ბასილი მაკედონელისა თავისი ძის ლეონისადმი“. ამას მოჰყვა „ბერძნულ-რუმინული ლიტურგია“ და „ფსალმუნი“. ყოველი წიგნი განყოფილი იყო დიდი ოსტატობით, მაღალი გემოვნების სამკაულებით, გრაფიურებით, თვითონ ანთიმოზის ნახელავებით.

1694 წელს ანთიმოზი გადავიდა სნაგოვს, ბუქარესტიდან ოცდახუთმეტ კილომეტრზე. აქ ტაზზე და კუნძულზე ნახევრად დანგრეული და დაზინყებული მონასტერი იყო. ანთიმოზი (ასე ეძახდნენ მას რუმინეთში) მონასტერი აღადგინა და იქვე დააარსა ახალი სტამბა.

სულ მალე სნაგოვი ქვეყნის დიდი კულტურული შუაგული შეიქმნა. აქ იბეჭდებოდა წიგნები ბერძნულ, რუმინულ და არაბულ ენებზე. სტამბის გვერდით **ანთიმოზმა ტოპოგრაფიული სკოლაც გახსნა**. სასულიერო სამსახურიც მას ებარა, ვითარცა სნაგოვის მონასტრის ილუმენს.

მაგრამ ანთიმოზსაც მალე აედევნა მარადიული მტერი მაღალგონიერი კაცისა და მოღვაწისა — შური!.. არავინ იცის, როგორ და რანაირად, მაგრამ მოახერხეს კი მის მიმართ მეუფის გულისწყრომის გამოწვევა და ანთიმოზი იძულებული გახდა, სნაგოვი დაეტოვებინა. იგი ასეთ წერილს სწერს



კონსტანტინე ბრინკოვიანუს: „...სნაგოვის მონასტერიც ძალით არ ჩამიგდია მე ხელში. ეს შვიდი წელიწადი, როცა მე იქ ვმუშაობდი, ბევრი რამ სასიკეთო გამიკეთებია ჩვენს სავანეთა საკეთილდღეოდ (გამიკეთებია არა სახლის რაიმე შემოსავლებით, არამედ ჩემი სახიდანვე ჩამოქცეული ოფლით. ჩემს შესახებ ჩემი საქმენი მეტყველებენ). და თუმცა თქვენს უდიდებულესობას არ სურდა იქიდან ჩემი წამოსვლა, მაგრამ დარჩენაც არასგზით აღარ შემეძლო, ხოლო ვისაც ეს სურდა, დაე, ღმერთის წინაშე აგოს პასუხი. მიუხედავად ყოველივე ამისა, მე იქიდან წამოველსუფთა პატიოსნებით, თუმცა არავის მადლობა არ უთქვამს ყოველივე იმისათვის, რაიც მე გავაკეთე და დავამატე ჩვენი სავანის დიდებამოსილებისათვის. მე არაფერი არ გამიფუჭებია და, ღმერთი ჰხედავს, არც ვალეები არ დამიტოვებია“.

ბრინკოვიანუ მალე მიხვდა, რომ ანთიმოზ ივარიელისადმი მისი გულისწყრომა უსაფუძვლო იყო.

1705 წელს ანთიმოზი განაწესეს რიმნიკის ეპისკოპოსად.



ჩასვლისთანავე რომინკოში სტამბა გახსნა ივერიელმა.

მანამდე რუმინეთში საეკლესიო სამსახური ან სლავურ ენაზე წარმოებდა, ან ბერძნულ ენაზე. და აი, ანთიმოზ ქართველი გახლდათ პირველი, რომელმაც გადაწყვიტა წირვა-ლოცვა და სასულიერო თუ საერო წიგნის კითხვა ხალხისთვის მშობლიურ რუმინულ ენაზე შემოეღო. ამისთვის უპირველესად ყოვლისა საჭირო იყო წიგნებით თარგმნა და ბეჭდვა რუმინულ ენაზე. და ყველაფერი ეს გააკეთა ისევ ანთიმოზ ივერიელმა: შექმნა სტამბა რუმინულ ენაზე, თარგმნა და ბეჭდა რუმინულ ენაზე, დაიწყო სასულიერო-საეკლესიო სამსახური რუმინულ ენაზე.

ეს სწორედ რომ დიდი კულტურულ-ეროვნული რეფორმა იყო.

1708 წელს ანთიმოზ ივერიელი შეიქნა სრულიად ვლახეთ-რუმინეთის ეკლესიის უმაღლესი საჭეთმპყრობელი — მიტროპოლიტი.

მიტროპოლიტად კურთხევის დღეს ანთიმოზ ივერიელმა წარმოთქვა ბრწყინვალე სიტყვა რუმინულ ენაზე.

ანთიმოზი წამდვილი სასულიერო მამა შეიქნა რუმინელი ხალხისა.

ყველაზე მძაფრად თურქული მბრძანებლობის სიმწარეს განიცდიდა თურქთაგან მოტაცებული და თურქთაგან გაყიდული კაცი. ორივე სამშობლო — საქართველოც და რუმინეთიც — ერთნაირი უღლის ქვეშ ეგულებოდა დიდ მამულიშვილს, ამიტომ რუმინეთის გათავისუფლებისათვის ბრძოლა საქართველოსთვის ბრძოლის წყურვილს ურწყულებდა და საქართველოდან გადაკარგულ კაცს.

პატარა რუმინეთს დიდ თურქეთთან ბრძოლა ძალიან უნდა გასჭირვებოდა. ამიტომ ანთიმოზ ივერიელი „ერთმორწმუნე რუსეთთან“ და მის ხელმწიფე პეტრე პირველთან კავშირს მოუწოდებდა რუმინეთის სახელმწიფო მესვეურებს.

1711 წელს, თურქეთსა და რუსეთს შორის ატეხილ ომში,

პრუტზე გამართული ბრძოლის დროს, ანთიმოზ ივერიელმა აიძულა რუმინელი სარდალი თომა კუზინო, თავისი ჯარით რუსთა მხარეზე გადასულიყო.

ამან განარისხა კონსტანტინე ბრინკოვიანუ, რომელსაც ამ ომში თურქთა მხარე ეჭირა. ისევ ისარგებლეს მოშურნე ლაყეთა-ვიანებმა და შეუჩნდნენ ბრინკოვიანუს, მოიშორე თავიდან „ეგუცხოელი“.

1712 წელს ანთიმოზს ბრინკოვიანუმ კაცი გაუგზავნა და მიტროპოლიტობიდან თავისი ნებით გადადგომა ურჩია. ყველაზე მძიმე ბრალდებად ანთიმოზს წაყენებული ჰქონდა „მთავრის ინტერესთა ღალატი“ და „უცხოური წარმომავლობა“.

ანთიმოზმა ორჯერ გაუგზავნა წერილი ბრინკოვიანუს. პირველი ბრალდების უსაფუძვლობა ადვილად დაასაბუთა, მეორეს კი რას მოუხერხებდა — აკი მართლა უცხოელი იყო!

და თვითონვე ითხოვა მიტროპოლიტობიდან გადადგომა.

კონსტანტინე ბრინკოვიანუ ისევ მიხვდა თავის უსამართლო განჩინებას და ისევ აიღო ხელი ივერიელის „დევნაზე“.

თურქებმა ზედიზედ სიკვდილით დასაჯეს კონსტანტინე ბრინკოვიანუ და სტეფან კანტაკუზინო და მათ ნაცვლად მთავრად დანიშნეს მავროკორდატი, თურქთა ყურმოჭრილი მონა და რუსეთის დიდი მოძულე.

ეს დიდი უბედურება უნდა ყოფილიყო, უპირველესად ყოვლისა, ანთიმოზ ივერიელისათვის.

მას ჟამსვე ატყდა ომი თურქეთსა და ავსტრიას შორის. რუმინეთის მიტროპოლიტი, ანთიმ ივერიელი, თურქეთის მტრად დარჩა. მავროკორდატი უწყალოდ გაუსწორდა ანტითურქული მოძრაობის მეთაურებს. მისი ბრძანებით ანთიმ ივერიელი, ვითარცა „რევოლუციონერი და მოაჯანყე“, გადაყენებული იქნა მიტროპოლიტის ტახტიდან და მიესაჯა სამუდამო გადასახლება სინას ნახევარკუნძულზე, წმიდა ეკატერინეს მონასტერში.

მიტროპოლიტის მიტრა მოჰხადეს და მისთვის ყველაზე საძულველი თავსარქმელი — თურქული წითელი ფესი დააკოსეს. ბორკილები დაადეს, საბარგულზე დაადეს და იანიჩარებით გარშემოტყემული სამხრეთისაკენ გაუყენეს.

მაგრამ გადასახლების ადგილამდე მიყვანით არ შეუწუხებიათ თავი. ანდრიაპოლს რომ მიუახლოვდნენ, ანდრია ქართველი (მას უკვე აღარ ეძახდნენ ანთიმოზს) თურქმა იანიჩარებმა ხმლებით დაჩეხეს და მდინარე დაუჩიამი ჩაყარეს.

ეს მოხდა 1716 წლის 12 სექტემბერს.

რუმინელ ხალხს უყვარს ანთიმოზი. პატივისცემით იხსენიებს მას და მის სახელზე არა მარტო ქუჩა, ტაძარი და მუზეუმი, სახელმწიფო მუზეუმშიც აქვს ცალკე კუთხე, ანთიმოზის სურათი გამოაქვთ დემოსტრაციებზე თავიანთი ბელადების სურათებთან ერთად. განსაკუთრებით დიდია ჩვენთვის ანთიმოზ ივერიელის დახმარება თბილისში ქართული სტამბის მოწყობის საქმეში. ქართველთა მეფემ ვახტანგ VI დახმარება სთხოვა იერუსალიმის პატრიარქს სტამბის მოწყობისათვის. იერუსალიმის პატრიარქმა ქრიზანტ ნატარასმა ქართველთა მეფის თხოვნა გადაუგზავნა რუმინეთში ანთიმოზ ივერიელს. ანთიმოზმა რუმინეთის მმართველის — კონსტანტინე ბრანკოვიანუსგან მიიღო რა ნებართვა, რომ დახმარებოდა ვახტანგ VI-ს, მაშინვე გამოგზავნა თბილისში თავისი საუკეთესო მესტამბე მისი იმტვანოვიჩი. 1708 წელს დაიწყო მუშაობა თბილისში. 1709 წლის 20 იანვარს დაბეჭდეს I ქართული წიგნი „სახარება“. ორი ცალი „სახარებისა“ გაგზავნეს რუმინეთში ანთიმოზ ივერიელთან. ამ ეგზემპლარებს დართული ჰქონდათ ქების ლექსი 13 სტროფი, 16-მარცვლიანი შაირით დაწერილი, სადაც მოთხრობილია თბილისის სტამბის მოწყობის შესახებ, რა დახმარება გაუწია ვახტანგ VI-ს რუმინეთის მთავარმა კონსტან-



ტინე ბრანკოვიანუმ და პატრიარქმა ქრიზანტ ნატარასმა.

ანთიმოზ ივერიელმა თბილისიდან მიღებული „სახარება“ ჩასვა ლამაზ ყდაში, გაუკეთა წარწერა და გაუგზავნა კ. ბრანკოვიანუს. ანთიმოზი წერდა მთავარს, რომ მისი დახმარებით ისე როგორც არაბეთში, ელადაში, უნგროვლახეთში და ა.შ. როგორც სამოთხიდან მომდინარეობს მდინარეები: ფისონი, გეონი, ტიგროსი და ეფრატი, ასევე თქვენი დახმარებით ამ ოთხ ქვეყანაში აყვავდა სტამბური სიტყვა, რომელსაც მოჰქონდა სარგებლობა ამ ქვეყნებისათვის და ამიტომაც თქვენი სახელი იცოცხლებს საუკუნეებში. უაღრესად შენი ერთგული და მუდამ შენზე მლოცველი ან-

თიმ მიტროპოლიტი უნგროვლახეთისა.

1709 წელს თბილისში დაიბეჭდა „სახარება“, „სამოციქულო“ და „დავითნი“; 1712 წელს კი — „ვეფხისტყაოსანი“, რომლის რედაქტორი იყო ხელმწიფის კარის დეკანოზის შვილი მიქაელი.

შესაძლოა, სწორედ ეს მიქაელი უნდა იყოს იმ ქების ლექსის ავტორი, რომელიც რუმინეთში გაგზავნილ „სახარების“ ცალზე იყო დაბეჭდილი. თბილისში დაბეჭდილ ქართულ წიგნებს ბოლოს დართული აქვთ ანდერძები ვახტანგ მეექვსისა, მიხაი იშტვანოვიჩისა და რედაქტორის — ნიკოლოზ ორბელიანისა. თბილისში დაბეჭდილი წიგნების მიხედვით, მიქაელის გარდა სტამბის მომუშავედ მოჩა-

ნან ვინმე გიორგი მხატვარი, გარსევან — ყოფილი მღვდელი გაბრიელი, რომელიც რედაქტორადაც მუშაობდა, აბრამა სალუყაზანაშვილი (დიაკვანი, სტამბაში ვებარეო). ვახტანგის სტამბამ იარსება 1709-1712 წ.წ. და 1719-1722 წ.წ., 1712-დან 1719 წლამდე ვახტანგი სპარსეთში იყო განვულები. 1722 წელს კი სტამბა თურქებმა დაარბიეს. 1750 წელს ერეკლე მეფემ განაახლა სტამბა კონსტანტინეპოლიდან მოწვეული ოსტატის დახმარებით, რაზეც 20.000 მანეთი დახარჯა. ერეკლეს სტამბამ იარსება 1800 წლამდე და მასში 29 სახელწოდების წიგნი დაიბეჭდა. 1803 წელს წიგნების ბეჭდვა ქუთაისში დაიწყო.

ლიანა კახიძე



ადიგანის მუნიციპალიტეტის სოფელ უღაში 26 ივნისი წმინდა ანთიმოზ ივერიელის ხსენების დღეა და „ანთიმოზობა“ იმართება.

„ანთიმოზობა“ პირველად 2005 წელს, რუმინეთის საელჩოს ინიციატივით, გაიმართა. სწორედ რუმინეთში, უკანასკნელ ხანს მოძიებული მასალებით დადგინდა, რომ ანთიმოზ ივერიელი მესხეთის, კერძოდ სოფელ უღეს, მკვიდრი იყო.

ვერსია, რომ ანთიმოზ ივერიელი წარმოშობით სოფელ უღედანაა, უდეს ღვთისმშობლის მიძინების სახელობის წინამძღვარს დეკანოზ ტიმოტეს (ჩილაშვილი) ეკუთვნის. მისი თქმით, მის მრევლში თაობიდან თაობას გადაეცემოდა ცნობა, რომ ანთიმოზ ივერიელი წარმოშობით სოფელ უღედან იყო. გვარად ხურციძე ყოფილა, ანუ მესხ თავადთა საგვარეულოს მიეკუთვნებოდა და, სავარაუდოდ, თურქთა ერთ-ერთი შემოსევის დროს გაუტაცნიათ.



საკუთარი თავის გაქურდვა

მეცხრამეტე საუკუნის ცნობილი ქართველი ფილოსოფოსი გაბრიელ ქიქოძე უაზრო, უშინაარსო დროის გატარების მოყვარულთ შემდეგი სიტყვებით მიმართავდა: „ეს რა საცოდავი, სასაცილო და უხამსი დროსტარებაა! როგორ? შენ დროის მოკვლა გინდა, სულელო? ნუთუ შენ არ გესმის, რომ დრო განძია, დრო სიცოცხლის საშუალებაა, მაგრამ რას ვამბობ, დრო თვით შენი სიცოცხლეა, ამიტომ დროის მოკვლით ხშირად შენ საკუთარ ყოფას კლავ, თითქმის თვითმკვლელობას სჩადიხარ“.

საუკუნის წინ ნათქვამი ეს სიტყვები შეიძლება უცვლელად გავიმეოროთ იმათ მიმართ, ვინც უამრავ დროს ხარჯავს ტელევიზორის ეკრანთან. ვისაც ტელევიზორი კერპად გაუხდია, ეკრანის მონა გამხდარა და საკუთარ თავს ქურდავს. ამჟამად მსოფლიოს მრავალ ქვეყანაში შეშფოთებას გამოთქვამენ იმის გამო, რომ მასობრივი კომუნიკაციებისა და, უპირველეს ყოვლისა, ტელევიზიის მეშვეობით თანამედროვე ადამიანი ინფორმაციის უდიდეს რაოდენობას იღებს, რაც აქტიურობას უკარგავს და მოვლენების უაღრესად პასიურ აღმქმელად აქცევს მას. იგივე შეიძლება ითქვას კომპიუტერზეც. ადამიანის ყოველმხრივი ჰარმონიული განვითარება მხოლოდ თავისუფალ დროშია შესაძლებელი. ეს დრო კი თითქმის მთლიანად ტელევიზიას, უკანასკნელ ხანს კიდევ კომპიუტერს ეთმობა, რაც ეროვნული სიმდიდრის წყაროს გადაკეტვის ტოლფასია. განსაკუთრებით საგანგაშოა, რომ ახალგაზრდობა დიდ როლს უთმობს ტელეგადაცემების ყურებას. გამოჩენილი ქართველი მწერლის — ლევან გოთუას მოხდენილი თქმით, „ახალგაზრდობა, ბოლოს და ბოლოს, დროებითი უპირატესობაა და მისი არმად გაშვება ეროვნული ენერჯის საძაგელ გაფლანგვას უდრის“. ჩვენი ახალგაზრდები კი ამ უპირატესობას ნაკლებად იყენებენ. **სოციოლოგიურმა გამოკვლევამ სავალალო შედეგები მოგვცა. სტუდენტი ვაჟები დღეში საშუალოდ (შაბათ-კვირის ჩათვლით) ტელევიზორს 2 საათსა და 20 წუთს, ხოლო გოგონ-**

ნები 2 საათსა და 13 წუთს უყურებენ, ვიდუფილმებს კი შესაბამისად 2 საათსა და 37 წუთსა და 2 საათსა და 30 წუთს. 2003 წელს სტუდენტები ტელეგადაცემათა ნახვას გაცილებით მეტ დროს უთმობდნენ. ეს იმითაც იყო გამოწვეული, რომ მაშინ მობილური ტელეფონები და კომპიუტერები ნაკლებად იყო გავრცელებული. უკანასკნელ ხანს ახალგაზრდობა უაზროდ კიდევ უფრო მეტ დროს ხარჯავს მობილურითა და კომპიუტერით ინტერნეტით თამაშებსა და მეგობრებთან ურთიერთობაზე. კერძოდ, ინტერნეტით თამაშებზე სტუდენტი ვაჟები საშუალოდ დღეში 2 საათსა და 48 წუთს ხარჯავენ, ხოლო გოგონები — 2 საათსა და 9 წუთს, მეგობრებთან ურთიერთობაზე კი შესაბამისად 2 საათსა და 43 წუთს და 3 საათსა და 3 წუთს. საბოლოო ჯამში უამრავი დრო უაზროდ იფლანგება. სულ საშუალოდ დღეში (შაბათ-კვირის ჩათვლით) ტელეგადაცემათა და ვიდუფილმების ნახვაზე, მობილურითა და კომპიუტერებით ინტერნეტით თამაშებსა და მეგობრებთან ურთიერთობაზე კოლოსალურ დრო — ვაჟებს 10 საათი და 28 წუთი, ხოლო ქალებს 9 საათი და 45 წუთი ეხარჯებათ. რა თქმა უნდა, ეს ხდება იმის ხარჯზე, რომ სტუდენტები აცდენენ ლექცია-სემინარებს, ნაკლებ დროს უთმობენ სახლსა და ბიბლიოთეკაში სასწავლო საგნების მომზადებას, ნაკლები ძინავთ. საგანგაშოა ისეთი მდგომარეობა, როდესაც სტუდენტთა ნახევარზე ბევრად მეტი — 65,6 პროცენტი — ღამის 1 საათსა და შემდეგ (ვაჟე-



ანზორ თოთაძე

ბი — 60,2 პროცენტი, ქალები — 68,0 პროცენტი), ხოლო ყოველი მეხუთე ვაჟი (22,4 პროცენტი) და მეათე ქალი (11,9 პროცენტი) კიდევ ღამის 3 საათის შემდეგ იძინებს. თუ ამ პროცესს დინამიკაში განვიხილავთ, ვითარება კიდევ უფრო დამამძიმებელი ხდება. მაგალითად, 2003 წელს ჩატარებული გამოკვლევის მიხედვით, ღამის 3 საათზე ან უფრო გვიან იძინებდა რესპონდენტთა მხოლოდ 1,9 პროცენტი, ამჟამად ეს მაჩვენებელი 15,3 პროცენტს უდრის, ანუ 8-ჯერ მეტს. ახალგაზრდები ნაკლებად ნახულობენ თეატრალურ სპექტაკლებს (თეატრში საერთოდ არ დადის ყოველი მეოთხე — 24,2 პროცენტი — ახალგაზრდა რესპონდენტი, ეს მაჩვენებელი 2003 წლის 18,8 პროცენტს უდრის), ნაკლებად დადიან კინოთეატრებში (გამოკითხულ რესპონდენტთა 15,6 პროცენტი საერთოდ არ დადის კინოთეატრებში), „ვეფხისტყაოსანი“ მთლიანად ნაკითხული არა აქვს გამოკითხული ახალგაზრდების 16,9 პროცენტს, შექსპირის არც ერთი ნაწარმოები — 35,9 პროცენტს, ხოლო გოეთესი —



66,0 პროცენტს.

ტელეგადაცემებსა და კომპიუტერზე დროის დიდი დანახარჯები ძირითადად განაპირობებს იმ მეტად არასასურველ ვითარებას, რომ ახალგაზრდები არ ათვალისწინებენ მუზეუმებს, ნაკლებად იცნობენ ქართულ კლასიკურ მუსიკას. ეს იმის შედეგია არის, რომ **ტელევიზიაში იაფფასიანი და წამბაძველობითი საესტრადო მუსიკის საშინელმა მოძალებამ ეროვნული მუსიკალური კულტურისადმი ნიჰილისტური დამოკიდებულება გამოიწვია, რაც ეროვნული ცნობიერების გადაგვარებას იწვევს.** საგანგაშოა ის ფაქტი, რომ ზაქარია ფალიაშვილის ოპერები „აბესალომ და ეთერი“ არ უნახავს გამოკითხული ახალგაზრდების 64,4 პროცენტს; ხოლო „დაისი“ გაცილებით მეტს — 77,3 პროცენტს.

ფაქტია, რომ ტელევიზია ჩვენი ცხოვრების აუცილებელი თანამგზავრი გახდა, მაგრამ ისიც ცხადია, რომ, **როდესაც საოჯახო ეკრანს ეთმობა თითქმის მთელი თავისუფალი დრო, ეს არა მარტო პიროვნების განვითარებას ზღუდავს, დაბლა წევს მის კულტურას, არამედ ეს გარემოება უარყოფითად მოქმედებს ადამიანის ჯანმრთელობაზეც.** ტელევიზორის გამუდმებით ცქერა იწვევს მხედველობისა და საერთო დაღლილობას, ნერვულ დაძაბულობას, ადამიანი ცოტას მოძრაობს, ცოტა ხანს არის სუფთა ჰაერზე, ნაკლებ დროს უთმობს ფიზიკურ ვარჯიშს. ეს ფაქტორები კი ხელს უწყობს მრავალი დაავადების, განსაკუთრებით კი გულ-სისხლძარღვთა დაავადების განვითარებას. განა დასაფიქრებელი

და გასაანალიზებელი არ არის ის ფაქტი, რომ გამოკითხული ახალგაზრდების 26,7 პროცენტი ღამის პირველ საათზე იძინებს, 24,0 პროცენტი — ღამის ორ საათზე, ხოლო 15,0 პროცენტი — ღამის სამ საათზე ან უფრო გვიან. საერთოდ ახალგაზრდების დიდი უმრავლესობა (91,7 პროცენტი) ღამის 12 საათის შემდეგ იძინებს და მეორე დღეს უმაღლეს სასწავლებელში დაღლილი და გამოუძინებელი მიდის, რის გამოც სასწავლო საგნების შეთვისების უნარი მნიშვნელოვნად ქვეითდება.


აღსანიშნავია ისიც, რომ ჩვენს ქვეყანაში შობადობის უაღრესად შემცირებისა და მოსახლეობის რაოდენობის კლების პირობებში, ჩვენი ქვეყნის გადარჩენის, ჩვენი ეროვნული ფასეულობების შენარჩუნების უმთავრესი პირობა ფიზიკურად და სულიერად ჯანმრთელი, ყოველმხრივ განათლებული ახალგაზრდების აღზრდაა. როგორც ჩანს, ეს ჭეშმარიტება კარგად იცოდნენ ჩვენმა წინაპრებმა და ამიტომ ისინი ყოველთვის განსაკუთრებულ ყურადღებას უთმობდნენ მოზარდ თაობას, მათ განათლებაში ხედავდნენ ქვეყნისა და ერის ძლიერებას.

ქართველი ახალგაზრდობა ყოველთვის იდგა ეროვნული ინტერესების სადარჯოზე, ავითარებდა „ქართველი ერის უდიდესი სიკეთით აღვსილი მონოლითურობის დიდებულ ტრადიციას“ და პატივს სცემდა მამების ნაამაგარსა და ნაღვანს. აკი მეოცე საუკუნის დამდეგსაც აკაკი წერეთელი სამართლიანად შენიშნავდა: „იმდენი ჰაუ! ჰაუ! იძახეს ჩვენმა ყმანვილებმა, რომ ხალხი გამოაღვიძესო“. ამჯერად,

ქართველი ახალგაზრდობა ებრძვის ზნეობრივ დაქვეითებას, ყოველმხრივ ცდილობს გლობალიზაციის რთულ პირობებში ეროვნული ღირებულებების შენარჩუნებასა და განვითარებას.

დღეს, როდესაც „ნაციონალების“ შემდეგ, ბევრად მეტი საშუალებაა ეროვნული გრძნობის ამალღების, ეროვნული სიამაყის დაბრუნებისათვის, ტელევიზია, იმის მაგივრად, რომ დაეხმაროს ახალგაზრდობას, ისევე განაგრძობს უშინაარსო, მხატვრული და შემეცნებითი ღირებულებამოკლებული ფილმების ჩვენებას და ამით ნებისთნეულ უნებლიეთ, ქართული სულიერების, ტრადიციების, ეროვნული ნიშან-თვისებების წაშლას ემსახურება. ამ ფილმებში წინა პლანზეა წამოწეული ალვირახსნილი და გაუკუღმართებული სექსი, უაზრო მკვლევრობები და სხვა საშინელება. თითქმის ყველა ფილმი გადაღებულია ტყუპისცალივით მსგავს სიუჟეტზე. ეს ფილმები საზოგადოებაში აგრესიისა და უზნეობის დამკვიდრებას ემსახურება.

სექსუალური სცენები მალაღი მხატვრული დონის ფილმებშიც გვხვდება. ალბათ, უმრავლესობას ახსოვს შესანიშნავი ფილმი „მამაკაცი და ქალი“, სადაც სექსუალური მომენტების შემოტანა ფილმში სიუჟეტის საჭიროებამ განაპირობა და მათ მხატვრულმ დატვირთვაც აქვთ. ფილმში სექსუალური ურთიერთობები საოცრად ფაქიზად არის წარმოდგენილი და ამ შემთხვევაში იგი მხოლოდ ადამიანის გაკეთილშობილებას, სულიერ ამალღებას ემსახურება. ჩვენი ალფრთოვანება ამერიკული ვიდეო-ფილმების გამო, თვით ამ ფილმების სამშობლოში პროვინციულ უკულტურობად აღიქმება. ცნობილი ამერიკელი სცენარისტი პიტერ ქონი, რომელსაც ვიდეო-ფილმების სცენარები მაკულატურად მიაჩნია (თვითონ წერს, მაკულატურაში მიხდებიან ფულსო), აღნიშნავს, რომ ამერიკული ფილმები საფრთხეს უქმნის მსოფლიოს. მისი აზრით, ჰოლივუდში მხოლოდ იმისათვის იღებენ ფილმს, რომ მსოფ-





ლიოს მასობრივ მომხმარებელს მიჰყიდონ. პოლიგუდურ სცენარს კი ნებისმიერი კაცი დაწერსო: საამისოდ ერთი დადებითი გმირია საჭირო, ერთი უარყოფითი და ერთი ცვნივის აღმძვრელი ქალიო.

ვფიქრობთ, დროა (თუ უკვე დაგვიანებული არ არის) საზოგადოებამ მეტი ყურადღება მიაქციოს ტელევიზიის ეკრანიდან ასე მოძალებული სექსისა და დამახინჯებული სქესობრივი ურთიერთობის, გაუთავებელი ხოცვა-ჟლეტის ამსახველი ფილმების ჩვენების პრობლემას, რომელიც ანგრევს და ამახინჯებს ადამიანის და განსაკუთრებით ახალგაზრდის ფსიქიკას. ამან შეიძლება ახალგაზრდობა მიიყვანოს სიცარიელემდე, პრიმიტიულ აზროვნებამდე, იმ მდგომარეობამდე, როცა მას აღარ აინტერესებს ეროვნული ღირებულებები, ოჯახი და ხდება რაღაც ამღვრეული სულიერების მატარებელი, ზნეობრივად გაღარიბებულ სამყაროში მცხოვრები პიროვნება, ყოველგვარი ადამიანური ფასეულობებისაგან დაცლილი კოსმოპოლიტი. ეს მით უფრო საშიშია, რადგან ახალგაზრდობაში დასრულდა მე-20 საუკუნის გამოცანა — „აქსელერაციის პროცესი“ და დაიწყო 21-ე საუკუნის ახალი გამოცანა — ინფანტილიზმი, რომელიც ყველაფრისადმი გულგრილ, უინტერესო დამოკიდებულებას გულისხმობს.

ცხოვრებაში შეიძლება ყველაფერი მოხდეს, შეიძლება „მთა მთას შეხვდეს და მზეც მთის იქით მოხვდეს“, მაგრამ ყველაფერზე ყურადღების გამახვილება, მით უმეტეს ერის სულიერების საზიანოდ, ნამდვილად არ შეიძლება. ერთხელ, ცნობილი რუსი ადვოკატი პლევაკო იცავდა კაცს, რომელმაც დედა გააუპატიურა. სასამართლო სხდომაზე მან მიმართა მოსამართლეს: ხომ შეიძლებოდა ბრალდებულს უარესიც გაეკეთებინაო. კითხვაზე, რა შეიძლებოდა ბრალდებულს ამაზე უარესი საქმე ჩაედინა, პლევაკომ უპასუხა: მამა გაეუპატიურებინაო. რა ვქნათ ახლა ბატონებო, ვილოთ

ფილმები ასეთ სიუჟეტებზე თუ უმჯობესია ავადმყოფს ვუმკურნალოთ, ან რატომ ჰგონიათ, რომ „ახლა უფრო ფატმანების დროა?“

ასეთი ფილმების შექმნის ეთიკური მხარე ამით როდი ამოიწურება. ამ ფილმებში მსახიობები ათასგვარ სექსუალურ უზნეობას სჩადიან, მათ უხდებათ ცხოველურ ინსტიქტამდე დასული ცხოვრება, პარტნიორების წამდაუნუმ გამოცვლა, გაუკულმართებული სქესობრივი კავშირი და მანიაკი რეჟისორების ვინ მოთვლის კიდევ რა სექსუალური ფანტაზიისა თუ ჩანაფიქრის შესრულება. ბუნებრივია, ამ ათასობით მსახიობს ჰყავს მშობლები, შვილები, მეუღლეები, ნათესავები, მეგობრები, ან უბრალოდ ნაცნობები, მაგრამ მათ ოდნავადაც არ აწუხებთ სირცხვილის გრძნობა თავიანთი ახლობლების წინაშე. უფრო მეტიც, ყვითელი პრესა მათ წარმოაჩენს უნიჭიერეს მსახიობებად. ამ დროს, მართლაც ნიჭიერი მსახიობი, რომელიც თავისი თავის მაყურებელიც არის, ასეთ ფილმებში გადაღებაზე არასოდეს დათანხმდება. დიდი ფრანგი მსახიობი ლინო ვენტურა ფილმებში კოცნასაც კი ერიდებოდა, რადგან, თვითონაც აცხადებდა, მას ოჯახი — ცოლი და შვილები ჰყავდა. ცნობილმა ფრანგმა მსახიობმა ჟან გაბენმა კი უარი განაცხადა საყვარლის როლის თამაშზე და ჩაშალა ფილმი, რადგან იგი არ პასუხობდა მსახიობის მორალურ პრინციპებს. ჟან გაბენმა, აგრეთვე, უარი განაცხადა ეთამაშა იმ მამაკაცის როლი, რომელმაც ამოხოცა მთელი თავისი ოჯახი. გადაწყვეტილება მან მხოლოდ მას შემდეგ შეცვალა, როცა შეიტყო ის მიზეზები, რამაც ეს ადამიანი ასეთ სისასტიკემდე მიიყვანა.

უცხოურ ფილმებში სიყვარულის ამალგებულ გრძნობა, ბუნებით ნაბოძები ეს უდიდესი ნიჭი, გასრესილი და მიწასთან გასწორებულია. ამ ფილმების მიხედვით სიყვარული კი არ ამალგებს, არამედ ამდაბლებს ადამიანს. ნუთიერი სიამოვნება ფარავს ყველას და ყველაფერს. ზუსტად ისეა, რო-

გორც აკაკი წერეთელმა ერთ გადარჯულებულ ქართველ ქალბატონს, რომელსაც ქართულად ლაპარაკი ეთაკილებოდა და სიტყვა „ლიუბლიუ“ ქართულ „მიყვარხარზე“ მეტად მოსწონდა, უთხრა: ეგ სიტყვა „ლიუბლიუ“ ხომ „მართო ტურების ცმაცუნით გამოითქმის და მიტომაც ტურებს იქითველარ მიდის თქვენი გრძნობაო“.

მაშ, რატომ ეტანება ჩვენი მაყურებელი ასეთ ფილმებს? საქმე ის გახლავთ, რომ ტელევიზიამ საკმაოდ მოხერხებული და ნაცადი გზა აირჩია — ნელ-ნელა გაუხედნა მაყურებელს გონება და სმენა აკრძალული ხილით, ისინი შესანიშნავად უწვევენ თავს რეკლამას. ამასთან, მძაფრმა, მაგრამ არაფრისმთქმელმა სიუჟეტებმა, მდიდრულმა აქსესუარებმა, გადაღების მაღალმა ტექნიკამ, ჩვენმა ეკონომიკურმა სიდუხჭირემ თავისი გაიტანა და ჩვენი მოსახლეობა, განსაკუთრებით ახალგაზრდობა, ტელევიზიას მიაჯაჭვა.

ამერიკული ფილმები, რომლებსაც მხოლოდ კომერციული მიზნით კონვეირული წესით აცხობენ, სულიერ და ზნეობრივ გაღარიბებას იწვევს, საზოგადოებაში ძალადობასა და აგრესიას ამკვიდრებს. ასეთ შეფასებას თვით ამერიკელი მეცნიერები იძლევიან. ამიტომ, მიკერძობაში რომ არ ჩაგვითვალონ, ჩვენც მათ შეფასებას დავეყრდნობით, უპირველეს ყოვლისა კი, ცნობილი ამერიკელი ფსიქოლოგის დ. მაიერსის ნაშრომს „სოციალური ფსიქოლოგია“.

1994 წლიდან ტელეგადაცემებში ძალადობის სცენების შემსწავლელი სახელმწიფო პროგრამის მიხედვით გაანალიზდა ძირითადი არხებისა და საკაბელო ტელევიზიის, დაახლოებით, 10000 გადაცემა. აღმოჩნდა, რომ სამი პროგრამიდან ორი შეიცავდა ძალადობის სიუჟეტებს. მოზარდს უკვე ტელევიზიით ნანახი აქვს ძალადობის 100000 და მკვლევლობის, დაახლოებით, 20000 სცენა. სხვადასხვა გამოკვლევით დადგენილია, რომ რაც უფრო მეტია ძალადობა ტელეგადაცემებში, მით უფრო აგრესიულია ბავშვი.



ყველგან და ყოველთვის ტელევიზიის გამოჩენასთან ერთად იზრდება მკვლევლობათა რაოდენობა. კანადასა და შეერთებულ შტატებში 1957-1974 წლებში, ტელევიზიის გავრცელებასთან ერთად, ორჯერ მეტი მკვლევლობა მოხდა. სამხრეთ აფრიკაში, სადაც ტელევიზია 1975 წლამდე არ იყო, მკვლევლობათა რაოდენობა გაორმაგდა სწორედ ამ წლიდან. შორს არ წავიდეთ, საქართველოში უცნაური სახელი ტარზანი 94 ადამიანს ჰქვია და იგი ჩვენში გავრცელდა ცნობილი კინოფილმის „ტარზანის“ გავლენით. მიუთითებენ იმის შესახებაც, რომ მწლის ასაკში ყმაწვილების მიერ ტელეგადაცემებში დაძალობის სცენების რეგულარულად ყურების ფაქტი გახდა სერიოზული სისხლის სამართლის დანაშაულის წინაპირობა, რომელიც მათ 30 წლის ასაკში ჩაიდინეს.

ხშირად მოზარდები ახდენენ ტელეგადაცემებში ნანახი სცენების იმიტაციას. ლიტერატურაში ამის მრავალი ფაქტია ცნობილი. მაგალითად, 1994 წელს ნორვეგიაში 5 წლის გოგონა ცემეს ფეხებით, დააყარეს ქვები და მიატოვეს თოვლში გასაყინად მასთან ერთად მოთამაშე მეგობრებმა, რომლებმაც სატელევიზიო შოუში ნანახის მსგავსი მოქმედების იმიტაცია მოახდინეს, რაც ამ შოუს აკრძალვის საფუძველი გახდა სკანდინავიის სამ ქვეყანაში. „ჩვენ არ შეიძლება არ მივიდეთ იმ დასკვნამდე, — აღნიშნა 1993 წელს ახალგაზრდებს შო-

რის ძალადობის ამერიკის ფსიქოლოგიურმა კომისიამ, — რომ ძალადობის სცენების ყურება ზრდის ძალადობის საერთო დონეს“. უმრავლეს შემთხვევაში ტელევიზია არარეალური სამყაროს მოდელირებას ახდენს. ტელეგადაცემებში პოლიციელები იარაღიდან ისვრიან თითქმის ყველა ეპიზოდში, ნამდვილი პოლიციელი კი ჩიკაგოში თავისი იარაღიდან საშუალოდ 27 წელიწადში ერთხელ ისვრის. საინტერესოა იმის აღნიშვნაც რომ 1974 წელს იამაიკაზე განხორციელდა დანაშაულებასთან ბრძოლის პროგრამა, რომელიც ითვალისწინებდა ცენზურის დაწესებას — აიკრძალა იარაღის გამოყენების სცენების ჩვენება სატელევიზიო გადაცემებში. მომდევნო წელს ქურდობათა რაოდენობა 25 პროცენტით შემცირდა, ხოლო იარაღიდან გასროლათა რაოდენობა, რომელსაც არ მოჰყოლია სიკვდილი — 37 პროცენტით.


ეროტიკული და აბრეშულ-ეროტიკული ფილმები იწვევს ქალების მიმართ მამაკაცების აბრეშულ ქცევას. მთელ მსოფლიოში პორნოგრაფიის ფართოდ გავრცელების შედეგად, 1960-1970 წლებში, მნიშვნელოვნად გაიზარდა გაუპატიურებათა რაოდენობა, იმ ქვეყნებისა და რეგიონების გარდა, სადაც პორნოგრაფიაზე კონტროლი იყო დაწესებული. აღიასკამ დაიკავა პირველი ადგილი როგორც სექსუალური ჟურნალების გაყიდვის, ისე გაუპა-

ტიურების მიხედვითაც. ამერიკის ფედერალური საგამომძიებლო ბიუროს მონაცემებით, სერიული მკვლევლობები ხდება პორნოგრაფიის აქტიური მომხმარებლების მიერ.

როგორც დამოგრაფია, ისიც მიწა აღწინააღმდეგა, რომ ტელევიზიით ნაჩვენები ფილმების უმრავლესობა აშარასებს მოსახლეობის ჯანმრთელობას, ძველანაში ისედაც რთულ დამოგრაფიულ ვითარებას, ნერვებს არაჯანსაღი ცხოვრების წესს, იწვევს ახალგაზრდობის სექსუალურ ბალიზიანებას, რამაც ადამიკვატური დაუკმაყოფილებლობის გამო, შეიძლება გამოიწვიოს გაუკუღმართებული სექსუალური მოთხოვნები ბავშვის განვითარება — მანინიზმი, ჰომოსექსუალიზმი. ამასთან, სექსუალური ბალიზიანებას ისოგა და შეიძლება პიროვნება იგოთინტი გახდეს. ამ ფილმებში მხოლოდ ლამაზი შესახედაობის, გარეგნულად მომხიბვლელი მსახიობები თამაშობენ და უაღრესად გარყვნილ ცხოვრებას ეწევიან. ასეთ შემთხვევაში ადამიანებმა შეიძლება დაკარგონ სექსუალური ინტერესი ერთმანეთის მიმართ. ამის შესახებ ამერიკელ ფსიქოლოგს დ. მაიერსს მოჰყავს სხვადასხვა გამოკვლევის შედეგები და აღნიშნავს, რომ ტელევიზიით სექსუალურად მიმზიდველი ქალების ხშირი ჩვენებით ახალგაზრდები მეგობარ ქალებს ან მეუღლეებს ნაკლებ მიმზიდველად მიიჩნევენ. სექსუალური ფილმების გამუდმებული ჩვენების გამო ადამიანებს აღარ აკმაყოფილებთ, აღარ იზიდავთ საკუთარი სექსობრივი პარტნიორები.

ასე, რომ ტელევიზიას საკმაოდ ბევრი გადასაწყვეტი პრობლემა დაუგროვდა. საზოგადოებამაც უნდა იცოდეს პროგრამის შერჩევა და ტელევიზორის არა მარტო ჩართვა, არამედ მისი გამორთვაც. იგივე შეიძლება ითქვას უკვე კომპიუტერზეც.

ანსორ თოთაქა





იოსებ გრიშაშვილი

ქველი თბილისის ბიბლიოთეკა

მარტო ყარაგიოზას თეატრი, ნაღლი, ყავახანები და სხვ., აშკარაა, სავსებით ვერ დააკმაყოფილებდა ხალხის გონებრივ მოთხოვნილებას. ხალხში გაიღვიძა „ნიგნის ცოდნის“ სურვილი. თფილისის ძველი თაობა მხოლოდ ხელთნაწერებს კითხულობდა და ხელთნაწერებს უსმენდა. „მნათობი“ სწერდა: „თქვენ შეხვდებით მედუქნეებს, რომელნიც გულ-მოდგინეთ კითხულობენ ბეჟანიანს, ქალვაჟიანს, ბარამიანს და გადაწერაში ერთი ორად ფასს აძლევენ.

ეხლა კი მათი მომდევნო თაობა გადაწერაზე „ფულს აღარ ჰხარჯავდა“ და ბეჭდვითი სიტყვით სარგებლობდა. გაჩნდნენ იაფფასიანი ნიგნების გამომცემელი: ნოვინარაშვილი, ახპატელოვი, მდივანოვი, ჭიჭინაძე, ჩარეკოვი, ედიგაროვი, კობალაძე, ლაზარევი (ყაზაროვი), ფამბაკელოვი, ზარგაროვი, ლიზა მარჯანოვი, შემდეგ — იოსებ და ბაგრატ არნაუტოვები, ვანო ესალოვი, ალ. შახბარათოვი (შობრია), მიხ. ზარიძე და სხვ., ესენი ბეჭდავდნენ, როგორც აღმოსავლეთის ფანტასტიურ ზღაპრულ მოთხრობებს, ისე იმდროინდელი პოეტების სახალხო ლექსებს.

ამ ხალხურ სიტყვიერებას ჩვეულებრივად მფარველობდა რედაქტორობდა ჩუმი და დაუწინყარი მოღვაწე პეტრე უმიკაშვილი. აი, რასა სწერს იგი თავის ავტობიოგრაფიაში: „1875-1877 წლებში სხვათა სხვათაგან გამოცემით და ძველი ხელთნაწერების ტექსტით ჩემი რედაქტორობით დაიბეჭდა: ბეჟანიანი, ალექსიანი, ქალვაჟიანი და თეიმურაზ-მეფის ვარდ-ბულბულიანი, ამ წვრილ მოთხრობათა და ლექსთა ბეჭდვა მრავალი იყო და არც კი ვიცი, რამდენს ბეჭდავენ და ვინ ბეჭდავს“.

პეტრე უმიკაშვილი მართალია. თბილისის დაბალი მოსახლეობა ხარბად ეტანებოდა ამგვარ გამოცემებს. ზოგი ნიგნი მეოცე და მეორმოცე გამოცემადაც გამოდიოდა და ათი-ათასობით ვრცელდებოდა მდებრიო ხალხში. „მართალია, ამ ნიგნაკების უმრავლესობას შინაარსის მხრით დიდი ნაკლებევა ახლავს, მაგრამ მათი ხალხში გავრცელება მაინც არ იყო უსარგებლო და უმნიშვნელო... ვინ იცის არსენას ლექსმა, მაგალითად, ან ქალვაჟიანმა რამდენი წერაკითხვის არ მცოდნე დააინტერესა და ქართული ნიგნის სწავლის წყურვილი აღუძრა!“ ნაკლებევა ან ამ ნიგნებისა კარგად ვიცოდით, — წერს იგივე პ. უმიკაშვილი, — მაგრამ ჩემი საკუთარი საყვედური და სხვების საყვედური იმით გამიქარვებია, რომ ეს პირველი ნაკადული იყო, რომელიც დაიძრა და, თუ ამ ნაკადულს ჭუჭყი მოჰყვა, ამას დრო ნაწრეცხს და ნაიღებსო“.

ასეთ ნიგნებს ერთ დროს ზ. ჭიჭინაძეც ბეჭდავდა, თუმცა ნიგნის წინასიტყვაობაში ხშირად თავს ასე იმართლებდა: „ჩემთვის დიდათ სამწუხაროა, რომ ამ ნიგნსა ვბეჭდავ, მაგრამ რასა იქმს კაცი, როცა ეს ნიგნი ხალხში ძლიერ არის გავრცელებულიო“.

სურვილგაღვიძებული ხალხი ეტანებოდა იმ ნიგნებს, რომლებიც მისთვის მისაწვდომი იყო და რომლებსაც მას აწვდიდნენ.

ძველი მკითხველის გონება ამ ზღაპრული ნიგნებით საზრდობდა და ისიც დიდის ხალხისთ ელოდა რომელიმე ახალი, გამომცემლების მიერ დაპირებული, ზღაპრის დაბეჭვდას.

მაგრამ არ იქნება მართალი, თუ ამ „ძველი მწერლობისადმი“ სიყვარულს მხოლოდ თბილისის მოქალაქეებს მივაკუთვნებთ. ალექსანდრე ორბელიანი თავის ერთ წერილში სხვა მაღალ თხზულება-



იოსებ გრიშაშვილი

თა შორის, ამ „შაურიან ნიგნაკებსაც“ ეხება: „ჩვენი წინაპრები, — სწერს ორბელიანი, — თუ ერთი ხელით იბრძოდნენ, მეორეთი სწერდნენ ისეთი სიტყვიერების წერილებს, როგორებიც არიან: არჩილიანი, ვარდბულბულიანი, ქაცვია-მწყემსი, დავრიშიანი, სიბრძნე-სიცრუე, ყარამანიანი, ბარამიანი, მირიანიანი, გულიჯანიანი“ და სხვ.

ჩვენ მიერ მოხსენებულ გამომცემლებს, რომელნიც მდებრიო ხალხს აწვდიდნენ ამ ზღაპრული პოემების პროზაულ ვერსიებს, ჰქონდათ ერუდიცია? გემოვნება? თუ მხოლოდ მოგების მიზნით ხელმძღვანელობდნენ?

გადაჭრით შეიძლება ითქვას, რომ, ორიოდე ნიგნაკის გარდა, („ბარამიანი“ და ნანილობრივად „ყარამანიანი“) მათი გამოცემანი კრიტიკის გარეშე იდგა. ტექსტი — შეუსწავლელი, გამოცემა — ლატაკი, კორექტურა — ბარბაროსული, ილუსტრაციები — პრიმიტიული. ზოგმა გამომცემელმა არამც თუ ნიგნის ნაკითხვა, თავისი სახელის და გვარის მოწერაც



არ იცოდა (მაგ. ალ. შახბარათოვმა), ზოგ გამომცემელს თვითონ შეჰქონდა ტექსტში შესწორებანი. იყო შემთხვევები, როცა გამომცემელნი ავტორებს ერთმანეთში რევედნენ. მაგ., გამომცემელმა მ. ზარიძემ 1908 წ. გადაბეჭდა პოემა „სარიდონიანი“ (პირველი გამოცემა ეკუთვნის ქაიხოსრო ჩარეევს 1879 წ.) და ავტორად სულ ახალგაზრდა გლეხი მიხ. ჯაჭვაძე გამოაცხადა. ამაზე დ. გვიშვილმაც შენიშნა:

**„ერთ წიგნს იღებ და არქმევ
შენ მეორის სახელსა
და ხალხს მაგით ატყუებ,
თვალეზს უბამ მნახველსა“.**

ცნობილია, რომ სასიძღვრო ლექსების ავტორები თავიანთ გვარს თუ ფსევდონიმს შიგ ტექსტშივე რითმავდნენ. მაგ.,

**„მესამე ვსვათ, ღირს-ვარგა,
ყური დამიგდეთ კარგი —
ღმერთმა, დიდხანს**

**გვიცოცხლოს
სკანდარნოვა გიორგა“.**

ამ ლექსს ალ. შახბარათოვის მიერ გამომცემულ წიგნში ასეთი დაბოლოვებით ვკითხულობთ:

**„მესამე ვსვათ, ღირს-ვარგა,
ყური დამიგდეთ კარგი —
ღმერთმა, დიდხანს**

**გვიცოცხლოს
შიბრია შახბარათოვი“.**

განმარტება ზედმეტი! გარდა იმისა, რომ გამომცემელმა ლექსის რითმა დაარღვია, სხვისი შრომა თავისად გამოაცხადა და ამით მკითხველი შეცდომაში შეიყვანა.

ამგვარი კურობების ჩამოთვლა შორს წაგვიყვანდა. ეს ორი ბეჭდური ნიმუშიც მხოლოდ იმიტომ მოვიყვანეთ, რომ წარმოვიდგინოთ, თუ მკითხველი აუდიტორია რამდენად არ იყო გათვითცნობიერებული, როგორ ენდობოდა გამომცემლებს და ერთ ავტორს მეორისგან ვერ არჩევდა.

რა იყო სულიერი საზრდო მამინდელი აუდიტორიისა? რას წარმოადგენდა ეს ლიტერატურა? რითი იკვებებოდნენ ის სახალხო პოეტები, რომელთა შესახებაც ქვემოთ უნდა გვქონდეს ლაპარაკი?



ვაზირ შიკაბიძე

ეს იყო ერთის მხრით, აშუღების ზეპირი სიტყვები და მეორეს მხრით, ის უთვალავი ზღაპრები, რომლებიც იაფ-ფასიან წიგნაკებად იბეჭდებოდა: „ყარამანიანი“, „ბრამანიანი“, „ახრასიანი“, „ეთერიანი“, „ქოროლიანი“, „ვარშაყიანი“, „ალექსანდრ-ლუდვიკიანი“, „კარხმალაჯიანი“, „როსტომ-ზურაბიანი“, „ბეჟანიანი“, „დავრიშიანი“, „მარიანიანი“, „შუშანიკიანი“, „ალდუზიანი“, „სარიდონიანი“, „ალექსიანი“, „ქალვაჟიანი“, „შვიდ-ვეზირიანი“ („თიმსარიანი“) და სხვ. ამ ზღაპრულ მოთხრობათა შორის ყველაზე პოპულიარული იყო „ქალვაჟიანი“, „ყარამანიანი“, და „შვიდვეზირიანი“. თუ „შვიდვეზირიანი“. ეს შესანიშნავი კონსტრუქციით დაწერილი რომანი, ნაღეჭი ენით იყო ნათარგმნი, სამაგიეროდ „ყარამანიანის ენა თუმცა შეიძლება გრამატიკულის მხრით გვეჩვენოს უსწორმასწოროდ, მაგრამ მდიდარია თავისი ფორმებით, სხვა-დასხვა ტექნიკურ სიტყვებით და პლასტიკითაც“.

ერთის მხრით, მშვენიერი ქართული „ყარამანიანისა“ და, მეორეს მხრით, მისი ფანტასტიკური შინაარსი, ბევრს მკითხველს თუ მსმენელს იზიდავდა, „მსმენელსაც“ იმიტომ ვამბობ, რომ ხშირ-

ად „ყარამანიანი“ ხმამაღლა იკითხებოდა და ოჯახის დანარჩენი წევრები კი ირგვლივ უსხდნენ და სულგანაბული უსმენდნენ, ფერიებმა პაპის საძიებლად როგორ წაიყვანეს „ჰაიართ-უხუცესი“, რომელიც რამდენიმე დღის განმავლობაში ჰაერში ფრენის დროს ბალთასა და ისე იკვებებოდა.

ხალხი დიდის გაფაციცებით ადევნებდა თვალყურს ამ წიგნის გმირთა ფათურაკიან თავგადასავალს, ხარობდა მათი სიხარულით, იტანჯებოდა მათი ტანჯვით და ყოველივე წვრილმანს ისე განიცდიდა, თითქოს მომსწრე ან დამსწრე ყოფილიყოს ამ ზღაპრული ეპოპეისა: „მაშინ გარდამქეშანმა ზორაბ-შაჰს უბრძანა: ეს წყეულნი როგორც მიკრულნი არიან, ისრევე გუდებათ დახადეთ, რადგანაც ამათ ჩემ დატყვევებას ანბირ და ზანგ დევებს უთვლიდნენ, მაგრამ მე ჩემმა ღმერთმა მიხსნა მაგათის ხელიდან; ეხლა მყარალმა რაჯიბმა ეგენი დაიხსნას... თითონ ხელმწიფები და ბანოვანნი ადგნენ და სასახლეში წამოვიდნენ. მაშინ საჰმანმა, გარდამქეშანმა და ზორაბ დევმა საჩქაროდ დევები მოიშველიეს და სამნივენი დაატყვევეს, შემდეგ გუდით ამოიღეს და ბზით გატენეს, მერე ქურჩუკის ბრძანებით ერთ ალაგას დაჰკიდეს“... ან კიდევ: „ჰეი ყარამან, — შესძახა მდევმა, — სიკვდილისთვის რომ აქ არ მოსულიყავი, ნუთუ შენს ქვეყანაში სიკვდილი აღარ იყო?.. ყარამანმა მარჯვენა ხელი მარცხენას გვერდს შემოივლო, მარცხენა — მარჯვენას და ისეთი საზარელი ხმით შესძახა, რომ მსმენელნი უსულოდ იქმნენ, ცხენნი, მარტოქანი და სპილონი დაფრთხნენ. დანყვიტეს საბამნი და მინდორს გარბოდნენ, ლაშქარნი ისე შეშინდნენ და შეიშალნენ, რომ მეორედ მოსვლა ეგონათ“...

საკმარისი იყო, სულგანაბულ მსმენელებს გაეგონათ „ყარამანიანის“ მეტაფორა: „სეილან-ჯადო და ქალან-ჯადო ვეშაპებზე შესხდნენ და გველები მათრახებად დაიჭირეს“, ანდა მოესმინათ: ყარამანმა, ამ ას ოთხმოცდა ცხრა-



მეტი წყრთის სიმაღლის კაცმა, როგორ დაიკვივლა, როგორ ასწია „ყაფის მთა“ და სამი დღის განმავლობაში როგორ ეჭირა ხელში ასე აწეული, რათა თავისი ლაშქარი ქვეშ გაეტარებინა, რომ მსმენელები ბავშვურ აღტაცებაში მოსულიყვნენ და საერთო ყიჟინა აეტეხათ.

ანტონ ფურცელაძე, ულოლიკოს ფსევდონიმით, „ყარამნიანის“ შინაარსს „დანჯღრეულ და გალაღებულ ოცნების სიზმარს ადარებს“.

მაგრამ, ჩემის აზრით, ეს სასტიკი ბანაჩანი შუაფარბაელი უნდა იყოს ისეთი ნაწარმოებისთვის, რომელიც თავისი შესანიშნავი მითაფორებით და რაინდული შინაარსით, ერთის მხრით ესთეტიკურ გამომწვევას უღვიძებდა და მეორე მხრით, ადამიანური გრძნობებს უსათუთებდა იმ დროინდელ დაწვრილმანებულ ცხოვრების წესში ჩაფლულ მოსახლეობას.

სამართლიანად აღნიშნავს ე. თაყაიშვილი, რომ ქართულ ენაზე არ არი არც ერთი წიგნი, რომელიც მდებარე ხალხში ისე იყოს გავრცელებული, როგორც „ყარამნიანი“.

„ყარამნიანი“ ნათარგმნია ირაკლი მეორის დროს, სახლთუხუცესის და სარდლის დავით ორბელიანის მიერ.

ცალკე წიგნებად გამოცემის ინიციატივა ეკუთვნის სახალხო პოეტს — დავით ლაზარევს.

ხოლო **ლადო აღნიაშვილმა „ყარამნიანი“ პიესად გადააკეთა (3 მოქ. და 11 სურათად), რომელიც ჩვენს სცენაზე რამდენჯერმე იყო წარმოდგენილი.**

ძველად ყველა ქართულ ოჯახში „ვეფხვის ტყაოსანთან“ ერთად „ყარამნიანის“ უზარმაზარი ხელნაწერიც ინახებოდა (2500 გვერდიანი!). „მზითვის სიები“ ხომ უყარამნიანოდ იშვიათი მოვლენა იყო! ამ წიგნს ერთნაირის ხალისით ეტანებოდა, როგორც დაბალი ხალხი ისე მაღალი საზოგადოება.

ნ. ბერძნიშვილი ურჩევდა „ცის-

კრის“ რედაქტორს, ივ. კერესელიძეს, თარგმნების ნაცვლად, „ყარამნიანი“ და სხვა ჩვენი ძველი მწერლობის ნიმუშები რომ დაბეჭდო, ჟურნალი უფრო მოგებულ იქნებოდა. 1857 წელს „ცისკარში“ დაიბეჭდა ლუდოვიკო XV-ის დროის ფრანგი მწერლის მარმონტელის „მეუდაბნოენი“, რომლის თარგმანიც ეკუთვნოდა იმდროინდელ თვალსაჩინო მოღვაწეს სარდიონ ალექსი-მესხიშვილს. ნ. ბერძნიშვილმა „ცისკრის“ კრიტიკულად განხილვის დროს დაიწინა ეს მოთხრობა და, სხვათა შორის, დასწერა: „ჩვენ გვაქვს ჩვენი საკუთარი ავლადილება, რომელიც მოითხოვს ფაქიზ განვითარებას და ღრმა შესწავლას, გვყავს პოეტები, პროზაიკოსები და რომანტიკოსებიც და მე ვამბობ, რომ ჩვენი ხალხი ნაწყვეტებს: ვისრამიანიდან, ყარამნიანიდან და ბეჟანიანიდან უფრო სი-



ლადო აღნიაშვილმა „ყარამნიანი“ პიესად გადააკეთა (3 მოქ. და 11 სურათად), რომელიც ჩვენს სცენაზე რამდენჯერმე იყო წარმოდგენილი

ამოვნებით წაიკითხავს, ვიდრე რომელიმე დრომოჭმული ფრანგულ მოთხრობას“.

ამ მოთხრობებს თავისი აღწერილობის სიმძაფრით, სიუჟეტის მთლიანობით, შედარებათა ნაირფერობით და სიტყვის პლასტიური დაწყობით კარგახანს ჰყავდა დატყვევებული ქართველი ხალხის ლიტერატურული გემოვნება.

ხალხი ინსტიქტით გრძნობდა კარგად დაწერილ წიგნს და ნიჭიერ ავტორს.

მართლაც ნ. ბერძნიშვილისა არ იყოს, რატომ არ უნდა „წაეკითხათ სიამოვნებით“ „ვისრამიანი“?

მაგრამ დაუბრუნდეთ „ყარამნიანი“. „ყარამნიანის“ ომის აღწერილობა სულ სხვა ხასიათისაა და სრულებით განსხვავდება სხვა აღმოსავლურ ზღაპრებისგან. საინტერესოა ამ საგმირო ეპოპეიდან ერთი ბძოლის სურათის გახსენება:

სპარსეთის მბრძანებელი წავიდა ინდოეთის დასაპყრობად. ინდოეთის მეფემ გაიგო იმის წინააღმდეგ ამხედრება და თვითონაც, საბრძოლველად გამზადებული, მტერს წინ შეეგება. ძველად, როგორც მიღებული იყო, მთელი ჯარი კი არ იბრძოდა, არამედ რჩეული ფალავნები. ამ შეკვეთებაში ორივე მხრიდან ბევრი თვალსაჩინო ალავანი დაიხოცა, „მოლაშქრეთა თავები მიწაზე ხეთა ფურცელივით სცვიოდნენ“. ბოლოს სპარსეთის ლაშქრიდან გამოვიდა „თორმეტი სახელოვანი ფალავანი“, რომელთა შორის იყვნენ, ბარამჯიბილი, გარდანქეშანი და ყათრანი (ყარამნიანის ბიძაშვილი). ამათ ინდოეთის ლაშქრიდან გამოსული ფალავნები დაამარცხეს. სპარსეთის ლაშქრის წინააღმდეგ გამოვიდა ინდოეთის მეფის ასული „კეკლუტა დედოფალი“ — სარვი-ხურამან. სარვი-ხურამანი კაცურად იყო ჩაჩქანგადაცემული. იმის ვაჟობაში არავის არ შესდიოდა ეჭვი, გუმანი ვერავინ აიღო. სარვი-ხურამანმა სპარსეთის რამდენიმე გულადი ფალავანი ერთი ლახტის მოქნევით დასჯაბნა, სპარსეთის ლაშქრის სახელის აღსადგენად სარვი-



ხურმანთან შესაბრძოლებლად თვით ყარამანი თავის ექვსფეხა რაშით. ორივე ლაშქარში ატყდა ხმიანობა: „ჰკარ, მოჰკალ, შეჰკარ, შეიჰყარ“. მთელი დღე გაგრძელდა „ომი ფიცხელი“, ომი სასტიკი და უმაგალითო; ვერცერთი მეზრძოლი ვერა სჯობნიდა და ორივენი „ირკინებოდნენ“. როცა მეზრძოლთა გასაშველებლად „მწუხრის ჟამს გასაყარს ნალარს შეჰბერეს“, მონინააღმდეგენი გაშველდნენ. ორ ლაშქართ შორის თითქმის დამყარდა მშვიდობა. მაგრამ ყარამანი და სარვი-ხურმანი ისე იყვნენ ბრძოლის ჟინით ატეხილნი და ერთმანეთის წინაღმდეგობით გაღიზიანებულნი, რომ ლამით, ჩუმად გაიპარნენ ლაშქრიდან და „შორეულ ადგილას, მთის ძირში“ განაგრძეს დაუზოგავი ბრძოლა. აქ ერთმანეთა შეამტვრიეს და შეაღვინეს ლახტი და აბჯარი, შუბი და ხმალი, გურზი და ბეგთარი, ერთი სიტყვით, „ჯაჭვსა და ჯავშანსა ერთმანეთა ზენარსავით ახევედნენ“. საბრძოლველად რომ იარაღი აღარ დარჩათ, მაშინ ეს ორი რაინდი — ყარამანი და სარვინ-ხურმანი — ძალდაძალ ეტაკნენ ერთმანეთს და გაიმართა ხელჩართული ჭიდაობა... ბოლოს, როგორც იყო, ყარამანმა მოიკრიფა თავისი უკანასკნელი ძალ-ღონე, სარვი-ხურმანი დაბოჭა წელში, ასწია მაღლა და გამეტებით დაანარცხა მინაზე. სარვი-ხურმანს გული წაუვიდა, აქ მას თავისთა უნებურად მოსძვრა მუზარადი და ძირს გადმოეყარა „სუმბულის მზგავსი კავზილფნი“. ყარამანმა დაინახა რომ მისი იშვიათი მეტოქე ქალი იყო, ინდოეთის მეფის ასული; მოასულიერა და ისევ თავის ლაშქარში გაუშვა.

აი, აქ ინასკვება მათი სასიყვარულო რომანის გორგალი, რომელიც მოთხრობის რამდენიმე კარში იშლება. ამათი დახმარებით შერიგდება ის ორი უდიდესი სახელმწიფო, რომელიც ერთდროს სამტროდ იყვნენ ატეხილნი.

„ყარამანი“ იყო განცვი-იჭრების და მოულოდნელობის ნიბნი.

ამით აიხსნება მისი ჰოჰ-ლიაროზა და ის დაუბარებელი სილაზათე, რომელიც სხირად თანამედროვე მკითხველსაც იზიდავს.

არა ნაკლებ უყვარდა ხალხს „რუსუდანიანი“, რომელიც ხელთნანერად ვრცელდებოდა დაბალ ხალხში; ასლის და ქიარიმას თავგადასავალი; ყარაბოლლის ამბავი; „შვიდვეზირიანი“ და სხვ. ყველა ეს თხზულებანი მხატვრული ენით, მოსწრებული სიტყვა-პასუხით და გონება-მახვილობის ნიმუშებით არის აფერადებული.

მაგალითად: „რუსუდანიანი“. მეფის ძე ნადირობის დროს ირემს მოჰკლავს, დაჭრილი ირემი, რომელსაც აღმოაჩნდება: „რქა — ოქროსი, ჩლიქები — შავი, მკერდი — თეთრი და ნითელი ზურგი“, მეფის ძეს ეუბნება: „მე ამაღ მოვალ, რომ მსურდა იაგუნდის ქალაქში წამეყვანე, იქაური ხელმწიფის ობოლ-ქალზე საქორწილოდ. მე ვკვდები... ჩემი მარჯვენა კოჭი ამოიღე, — ჯარი ნუ გინდა, თორემ ვერ მიხვალ გამოქვაბულში, — ეს ჩემი კოჭი ააგდე და სითაც შაქს დაჯდეს, იქით იარე და სადაც ის ქალია, იქ მიხვალ“.

ასლი და ქიარიმას ლირიულ სცენებში ერთი მშვენიერი ადგილია: შეყვარებული ქიარიმა საზს უკრავს და თავის სატრფოს სიმღერით კაბის ღილებს უხსნის; ღილები ასეა მოწყობილი, რომ, როცა სიმღერა უკანასკნელ ღილამდე მიაღწევს, მთელი კაბა ისევ ხელახლა იკვრება.

ჩვენს აუდიტორიას იზიდავდა არა მარტო ისეთი სასიყვარულო რომანტიკა, არამედ თვით ყაჩად „ქოროლლის“ ცხოვრებაც თავისი „შავი ბედით“, რაინდული თავგადასავალით და სევდიანი სიმღერებით.

ქოროლლის ცხენის აღწერა ყველამ ზეპირად იცოდა:

„შეხე, ხანო, ამ ცხენის ნესტოებს — ხან განივრად იღება, თითქოს ცეცხლის ალი გადმოჰქმენავსო, ხან ერთის თვალის დახამ-

ხამებაში ნესტოები უცბად ეკუმშება; ამის ბარკლები ქორფა ჯეირნის წმინდა ბარკლებსა ჰგავს, თითქოს ისარივით გასაფრენად გამზადებულიაო; ამისი ტუჩები ნორჩი აქლემის ტუჩსა ჰგავს — იგი მაშინათვე გრძნობს სადავის ოდნავ შერხევას; როცა ქერის მარცვლებს სჭამს, ამის პირი ნისქვილის ქვასავით შრიალებს; ხერხემალი კურდღლის ზურგს ჩამოჰგავს; სწორი და გასიპული კუდი აბრემუმივით ეღვარებს და გველივით იკლაკნება; ამისი ყელი ფარშევანგის ყელს არ ჩამოუვარდება; ამისი თავი პატარაა და ზომიერი; თვალები ორ ვაშლს უგავს და კბილები — ალმასს. როცა ეს საჯინიბოდან გამოჰყავთ, ჰაერს ეთამაშება და ონავარი ბავშვივით ჩლიქებით მიწასა სთხრის. ამისთანა ცხენის პატრონმა კარგად იცის თავისი რაშის ყადრი. შენ კი ამ ცხენისათვის მამაჩემს გახურებული შანთით თვალები ამოუნვი. მე რუშანი მქვიან, ბრმის შვილი — ქოროლი; მე და ჩემი ცხენი, უგლიმო და საზიზღარო ხანო, თავისუფალნი ვართ. მობრძანდით და დამიჭირეთ“.

ყარაბოლლის ამბებშიც არის გაბედული შედარებანი: „დევებმა უთხრეს ყარაბოლლის, სანთლის ცულით რკინის კუნძი უნდა დასჩეხოვო. ყარაბოლი დაღონდა და სთხოვა, ცოტა მადროვეთო; რძალთან შევიდა და შესჩივლა. რძალმა უთხრა, მაგაზედ რად დაღონდი; გამოიღე ჩემი თმა, სანთლის ცულს ისე დაახვიე, რომ დევებმა ვერ შენიშნონ, დაჰკარ რკინის კუნძს და მაშინვე ლუკმა-ლუკმა იქცევაო. ყარაბოლიც ესე მოიქცა. დევებს გაუკვირდათ: ეს რა ყოფილაო! შემდეგ დევებმა უთხრეს: აი, ეს სავესე თასი ამ ალვის ხეზე ისე უნდა აიტანო, რომ ცვარი არ გადმოგადოვო. ყარაბოლი უპასუხა, კარგი ცოტა მადროვეთო; შევიდა რძალთან და შესჩივლა. რძალმა უპასუხა: მაგან როგორ დაგაღონა! ნაიძრო თითიდან ბეჭედი და გადასცა: ეს ბეჭედი ჩააგდე იმ თასში და ისე აიტან და ჩამოიტან, რომ ერთი ცვარიც არ გადმოვარდებაო. ყა-



რაბოლიც ასე მოიქცა, დევები დამარცხდნენ. ყარაბოლიმ გაიმარჯვა“ და სხვა...

„შვიდ-ვეზირიანი“? მართალია, „შვიდ-ვეზირიანის“ ენა არ არის ისეთი მცვრიანი, როგორც „ვის-რამიანისა“, ისეთი დარბაისული, როგორც „სიბრძნე-სიცრუისა“, მაგრამ მთელი ეს წიგნი სავსეა მშვენიერი მოთხრობებით, რომლებშიაც ქალთა ვერაგობა საუცხოვო სიუჟეტებად არის დახვეწილი. მაგალითისათვის მოვიყვანთ ერთი მოთხრობის შინაარსს: იყვნენ ცოლ-ქმარი, რომლითაც გაგიჟებით უყვარდათ ერთმანეთი. ერთხელ ქმარი ხუმრობით დანას ათამამებდა, დანა უცბად ცოლს მოხვდა, და ხელი გაეკანრა. ქმარი შეწუხდა, როგორ მომივიდა, რომ ჩემს საყვარელს ხელი გავუკანრეო, იდარდა, იავადა და ამ დარდს თან გადაჰყვა. ცოლი აღარ შორდებოდა ქმრის საფლავეს, დღენიადაგ საფლავეზე იყო და ცრემლებით მოსთქვამდა თავისი ქმრის დაღუპულ სიყვარულს. ბოლოს ამ ქალის ნათესავებმა აუშენეს სასაფლაოზე პატარა ქოხი: რადგან სულ სასაფლაოზე ხარ, ბარემ მანდ იცხოვრეო. დარჩა ქალი თავისი ქმრის საფლავეზე და მთელ დღეებს ჰგოდებდა. იმ ქალაქში ჩვეულება იყო: ქურდს ავაზაკს ჩამოაღრჩობდნენ, ჩამოკიდებულს დასტოვებდნენ და ყარაულს დაუყენებდნენ. მკვდარი რომ ვისმე მოეპარა, ყარაული სიცოცხლით აგებდა პა-

სუხს: ჩამოხრჩობილის მაგივრად ყარაული უნდა ჩამოკიდებულიყო ძელზე. ერთხელ სწორედ ამ სასაფლაოს მახლობლად ჩამოკიდდეს ერთი ავაზაკი და მკვდარს ყარაული დაუყენეს, რომ ნათესავებს არ მოეპარათ, იმ დამეს ამოტყდა საშინელი ქარაშოტი და ყინვა. ყარაულმა სიცივეს ვეღარ გაუძლო. სასაფლაოსთან შენიშნა რაღაც ქოხი, რომელშიაც ცეცხლი ენთო. მივიდა და პატრონს სთხოვა, გავიყინე, ნება მომეცი, შემოვიდე, ცოტას შევთბები და ისევ მალე წავალო; ბევრი მუდარის შემდეგ ქვრივმა შეუშვა თავისთან. ყარაული შეთბა ცეცხლზე, მადლობა გადაუხადა და თავის სადარაჯოზე დაბრუნდა, მაგრამ რას ხედავს? მკვდარი აღარ არის! რა ჰქნას? გათენდება და ყარაული უნდა ჩამოეკიდოს მის მაგივრად. იფიქრა, იფიქრა და, რომ ვერაფერი მოახერხა, ისევ იმ ქვრივთან დაბრუნდა რჩევისათვის. ქვრივმა მოისმინა ყოველივე და ბოლოს ასე უთხრა ყარაულს: მე შენ მომეწონე და, თუ პირობას მომცემ, რომ ჩემი იქნები, გამოსავალს გიჩვენებო. ყარაული დაეთანხმა. ქალმა უთხრა: ამოთხარე ჩემი ქმრის საფლავი და ის დაჰკიდე მოპარული გვამის სანაცვლოდ — მკვდარი მკვდარია და ვერავინ ვერაფერს შეიტყობსო. ყარაულმა საჩქაროდ ამოთხარა იმ ქალის ახლად გარდაცვლილი ქმრის საფლავი, რომ განთიადისთვის ყველაფერი მოესწრო.


მაგრამ როცა ამოღებულ გვამს დააცქერდა, ყარაული შეკრთა. ქვრივი შეესიტყვა: „რა მოხდა?“ ყარაულმა უპასუხა: „ვაი ჩემს თავს, იმ კაცს რომელიც მოიპარეს, კბილები სულ არა ჰქონდა, ამას კი სალი კბილები აქვსო“. „მერე რა მოხდა, — უთხრა ქვრივმა, — აიღე ქვა, ჩაარტყი და არც მაგას ექნება კბილებიო“. ყარაულმა ვერ შეძლო ამის ასრულება. მაშინ ქვრივმა თვით აიღო ქვა და თავის მკვდარ ქმარს კბილები ჩაუმტვრია. ყარაული კიდევ ყოყმანობდა. ქვრივი კვლავ შეესიტყვა: „რა მოხდა?“ ყარაულმა უპასუხა: „იმ კაცს სასირცხო არა ჰქონდა, ამას კი აქვს და ვაი თუ შეიტყონო“. ქალმა უთხრა: „მერე რაღას უყურებ? აიღე ხმალი და წარკვეთეო“. ყარაულმა კვლავ ვერ შესძლო ამის ასრულება. მაშინ ქალმა ყარაულს ნაადრო ხანჯალი და მეუღლეს სასირცხო მოჰკვეთა. ყარაულმა წაიღო ამ დიაცის ქმრის გვამი, დაჰკიდა მოპარულ ავაზაკის გვამის მაგივრად და ამგვარად გადარჩა სიკვდილს. როცა ქვრივმა ყარაულს პირობის შესრულება მოსთხოვა, ყარაულმა უპასუხა: „შორს, ვერაგო დედაკაცო, შენს მკვდარს ქმარს რომ ეს საქმე დამართე, მე ცოცხალს რაღას მიზამო!...“

„ბარამიანი“?
„ბეჟანიანი“?
„დავრიშიანი“?

მაგრამ კმარა! ეს ორიოდე ნიშუშიც საკმარისად ამტკიცებს იმას, რომ ჩვენი ძველი მწერლობა სავსეა სარომანო სიუჟეტებით, ხლართით, ინტრიგით, მოულოდნელობით, — და რა კარგი იქნებოდა, რომ ეს მდიდარი ლიტერატურული მასალა ზოგჯერ მაინც გადაეთვალისწინებინათ იმათ, რომელნიც თავიანთი მოღვაწეობით მხატვრულ შემოქმედებასთან არიან დაკავშირებული!

აი, ასეთი იყო ჩვენი ძველი თბილისის ბიბლიოთეკა!

აი, ეს „ბაზრული მწერლობა“ იყო ჩვენი სახალხო პოეტების შემოქმედების დვრიტა.





როინ მეტრეველი

საქართველო და ჩრდილოეთის კავკასია

დავით აღმაშენებლის საგარეო-პოლიტიკურ თვალსაწიერში მნიშვნელოვანი ადგილი ეკავა ჩრდილოეთის ქვეყნებსა და ხალხებს, ამიტომ, როგორც ეს მოსალოდნელი იყო, მათთან ურთიერთობა ინტენსიურად წარიმართა. ჩრდილო კავკასიის ხალხებში დავითი ხედავდა მნიშვნელოვან ძალას, რომელსაც სელჩუკთა წინააღმდეგ ბრძოლასა და ამიერკავკასიის ხალხთა კონსოლიდაციის საქმეში მნიშვნელოვანი როლის შესრულება შეეძლო.



საქართველოსა და რუსეთის ურთიერთობის სათავე უხსოვარ დროშია ჩაკარგული. ამ ორი ძველი ხალხის ნაცნობობა, სულ ცოტა, ათ საუკუნეს მაინც მოითვლის. X-XI საუკუნეების რუსეთი აღმოსავლეთ ევროპის მსხვილ პოლიტიკურ ერთეულს წარმოადგენდა.

ჯერ კიდევ IX საუკუნის შუა ხანებიდან ადრეფეოდალური კიევის რუსეთი აღმ. ევროპისა და მახლობელი აღმოსავლეთის პოლიტიკურ მოვლენათა ორბიტაში მოექცა. ბიზანტიის იმპერია ყოველმხრივ ცდილობდა, წინააღმდეგობა გაენია ახალი, წინ მიმავალი სახელმწიფოს გაძლიერებისათვის, თანაც მის თვალსაწიერში განსაკუთრებით არაბებისაგან შევიწროების შემდეგ განსაკუთრებული ფასი დაედო შავი ზღვის ჩრდილოეთით მდებარე მიწებს.

აღმოსავლური წყაროები თვალსაჩინოდ მიუთითებენ, რომ რუსეთის სახელმწიფო თავის მხრივ ისწრაფვოდა დიდი სავაჭრო-ეკონომიკური მნიშვნელობის სამდინარო თუ საზღვაო გზების ხელში ჩასაგდებად.

რაც შეეხება საქართველოს ფეოდალურ მონარქიას, როგორც ცნობილია, XI საუკუნიდან აღმავლობის გზაზე იყო და საჭირო შემთხვევაში გარკვეული ურთიერთობა ჰქონდა მეზობელ ქვეყნებთან.

ამ ურთიერთობას უმეტესნი-

ლად პოლიტიკური ინტერესები განსაზღვრავდა და კიევის რუსეთთან ურთიერთობასაც ამგვარი მიზანი უნდა ჰქონოდა.

ქართული ნატურალური წყაროების უძველესი ცნობები რუს-ვარანგებისა და ქართველების კონტაქტის შესახებ XII ს-ს განეკუთვნება. საგულისხმოა, რომ რუს-ქართველთა შეხვედრის ერთ ფაქტს აღწერს სომეხი ისტორიკოსი სტეფანოზ ტარონაცი. ზემოხსენებული ცნობები IX საუკუნისაა, მაგრამ სავარაუდოა, რომ ქართველთათვის ცნება რუსი ისე როგორც რუსი ხალხი ადრეც არ ყოფილა უცნობი, თუნდაც ის ფაქტი, რომ სუმბატ დავითის ძე რუსს ყოველგვარი კომენტარის გარეშე იხსენიებს, დასტურია იმისა, რომ ეს ცნება XI საუკუნემდეც არ იყო უცხო ქართველთათვის.

რუსის ბადალი ტერმინებია ქართულ მატრიანებსა და საბუთებში მოხსენიებული **ვარანგი** და **სკვითი**. ქართული წყაროები იცნობენ ტერმინ სკლავსაც (სლავი). ეს ტერმინი, ზოგ შემთხვევაში, ბოლღართან (ბულგარელი) არის გაიგივებული.

ქართველთა და ვარანგთა ურთიერთობის შესახებ მეტად საინტერესო ცნობაა დაცული „მატიანე ქართლისაჲში“. თხზულებაში იქ, სადაც ლაპარაკია საქართველოს მეფე ბაგრატ IV-სა და კლდეკარის ერისთავ ლიპარიტ ბაღვაშს

შორის ურთიერთობის გამწვავების შესახებ, აღნიშნულია, რომ მათ ბრძოლაში მონაწილეობდა 3 000 ვარანგანი (ვარიაგები).

ისტორიკოსებში არ არის აზრთა ერთიანობა იმის შესახებ, თუ ვის მხარეს იბრძოდნენ ვარანგნი. ერთნი მიიჩნევენ, რომ ისინი იყვნენ ლიპარიტის მხარეს, მეორენი თვლიან, რომ ვარანგნი ბაგრატ IV-სთან იყვნენ. ჩვენთვის ამ კონკრეტულ შემთხვევაში პრინციპული მნიშვნელობა არ აქვს იმ ფაქტს, თუ ვის მხარეს იბრძოდნენ ვარანგნი. ჩვენი დაკვირვებით, ისინი **სწორედ საქართველოს მეფეს უმაგრებდნენ მხარს. ასე ესმოდა ეს ფაქტი ვახუშტისაც, რომელიც აღნიშნავდა, რომ „ბაგრატს მოერთნენ 3 000 ვარანგნი, მოიყვანა მეფემან 700 მათგანი და შიდა ქართველნი“.**

ნიშანდობლივია, რომ ვარანგები შავი ზღვითა და მდინარე რიონით მოვიდნენ ბაშამდე, როგორც ჩანს, ბაში მნიშვნელოვანი პუნქტი იყო რიონის სანაოსნო მაგისტრალზე, რომელიც მეფესა და მის ადმინისტრაციას ემორჩილებოდა.

ამგვარად, **მატიანე ქართლისაჲ**



ნათელს ყოფს, რომ XI საუკუნის შუა წლებში ქართველებსა და ვარანგებს არა მხოლოდ შორეული ნაცნობობა არამედ ახლო ურთიერთობა ჰქონიათ.

რუსი ბერძნულიდან ქართულად გადმოღებულ არაერთ ნაწარმოებში გვხვდება. ცხოვრება ანდრია სალოსისა გვამცნობს: „მე ვიტყვოდი, რომ ნათესავნი მწითურთა მოვალს, რომელსა ჰქვიან რუსნი“.

გ. მთაწმინდელის მიერ ბერძნულად თარგმნილ თხზულებაში „ღვთისმშობლის მიერ სასწაულებრივი ხსნა კონსტანტინეპოლისა სპარსთა და სკვითთა ზედა მოსვლისაგან“ მოთხრობილია 62 წელს სკვითებისა და ავარების მიერ კონსტანტინეპოლის გარემოცვის ამბავი. აღნიშნულია, რომ ჰერაკლე კეისარი იყო შემუსრული მრავალგზის სპარსთა მიერ და სკვითთა ე. ი. რუსთა, აქ განსაკუთრებული მნიშვნელობა აქვს სკვითის განმარტებას.

XII ს. დასაწყისიდან დავითის მეფობის დროს რუსებსა და ქართველებს შორის ურთიერთობა კიდევ უფრო გაიზარდა. გვინდა, ყურადღება მივაქციოთ XVII ს. ერთ ცნობას, რომელიც დაცულია ანტიოქიის პატრიარქის მაკარიოსის შვილის — პავლე ალექპოელის თხზულებაში, რუსეთის (სადაც ხანგრძლივი დროის მანძილზე იმყოფებოდნენ მაკარიოსი და პავლე) სამეფო ადმინისტრაციის დავალებით, პავლე ალექპოელს შეუსრულებია საქართველოს აღწერილობა და საიდუმლო საგანმგოსათვის მიუწოდებია. აღწერილობაში არა მხოლოდ XVII ს. საქართველოზეა ლაპარაკი, არა-

მედ მისი წარსულიცაა მოცემული.

ვფიქრობთ, მართებულია მოსაზრება, რომ ამ ცნობაში შეიძლება იგულისხმებოდეს დავით აღმაშენებელსა და ვლადიმერ მონომახს შორის პოლიტიკური ურთიერთობის გარკვეული აღნუსხვა და დაკავშირებული იყოს საქართველოში ყივჩაყთა გადმოსახლებაასთან.

წყაროს მიხედვით, დავითი რუსეთში ჩასულა დახმარების სათხოვნელად. პავლე ალექპოელის ეს ცნობა სხვა წყაროებით არ დასტურდება, უნდა ვივარაუდოთ, რომ იგი ემყარებოდა რაიმე გადმოცემას ან ჩვენამდე მოუღწეველ რომელიმე წერილობით წყაროს. არ არის გამორიცხული, რომ ყივჩაღეთიდან დავით მეფის სარწმუნო კაცებს მეფის დავალებით გზა რუსული სამთავროსაკენ გაეგრძელებინათ, ყივჩაღთა მიწა ხომ უშუალოდ ემიჯნებოდა რუსულ სამთავროთა საზღვრებს.

დავითის სარწმუნო კაცთა მისვლა კიევის მთავართან ყივჩაღთა საქართველოში გადმოსახლების შესახებ ცნობის მიწოდების მიზნით, ალბათ, აუცილებელიც იყო. პ. ალექპოელის ცნობა ავტორის დროის გარსშია გახვეული, კერძოდ, ისეა დახატული ვითარება, როგორც XVII ს. საქართველოსთვის იყო დამახასიათებელი, როცა საქართველოს მეფეები რუსეთის სამეფო კარისაგან მართლაც ითხოვდნენ დახმარებას.

ალექპოელის ცნობით, დავითისათვის დახმარება აღმოუჩენიათ რუსეთში, დამხმარე ძალა მიუციათ, რომელთა საშუალებითაც მტერი უნდა გაედევნათ, ამ ძა-

ლაში ყივჩაღები უნდა იგულისხმებოდეს. მესხიამ იმასაც მიაქცია ყურადღება, რომ რუსი მემატია-ნეები ვლადიმერ მონომახს მიაწერენ ყივჩაღების განდევნას რკინის კარებს იქით საქართველოში და არა საქართველოს მეფეს, რომელმაც ეს ღონისძიება უშუალოდ გაატარა.


რუსი მემატიაანის კატეგორიულ ცნობაში ჩვენ უნდა დავინახოთ ის ფაქტი, რომ კიევის დიდმა მთავარმა, ალბათ, მიიღო მონაწილეობა ყივჩაღთა გადმოსახლებაში, ეს მონაწილეობა, თავის მხრივ, დავითსა და ვლადიმერ მონომახს შორის მოლაპარაკებას უნდა გულისხმობდეს. ნიშანდობლივია, რომ რუსეთშიც სცოდნიათ დავითის მიერ უწმინდურთა განდევნის შესახებ.

დავითის გამარჯვებებმა და წინსვლამ, ბუნებრივია, კიდევ უფრო განამტკიცა კავშირი რუსეთთან, გაძლიერებულ საქართველოსთან კავშირი, რა თქმა უნდა, ძველი რუსეთის ინტერესებშიც იყო.

ირანის ხელნაწერთა ფონდებში მაგალი თოდუამ მიაკვლია და გამოაქვეყნა XII-XIII საუკუნეების ქართველ მეფეთა და სახელმწიფო მოღვაწეთა მიმოწერა მახლობელი აღმოსავლეთის სულთნებთან.

ამ მიმოწერაში საყურადღებოა ქართველ მეფეთა ტიტულატურები, რომლითაც მათ მუსლიმანი მფლობელები მოიხსენიებენ. აი ზოგიერთი მათგანი: აფხაზის პატრონად სახელდებულ მეფე დავითისადმი გამოგზავნილ წერილში ვკითხულობთ „ქრისტეს მონაფეთა გვირგვინისა, ტახტთა და გვირგვინთა მემკვიდრეობით მპყრობელისა, აღმოსავლეთისა და დასავლეთის სტეფანოსისა, ქრისტეს სარწმუნოების მცველისა, აფხაზის, შაქის, ალანისა და რუსის მეფეთა მეფისა და ა. შ.

იმავე ადრესატისადმი სხვა წერილში ვკითხულობთ „აფხაზთა მეფეთა მეფისრუმისა და რუსის მარზპანის, ქრისტეს სარწმუნოების შემწის“ ან კიდევ „ქვეყანათა მფარველი გურჯის, აფხაზის,



ალანის, შაქისა და ხაზარის მეფეთა მეფე“.

ამთავითვე შევნიშნავთ, რომ პირველ ორ შემთხვევაში აფხაზი ნიშნავს სრულიად საქართველოს, ეს აღმოსავლეთის სხვა ავტორებთანაც კარგად ჩანს, მაგ ხაყანი შარვანი გვამცნობს, რომ „აფხაზ მოსახლე გავხდი და ქართულად მოლაპარაკეო“.

მესამე წერილში აფხაზი და გურჯი ერთადაა ნახსენები, ე. ი. აფხაზი არ არის ნახმარი სრულიად საქართველოს მნიშვნელობით, სავარაუდებელია, იგი დასავლეთ საქართველოს გულისხმობდეს.

არ უნდა გამოვრიცხოთ, რომ წერილების ადრესატი დავით აღმაშენებელია. ამ შემთხვევაში ჩვენ გვანტიერებს წერილების ადრესატის რუსის მეფედ მეფის ან რუსის მარზპანად ან კიდევ ხაზარის მეფედ მეფედ მოხსენიება, რაც შეეხება ამ უკანასკნელს, აქ ხაზარი ჩანს რუსის ბადალი. ამის დადგენა ქართული წყაროებითაც შეიძლება, ხაზარეთის ყოფილი ტერიტორია თამარის I ისტორიკოსის მიერ რუსეთად არის მიჩნეული.

ქართლის ცხოვრების სხვადასხვა ნუსხებში დადიანისეული, მაჩაბლისეული, ფალავანდიშვილისეული და სხვა, იქ, სადაც ხაზარებზეა ლაპარაკი, არშიაზე წერია „ხაზარეთი რუსეთიაო“, ისიც ნიშანდობლივია, რომ თოდუას მიერ გამოქვეყნებულ წერილებში თუ ხაზარი და ყივჩაღია დასახელებული, რუსი ნახსენები აღარ არის ან პირიქით.

სხვადასხვა ისტორიკოსთა მოსაზრებების გათვალისწინებით და მუსლიმანურ წყაროებზე დაყრდნობით, მართებული ჩანს თოდუას დასკვნები, რომ რუსი არა მარტო თანამედროვე რუსეთის ჩრდილო ნაწილს ეწოდებოდა, არამედ ამიერკავკასიაში დაფუძნებულ გარკვეულ ერთეულსაც, რუსთა ერთ გარკვეულ შტოს აღნიშნავდა და ამავე მნიშვნელობით იყო ნახმარი ეს ტერმინი ქართველი ადრესატებისადმი გამოგზავნილ წერილებში.

ეს რუსი მონყვეტილი იყო პირვანდელ საცხოვრისს და ჩრდილოეთიდან ემეზობლებოდა საქართველოს. როგორც ჩანს, ეს ერთეული ბაგრატიონთა სამეფო სახლის გავლენის ქვეშ მოქცეულა XII საუკუნეში, რაც, თავის მხრივ, ქართველ მეფეთა ტიტულატურაშიც ასახულა.

დავითს ემორჩილებოდა ერნი, ტომნი და ენანი, მეფენი და ხელმწიფენი ოვსეთისა და ყივჩაღეთისანი, სომხეთისა და ფრანგეთისანი, შარვანისა და სპარსეთისანი.

აქ მოხსენებული ფრანგეთის რაობა არ არის საბოლოოდ გარკვეული, იქნებ სწორი იყო მედიქსეთბეგი, რომელიც ფრანგეთის ნაცვლად ვრანგეთს კითხულობდა, მისი სამეფო გადაჭიმული იყო ნიკოფსიითგან დარუბანდისა ზღუდემდე და ოვსეთითგან სოვარათ და არეგანამდე.

დავითის შვილიშვილს — გიორგი III-საც „ოვსთა და ყივჩაყთა რაოდენი ათასი კაცი უბრძანეს მოვიდიან, ეგრევე შარვანის სახლი თამარსაც მორჩილებენ ოვსნი და ყივჩაღნი“.

მართებულადაა მინიშნებული ჩვენს სამეცნიერო ლიტერატურაში, რომ **გაძლიერებულ საქართველოს სამეფოსთან კავშირს რუსეთი თვითონ ესწრაფვოდა, მით უფრო, რომ დავითის დროს ყივჩაღები და ოსები უკვე საქართველოს ყმადნაფიცები იყვნენ და ყივჩაღთა თავდასხმების თავიდან აცილება და სამხრეთ-დასავლეთ საზღვარზე მშვიდობიანობის უზრუნველყოფა საქართველოსთან კეთილმეზობლური ურთიერთობის დამყარებით იყო შესაძლებელი.**

დავითი განსაკუთრებულ ყურადღებას აქცევდა ჩრდილოეთ კავკასიის ხალხებთან, განსაკუთრებით ოსებთან და ყივჩაღებთან, ურთიერთობას.

ოსები გამოირჩეოდნენ სხვა ჩრდილოკავკასიელი ეთნიკური ელემენტებისაგან თავისი სოციალურ-ეკონომიკური და პოლიტიკური განვითარების დონით.

ალანთა სამეფოს მნიშვნელო-

ვანი ტერიტორია ეკავა კავკასიის ცენტრალურ და დასავლეთ ნაწილში. ოსეთისა და საქართველოს ურთიერთობა ინტენსიური ხდება XI საუკუნიდან, როცა ფეოდალური საქართველოს პოლიტიკური გაერთიანების საქმეში ამ პოლიტიკურმა ერთეულმა გარკვეული მნიშვნელობა შეიძინა. ამით არსებითად განისაზღვრა ფეოდალური საქართველოსა და ოსეთის ურთიერთობის კეთილმეზობლური ხასიათი.

გიორგი I-მა და ბაგრატ IV-მ ოსებთან დამოყვრებით კიდევ უფრო განამტკიცეს მათთან ურთიერთობა.

დავითის დროს, როცა ყივჩაღთა ჩამოსახლების საკითხი დაისვა, რუსეთთან ურთიერთობაც ახლებურ მიდგომას მოითხოვდა. საქმე ისაა, რომ ყივჩაღებს მტრული დამოკიდებულება ჰქონდათ ოსებთან და საქართველოს მეფეს ქმედითი ღონისძიების გატარება დასჭირდებოდა ყივჩაღთა საქართველოში ჩამოსაყვანად, რადგან ყივჩაღეთს და საქართველომდე ოსეთი იყო გასავლელი.

საქართველოს მეფემ დროულად იზრუნა ამ საკითხზე, საგულისხმოა, რომ თამარის I ისტორიკოსის ცნობით, დავითის ერთი ქალიშვილი ოსეთში ყოფილა გათხოვილი.

ისტორიკოსთა ერთი ნაწილი ამ ცნობას სარწმუნოდ მიიჩნევს. ზოგიერთი ფიქრობს, რომ, თუ საკუთრივ დავითის ასული არა, სამეფო სახლის რომელიღაც წევრი მაინც უნდა ყოფილიყო ოსეთის სამეფო კარზე გათხოვილი.

ოსეთთან ურთიერთობის განმტკიცების მნიშვნელობის დამადასტურებელია ის ფაქტი, რომ თვით დავითი და მისი ვაზირი გიორგი ჭყონდიდელ-მწიგნობართუხუცესი წარემართა ოსეთს. მართებულადაა შენიშნული ჩვენს ისტორიოგრაფიაში, რომ დავითის ოსეთში გადასვლა მხოლოდ ყივჩაღთათვის გზის უზრუნველყოფა არ ყოფილა.

არსებითი იყო ჩრდილოეთ კავკასიისა და საქართველოს დამაკავშირებელი საუღელტეხილო



გზების დაკავება. იმხანად დარი-
ალსა და სხვა უღელტეხილებზე
კონტროლს ოსები ახორციელებ-
დნენ. ძლიერი ფეოდალური სა-
ქართველოსათვის აუცილებელი
შეიქმნა აღნიშნული გადასასვლე-
ლების დაუფლება და დავითის მი-
სიაც ამას ისახავდა მიზნად.

ნიშანდობლივია, რომ ოსეთში
შესულ დავითს „მოეგებნეს მეფე-
ნი ოსეთისანი და ყოველნი მთა-
ვარნი მათნი და ვითარცა მონანი
დადგეს წინაშე მისსა“. აქ საგუ-
ლისხმო მომენტი, რომ დავითმა
მძევლები ჩამოართვა როგორც
ოსებს, ისე ყივჩალებს და „ესრეთ
ადვილად შეაერთა ორივე ნათე-
სავნი“. რა თქმა უნდა, არ არის გა-
მორიცხებული, რომ დავითს თან ახ-
ლდა გარკვეული სამხედრო ძა-
ლაც.

შემდეგი ეტაპი დავითის მოქმე-
დებისა ის არის, რომ მან აიღო და
დაიკავა ციხენი დარიალისა და
ყოველთა კართა ოვსეთისათა და
კავკასიისა მთისათანი.

უდავოა, რომ კავკასიის უღელ-
ტეხილების დაკავება საქართვე-
ლოს მიერ უდიდესი მნიშვნელო-
ბის პოლიტიკური აქტი იყო, ამას-
თან, ამ პერიოდიდან, თუ უფრო
ადრე არა, ოსეთი საქართველოს
ყმადნაფიცი ქვეყანა გახდა.

საერთოდ უნდა აღინიშნოს,
რომ ჩრდილოეთ კავკასიის ხალ-
ხებიდან ოსები გამოირჩეოდნენ
საქართველოსთან მჭიდრო ურ-
თიერთობით, ისინი კულტურული
და სოციალურ-ეკონომიკური
თვალსაზრისითაც სხვებზე მაღ-
ლა იდგნენ, რაშიც გარკვეული
როლი შეასრულა ქრისტიანული
რელიგიის გავრცელებამ.

საქართველოსა და ჩრდილოეთ
კავკასიის ხალხებს შორის ურთი-
ერთობაში ერთობ მნიშვნელოვანი
მომენტი მცდელობა ამ უკა-
ნასკნელთა გაქრისტიანებისათ-
ვის. ოსთა გაქრისტიანებას უკავ-
შირდება კონსტანტინეპოლის
პატრიარქ ნიკოლოზ მისტიკოსს
და აფხაზთა მეფე გიორგის.

ოსთა გაქრისტიანების აქტიდან
აშკარად ჩანს ოსეთის და მთელი
ჩრდილოეთ კავკასიის ხალხთა
მისწრაფება საქართველოსაკენ,

რომელიც კავკასიასა და წინა
აზიაში ნამყვანი ქვეყანა იყო.

ქრისტიანობის საშუალებით სა-
ქართველო მთის მოსახლეობას
თავის პოლიტიკურ, ეკონომიკურ
და კულტურულ გავლენას უმორ-
ჩილებდა. ზოგჯერ ამგვარ მცდე-
ლობას ჩრდილოეთ კავკასიელი
ხალხებიდან გარკვეული რეაქცი-
აც მოჰყვებოდა, ასე იყო თამარის
დროს დიდოელებისა და ფხოვე-
ლების გამოსვლა, რომელიც თა-
ვისი არსით იყო ფეოდალიზმი-
სათვის რეოლუციური ოპოზიცი-
ის ერთგვარი გამოვლინება.

უშუალო მწარმოებელი მასის
მძლავრი რეაქცია გაბატონებუ-
ლი კლასის ცდაზე, გაეძლიერები-
ნათ ექსპლუატაცია ფეოდალურ
ურთიერთობაში მთის მოსახლე-
ობის ჩაბმით და გავრცელებინათ
ქრისტიანობა.

ნიშანდობლივია, რომ ოსეთში
გადასვლისას დავითს თან ახლდა
გიორგი ჭყონდიდე-მნიგნობარ-
თუხუცესი. ამ აქტში ქრისტიანუ-
ლი რელიგიის გავრცელება-განმ-
ტკიცებისათვის ზრუნვა მოჩანს.

ფაქტია, რომ **დავითმა თავისი
ენერგიული მოქმედებით ხელში
ჩაიგდო კავკასიის გადასასვლე-
ლები, რომელთაც დიდი სტრატე-
გიული მნიშვნელობა ჰქონდა და
ოსეთი მტკიცედ შემოიყვანა თავი-
სი მორჩილების ქვეშ ყმადნაფი-
ცობის პირობაზე. ამიერიდან სხვა
ხალხებთან და ქვეყნებთან ერთად
დავითს „აჩრდილსა შეკრებილ
იყვნეს ერნი, ტომნი და ენანი, მე-
ფენი და ხელმწიფენი ოსეთისა“.**

დავითის დროის საქართველოს
ურთიერთობა ჰქონდა ჩაჩნეთ-ინ-
გუშეთთან (ქართული წყაროებით
დურძუკები კავკასიონი), დაღეს-
ტნის ხალხებთან ადიღელთა,
ჯიქნი, ქაშაგნი (ამ უკანასკნელ-
თან დამაკავშირებელ რგოლს
აფხაზეთი წარმოადგენდა).

საქართველოსა და ქართული
კულტურის გავლენა ჩრდილო
კავკასიის ხალხებზე უდავოა. ქარ-
თველებისა და ჩრდილოეთ კავკა-
სიის ხალხთა ურთიერთობამ თა-
ვისი კვალი დატოვა, არაერთი
ქართული სიტყვა შევიდა ჩრდილო
კავკასიელი ხალხების ლექსიკურ

ფონდში, გავრცელდა ქართული
დამწერლობა, ხშირია ქართული
წარწერები (დაღესტანში ოცამდე
ქართული წარწერაა დამონმებუ-
ლი), შეიმჩნევა ქართული სტილის
გავლენა არქიტექტურაში.

**დავითის საგარეო პოლიტიკაში
მნიშვნელოვანი იყო დარუბანდის
საკითხი.** გეოგრაფიულმა გარე-
მომ, ეთნიკურმა, სოციალურმა და
პოლიტიკურმა ვითარებამ შექმნა
ის ბაზა რომელზეც ჩამოყალიბდა
დარუბანდის ქალაქი-სახელმწი-
ფო. დარუბანდზე გამავალი საქა-
რავნო გზის მიმართ არ იყვნენ
ქართველები გულგრილნი. დავი-
თი დიდად აფასებდა კასპიის კა-
რის სტრატეგიულ მნიშვნელობას
და ყოველგვარად ცდილობდა თა-
ვის გავლენის გავრცელებას.

1124 წლის აპრილში დავითის მო-
ლაშქრეები დაესხნეს შაბურანს
(დარუბანდელსა) და „მოსრნეს
ქურდნი, ლეკნი და ყივჩაღნი და-
რუბანდელისანი და აღიხუნეს შარ-
ვანისა ციხენი ღასანი და ხოზონდი
და მიმდგომი მათი ქვეყანა», შემ-
დგომში როგორც ჩანს, დავითს და-
რუბანდიც ხელთ უგდია.

ერთი სიტყვით, ჩრდილოეთ კა-
ვკასიის ქვეყნები და ხალხები ფე-
ოდალური საქართველოს სამეფო
კარის საგარეო პოლიტიკაში
მნიშვნელოვან ადგილს იჭერდ-
ნენ.

დავითი ანდერძში აცხადებს,
რომ მმართველი ჩრდილოეთი კავ-
კასია მას ემორჩილებოდა. ამას-
თან, ჩვენს ისტორიოგრაფიაში გა-
მოთქმული მოსაზრება, რომ დავი-
თი ჩრდილოეთის ქვეყნებთან მხო-
ლოდ თავდაცვის უზრუნველყო-
ფაზე ფიქრობდა, არ ჩანს მთლად
სწორი. გარკვეულ შემთხვევაში,
საქართველოს სამეფო კარი შეტე-
ვით ოპერაციებსაც ატარებდა და
ამ გზითაც მშვიდობიან, მოლაპა-
რაკების დიპლომატიასთან ერ-
თად ეუფლებოდა ჩრდილოეთით
მიმდებარე ქვეყნებს.

ჩრდილოეთ კავკასიელ ხალხთა
ქრისტიანიზაცია-ფეოდალიზაცი-
აც მხოლოდ მშვიდობიანი გზით არ
ხდებოდა და აქაც ძალა გამოიყე-
ნებოდა, ეს შემდგომ საუკუნეებ-
შიც გრძელდებოდა.



დავით გოგიშვილი:

ერეკლე მეფეზე უკეთესი ნაბიჯი ქვეყნის გადასარჩენად არავის გადაუღბამს

ერეკლე მეორეს ცხოვრებასა და მოღვაწეობაზე ისტორიკოსი დავით გოგიშვილი გვესაუბრება:



— ვიდრე ერეკლე მეფის მოღვაწეობაზე დავიწყებდეთ საუბარს, მინდა, მთავარი ვთქვა: ქართველმა საზოგადოებამ მას შემდეგ, რაც დამოუკიდებლობა გავხდით, ტერმინები — „ერის მოლაღატი“ და „სამშობლოს გამყიდველი“ ლირიკისა და ფოლკლორის ნაწილად აქცია, რაც ყოველად დაუშვებელია. ერის მოლაღატი არის უმძიმესი ბრალდება და ყველა ნორმალურ ქვეყანაში ამ სტატუსს ანიჭებენ ადამიანს, რომელსაც ბრალდებას სასამართლო პროცესით უმტკიცებენ. ჩვენმა ყოფილმა პრეზიდენტებმა ტერმინი „სამშობლის მოლაღატი“ უაპელაციოდ დაამკვიდრეს და, ვისაც მოისურვებენ, იმას უნოდებენ, რაც, კიდევ ერთხელ ვიმეორებ, ყოველად დაუშვებელია.

ერეკლე მეორეს მოღვაწეობის პერიოდი საქართველოს ისტორიაში ერთ-ერთი მძიმე პერიოდია, მაგრამ, მიუხედავად ამისა, **ერეკლე მეორე არის მეფე, რომელმაც 80 წლამდე ისე იცოცხლა, რომ ბრძოლა არ დაუბრუნა. ის გახლდათ უძლიერესი მთავარსარდალი, დაუმარცხებელი, ამიტომ, მას რომ მოლაღატი უნოდო, დანაშაულია. თანაც, ხომ ბააჩინია, ამას ვინ ამოგზს? — ადამიანები, რომლებსაც ერთი ხე არ დაურბამთ და ქვეყნის სასიკეთოდ ნაბიჯი არ გადაუღბამთ. მათი ეს საქციელი ამორალურია.**

მეფე ერეკლე 1762 წელს ქართლ-კახეთის სამეფოს ერთპიროვნული მმართველი გახდა და რამ-

დენიმე მწვავე პრობლემის წინაშე დადგა, რომელთა მოგვარებაც მხოლოდ რუსეთის იმპერიას შეეძლო, სწორედ ამიტომ 1783 წელს გეორგიევსკის ციხესიმაგრეში ტრაქტატს მოეწერა ხელი.

1784 წელს, გეორგიევსკის ტრაქტატიდან ერთი წლის თავზე, გარდაიცვალა იმერეთის მეფე სოლომონ პირველი და სამეფო კარზე არეულობა დაიწყო. ერეკლე მეფეს შეეძლო, ამ არეულობით ესარგებლა და დასავლეთ საქართველო შემოეერთებინა. იმერელ თავადთა დელეგაცია ეწვია მეფე ერეკლეს და შესთავაზა, გადაეხედა გეორგიევსკის ტრაქტატისათვის, რომლის საფუძველზეც შეეძლო, აჭარის გარდა, ყველა რეგიონის შემოერთება, მაგრამ მეფემ ეს არ გააკეთა.

იმხანად საქართველოს მოსახლეობა კატასტროფულად იყო შემცირებული. სხვადასხვა ციფრი სახელდება: ზოგი ამბობს 800 ათასს, ზოგი — 700 ათასს. ზუსტი მონაცემები არ არსებობს, მაგრამ ერთი რამ ფაქტია: იმ პერიოდის აღმოსავლეთი საქართველო ეკონომიკურად ძალიან დასუსტებული იყო — პრაქტიკულად მინასთან გასწორებული. სწორედ აქედან გამომდინარე, ვერავინ შეედავება ერეკლე მეფეს გეორგიევსკის ტრაქტატზე ხელის მოწერის გამო. ეს უნდა მომხდარიყო. მეფე ერეკლემ შეცდომები გეორგიევსკის ტრაქტატზე ხელმოწერის შემდეგ დაუშვა.

ამ საკითხამდე რადგან მივიდით, ერთ გარემოებას უნდა გავუსვავთ ხაზი. ქართველები დიდ

შეცდომას ვუშვებთ, როდესაც სომეხ ხალხს მკვეთრად გამოხატული პრორუსული ორიენტაციის გამო ვაკრიტიკებთ. მართალია, აქვს სომეხ ხალხს ცალკეული არაკორექტული გამოხდომები, მაგრამ არ უნდა დაგვავიწყდეს, რომ სომხეთის პრორუსულობას აქვს ობიექტური საფუძვლები. სომხეთი გარშემორტყმულია მისდამი არაკეთილგანწყობილი სახელმწიფოებით და ბუნებრივი და ლოგიკურია ის, რომ გამუდმებით ეძებს საიმედო სტრატეგიულ პარტნიორს.

ერთი რამ უნდა გვახსოვდეს: საგარეო პოლიტიკაში რა დოზითაც მოვახდენთ სომხეთის ფაქტორის იგნორირებას, იმ დოზით იქნება ჩართული სომხეთი ანტიქართულ შეთქმულებაში. ასე მოხდა ერეკლე მეფის პერიოდშიც. **ისტორიკოსთა დიდი ნაწილი მიიჩნევს, რომ ერეკლე მეფის კარზე მრჩეველების სტატუსით მოღვაწე იოსებ ბაგუთოვი და არტემ არარატელი „თვალნი და ყური“ იყვნენ ეპატარიანი მეორისა.**

მეფე ერეკლემ ეკონომიკურად გაჩანაგებულ ქართლ-კახეთში, მისი შემდგომი ათვისების მიზნით, სომხური მოსახლეობის ჩა-



მოსახლება დაიწყო. ამ საქციელში იყო ლოგიკა. ქართლ-კახეთის სამეფო ეკონომიკურად მიწასთან იყო გასწორებული, აყრილი იყო მოსახლეობა. სამომავლოდ სწორედ ეს სომეხი მოსახლეობა გახდა გადამწყვეტი ფაქტორი რუსეთის სასარგებლოდ მოვლენათა განვითარებისა. როდესაც ერეკლეს სამეფო კარზე აქტიურად დაიწყო ლაპარაკი გეორგიევსკის ტრაქტატის გადასინჯვაზე, ეს ამბავი სომეხებმა მყისიერად ეკატერინეს აცნობეს.

მე-17 საუკუნის მეორე ნახევარი და მე-18 საუკუნე — ეს არის ეპოქა, როცა საქართველოში გააქტიურებას იწყებს ვატიკანი და კათოლიკური მისიები. მოგზაურები და მისიონერები ქვეყნაში ვითარებას შეისწავლიდნენ. იქმნებოდა შთაბეჭდილება, თითქოს ქართველების მიერ განიხილებოდა არსით ანტირუსული სარწმუნოების — კათოლიციზმის მიღება. ჩვენ დღესაც გვყავს აღმსარებლობით კათოლიკე ქართველები, რომელსაც ქართულმა ისტორიოგრაფიამ კათოლიციზმთან, საზოგადოდ, საფრანგეთთან ასოცირების გამო, „ფრანგები“ უწოდა. ამ „თამაშმა“ 1795 წელს მოიტანა კრწანისის ბრძოლა, რომელიც ეკატერინე მეორის ნაქეზებით მოხდა.

დღევანდელი ქართული პოლიტიკის შეცდომა ცნორედ ის არის, რომ რუსეთს „ეთამაშება“. რუსეთთან „თამაში“ კი არც ერთ ეპოქაში არ არის გამართლებული.

— რა მოუტანა გეორგიევსკის ტრაქტატმა სასიკეთო ჩვენს ქვეყანას?

— გეორგიევსკის ტრაქტატი რომ არა, ეროვნულ თვითმყოფადობას ვერ შევინარჩუნებდით. ქართველი ხალხი სწორედ ამ ტრაქტატის წყალობით გადაარჩა. იმ პერიოდისთვის ქართველთა გადაარჩენის სხვა ალტერნატივა არ არსებობდა. რომ ყოფილიყო საქართველოს უსაფრთხოებისა და ეროვნული ინტერესების დაცვის სხვა, უფრო ქმედითი ალტერნატივა და ერეკლე მეორეს უარი ეთქვა, მაშინ შეიძლებოდა,

გვემსჯელა მის მიერ ტრაქტატის მიმართ გადადგმული ნაბიჯის სამართლიანობაზე.

— რა არის გეორგიევსკის ბაფთა?

— გეორგიევსკის ბაფთა არის ნმინდა გიორგის სახელობის ორდენის ბაფთა. ეს ორდენი ეკატერინე მეორის პერიოდში დაწესდა რუსეთის იმპერიაში და გამოჩენილ მხედართმთავრებს აჯილდოვებდნენ. გეორგიევსკის ციხესიმაგრე, რომელიც ჩრდილოეთ კავკასიაში მდებარეობდა, ერთ-ერთი მნიშვნელოვანი ფორპოსტი იყო რუსეთისთვის, იქიდან მთელ კავკასიას აკონტროლებდნენ. საქართველოსა და რუსეთს შორის ტრაქტატის ხელის მოწერის ცერემონიაც სწორედ იქ გაიმართა.

გეორგიევსკის ბაფთის ქვეშ ქართველებსა და რუსებს ერთობლივად ბევრი ომი ბვინდარობია. ამ ბაფთის ქვეშ ერთად ვიბრძოდით თურქეთის წინააღმდეგ. 1828-29 წლებში შეიშინეთი ახალციხე, 1877-78 წლებში — აჭარა და ტაო-კლარჯეთი. ერთობლივად ვიბრძოდით რუსეთ-იაპონიის ომში, ყირიმის და შემდეგ უკვე, დიდ სამამულო ომში. გეორგიევსკის ბაფთით არიან დაჯილდოებული ქართველი მამრები: 46-ე არმიის სარდალი კონსტანტინე ლესელიძე, პორფირა ჩანჩიბაძე, პეტრე ჩხობაძე და ვინ მოთვლის კიდევ რამდენი ქართველი მებრძოლი... ეს ადამიანები კი ებრძოდნენ ფაშისტებს. 70 ათასი ქართველი მხოლოდ ქარჩის ყურაში მკვდარი.

გეორგიევსკის ორდენი არის რუსეთის საბრძოლო, სამხედრო წესდების განუყოფელი ნაწილი, ამით რუსეთი თავის ოფიცრებს აჯილდოებს.

9 მაისს, ფაშაზე გამარჯვების დღეს, ვილაც გეორგიევსკის ბაფთით რომ დადის, არ შეიძლება მას მოლაღატე ვუნდოთ, რადგან ეს ბაფთა, როგორც რუსეთის, ასევე საქართველოს ისტორიის განუყოფელი ნაწილია...

ერეკლე მეორე — ეს დიდებული მეფე უალრესად ტრაგიკული ბედისა გახლდათ. მას გარემოებებმა ხელი არ შეუწყო, რომ კრწანისის ბრძოლა თავიდან აერიდებინა. **ერეკლე მეორის ყველა გადაწყვეტილება იყო ზუსტი. ის გახლდათ უდიდესი მეფე, რომელი სახელთანაც დაკავშირებულია ჩვენი თვითმყოფადობის გადაარჩენა. დღეს რომ ვარსებობთ ქართველები, ერეკლე მეორის დიდი დამსახურებაა.**

— როდიდან დაიწყო მეფე ერეკლეს დადანაშაულება?

— 1988 წელს ეროვნულ-დემოკრატიული პარტიის ლიდერებმა შიმშილობა დაიწყეს. შიმშილობა კომუნისტური პარტიის ყრილობაზე მიხეილ გორბაჩოვის გადაწყვეტილებას მოჰყვა, რომ საბჭოთა კავშირის კონსტიტუციიდან ამოეღოთ მუხლი კავშირის შემადგენლობიდან რესპუბლიკების ნებაყოფლობით გასვლის თაობაზე... სწორედ ამ შიმშილობისას გაისმა პირველად ის საკრალური, „ზეპოლიტიკური“ ფრაზა — მივმართოთ ჩრდილოატლანტიკურ ალიანსს, საქართველოში ჯარები შემოიყვანოსო. იმ პერიოდში პოლიტიკოსები ბეცები იყვნენ და არ იცოდნენ, რომ ჩრდილოატლანტიკური ალიანსი აქ ჯარს არ შემოიყვანდა... თანაც იმ მომენტში თბილისში რუსული ჯარი იდგა. არსებობდა საბჭოთა კავშირი, იყო ამიერკავკასიის წითელდროშოვანი სამხედრო ოლქი, არსებობდა იგორ როდიონოვი და ა.შ. და გაკეთდა განცხადება ნატოში შესვლისა. სწორედ ამ უპასუხისმგებლო პოლიტიკოსებისგან მოდის ერეკლე მეფის დაკნინების მცდელობაც. ძალიან კარგად მახსოვს, რას წერდა იმდროინდელი პრესა. მახსოვს, ბევრი „მგოსნისა“ და შარლატანი პოლიტიკოსის ინტერვიუები, რომლებიც ერეკლე მეფეს ცუდი ეპითეტებით ამკობდნენ... არადა, **ერეკლე მეფეზე უკეთესი ნაბიჯი ქვეყნის გადასარჩენად დღემდე არავის გადაუდგამს.**

საუბარი ჩაიწერა
ეკა ნასყიდაშვილმა



ვორონცოვი — საქართველოში კორონისა და სიყვარულის დაბნელება

1840-იანი წლების დასაწყისში უაღრესად გამწვავდა მდგომარეობა ჩრდილოეთ კავკასიაში, სადაც შამილმა რუსულ ჯარებზე ზედიზედ მოიპოვა შთამბეჭქდავი გამარჯვებები; ამასთანავე, ახალი ძალა და მასშტაბები შეიძინა მიურიდიზმმაც, რომელიც ყოველი არამართლმორწმუნის (არამუსლიმის) უპირობო ფიზიკურ განადგურებას ითვალისწინებდა და ჩრდილოეთ კავკასიაში ანტიკოლონიური ბრძოლის არა მხოლოდ სარწმუნოებრივი, არამედ პოლიტიკური იდეოლოგიის ქვაკუთხედად იქცა. მეორე მხრივ, პოლიტიკური რეჟიმისადმი ქართველი თავადაზნაურობის „სერვილური“ დამოკიდებულება ქმნიდა საფუძველს, ამიერკავკასია ზოგადად და, კერძოდ, საქართველო სამხედროდან სამოქალაქო მმართველობით სისტემაზე გადასულიყო.

ნიკოლოზ I-მა გადაწყვიტა, კავკასიის მართვა ჩაებარებინა ისეთი პიროვნებისათვის, რომელშიც გაერთიანებული იქნებოდა პოლიტიკური, ადმინისტრაციული, სამხედრო და დიპლომატიური ნიჭი და პრაქტიკული შესაძლებლობები. 1844 წლის დეკემბერში იმპერატორის არჩევანი შეჩერდა გრაფ მიხეილ ვორონცოვზე (1782-1856), რომელიც იმ დროისათვის იყო რუსეთსა და ევროპაში სახელმძღვანელო გენერალი, რუსეთის სახელმწიფო საბჭოს წევრი, პეტერბურგის მეცნიერებათა აკადემიის საპატიო წევრი, ნოვოროსიის გენერალ-გუბერნატორი და ბესარაბიის სრულუფლებიანი ნამესტნიკი. ამასთანავე, ვორონცოვი იყო უაღრესად განათლებული და დიპლომატიური უნარით აღჭურვილი სახელმწიფო მოღვაწე, რომელიც ჯერ კიდევ 1800-იანი წლების დასაწყისში მსახურობდა საქართველოში მთავარმართებელ პავლე ციციანოვთან და იცნობდა ამიერკავკასიასა და მის თავისებურებებს.

თავის მხრივ, ვორონცოვმა წამოაყენა აუცილებელი პირობა, რომელიც ითვალისწინებდა კავკასიის გარდაქმნას სამეფოსნაცვლოდ და მეფისნაცვლისათვის

გადაწყვეტილებათა მიღების საგანგებო, რუსეთის იმპერიისათვის უპრეცედენტო უფლების მინიჭებას — არსებითად პირდაპირ იმპერატორს დაქვემდებარებული ადმინისტრაციული ავტონომიის შექმნას, რისი პირობაც ვორონცოვმა ნიკოლოზ პირველისგან მიიღო კიდევ (კავკასიაში წამოსვლის წინ იმპერატორმა ვორონცოვს უთხრა: „შენ იქნები ალტერ ეგო“).

ბრიტანეთში განსწავლულ, ბრიტანულ პოლიტიკურ და დიპლომატიურ გამოცდილებაზე აღზრდილ მიხეილ ვორონცოვს სწამდა, რომ ენობრივი და კულტურული მრავალფეროვნება წყარო იყო იმპერიის ძლიერებისა და არა მისი სისუსტის მაჩვენებელი. იგი კავკასიაში ჩამოვიდა ფართო და საფუძვლიანი რეფორმისტული გეგმით, რომელიც ითვალისწინებდა, ერთი მხრივ, საქართველოს (ზოგადად, კავკასიის) უმტკივნეულო პოლიტიკურ-ეკონომიკურ შერწყმას რუსეთის ერთიან და განუყოფელ სახელმწიფოებრივ სივრცეში, ხოლო მეორე მხრივ, ევროპეიზაციის გზით ქართული კულტურის აღორძინებასა და განვითარებას.



ვორონცოვის ცხრანლიანი მმართველობის პერიოდში, მისივე ინიციატივითა თუ განმსაზღვრელი მნიშვნელობის მხარდაჭერით თბილისში დაარსდა რუსული და ქართული თეატრები, იტალიური ოპერა, საბალეტო დასი, საჯარო ბიბლიოთეკა, სალიბერალური ჟურნალი „ცისკარი“, კავკასიის მუზეუმი, „რუსეთის გამოგრაფიული საზოგადოების კავკასიის განყოფილება“ (თავისი პერიოდული გამოცემით), კავკასიის სასწავლო ოლქი, ახალი ფორმები და შინაარსი შეიქმნა სასწავლებლებში ქართული ენისა და სიტყვიერების სავალდებულო სწავლება (მათ შორის, არაქართველთა და იმ სამხედრო პირთა შვილებისათვის, რომლებიც მხოლოდ დროებით იმყოფებოდნენ საქართვე-



ლოში), ახალგაზრდებისათვის ხაზინის ხარჯზე დაარსდა 160 სტიპენდია რუსეთის უმაღლეს სასწავლებლებში განათლების მისაღებად, განისნა გიმნაზიები თბილისსა (კომარცინული) და ქუთაისში, მთელი საქართველოს მასშტაბით დაფუძნდა სკოლები (გიჟვინთა, ოზურგათი, თიანეთი და სხვ.). ვორონცოვმა საგანგებო ყურადღება გაამახვილა ქალთა განათლებაზე, რისთვისაც თბილისსა და ქუთაისში დააფუძნა წმ. ნინოს სახელობის ქალთა სასწავლებლები და რეალური შინაარსი და ფუნქცია მისცა თბილისში 1840 წელს დაარსებულ „ამიერკავკასიის ქალთა ინსტიტუტს“ (1855 წლის მონაცემებით, საქართველოში უკვე არსებობდა სხვადასხვა ტიპის “147 სასწავლებელი 6023 მოწაფით” - ვ, გვ. 298-300).


ვორონცოვი უშუალოდ მეურვეობდა საქართველოს ისტორიისა და ქართული კულტურის ისტორიის შესწავლა-პოპულარიზაციას, ისტორიული ძეგლებისა და ეკლესია-მონასტრების აღდგენა-რესტავრაციას, ძველი ქართული ტექსტების გამოცემას (ხშირ შემთხვევაში, საკუთარი ხარჯით; მანვე მიაღწინა 1849 წელს პ. იოსელიანი ათონის ქარ-

თულ მონასტერში იქ დაცული სიძველეების შესასწავლად), ინვესტირება რუს და უცხოელ მეცნიერებს (მ. ბროსე, გ. აბინი, ი. ბარტოლომეი, ა. მურავიოვი, ნ. ხანიკოვი და სხვ.), მორალურად თუ მატერიალურად ხელს უწყობდა ლიტერატურული პროცესების აღორძინებასა და განვითარებას, მისი უშუალო დავალებით დ. მეღვინეთუხუცესის მიხედვით არქეოლოგიური თვალსაზრისით შეინაწავლა უფლისციხე და ა. შ. საგულისხმოა, რომ 1854 წელს, როდესაც ავადმყოფობის გამო ვორონცოვი იძულებული გახდა, იმპერატორისათვის ხანგრძლივი შვებულება გამოეთხოვა (ამის მერე ველარც დაბრუნდა კავკასიაში), მან თავის შემცვლელს, გენერალ რეადს დაუტოვა ინსტრუქცია, რომელშიც სპეციალურადაა აღნიშნული, რომ არ უნდა შენელებულიყო კავკასიის ხელისუფლების საგანგებო ზრუნვა ქართული კულტურის განვითარებაზე... ვორონცოვი ხაზგასმით გამოხატავდა პატივისცემას ქართული ენის, ქართველი ხალხის ისტორიის, კულტურის, ადათ-წესებისა თუ ზნე-ჩვეულებების მიმართ (სხვათა შორის, ქართლ-კახეთის ყოფილი სამეფო ოჯახის წევრთა მიმართაც). როგორც ჩანს, იგი მიიჩნევდა, რომ ქართველთა ენობრივი და კულტურული (ამ სიტყვის ფართო მნიშვნე-

ლობით) თვითმყოფადობა საფუძვლად უნდა დასდებოდა რუსეთის ერთიანი და განუყოფელი იმპერიის ფარგლებში საქართველოს, როგორც ავტონომიური უფლებებით აღჭურვილი პოლიტიკურ-ადმინისტრაციული ერთეულის, ჩამოყალიბებას.

საგანგებოდ უნდა ითქვას, რომ ვორონცოვს საქართველოს აღორძინების ერთადერთ გზად მიაჩნდა ქართული საზოგადოებრივ-პოლიტიკური, სოციალურ-ეკონომიკური, კულტურულ-საგანმანათლებლო და სალიტერატურო ცხოვრების ევროპეიზაცია, რაც ძირითადად ეწინააღმდეგებოდა რუსეთის სახელმწიფოებრივ-იდეოლოგიურ პოლიტიკას — რუსეთის მონარქია საქართველოში ევროპეიზმის ერთადერთ წყაროდ რუსულ კულტურას, ცხოვრებისა და აზროვნების რუსულ წესს მიიჩნევდა (ამჯერად ყურადღებას ვამახვილებთ მ. ვორონცოვის კულტურულ-საგანმანათლებლო პოლიტიკაზე და აღარაფერს ვამბობთ მის ეკონომიკურ რეფორმებზე.

არჩილ ჯორჯაძის შეხედულებით, „ვორონცოვის დანიშვნა კავკასიის ნამესტნიკად ფრიად სასარგებლო და გამოსადეგი გახდა ქართულ ახალ კულტურის აღორძინებისათვის. მიძინებული ერი თითქოს გამოფხიზლდა და დეზორგანიზაციაში მოყვანილი საზოგადოებრივი სხეული გამრთელების და განკურნების იმედმა შეიპყრო... ვორონცოვის ხანა შეიქმნა ქართულ კულტურის აღორძინების ხანად... ვორონცოვის პოლიტიკა იყო სწორედ ის პოლიტიკა, რომელსაც საუკუნეების განმავლობაში ამაოდ ეძებდა რუსეთის მმართველობის წრეში ქართველთა პოლიტიკური აზროვნება - ერთგულება და მჭიდრო კავშირი რუსეთთან, ხოლო ნაცვლად ამისა, ქართველების ეროვნულ-კულტურული აღორძინების უზრუნველყოფა რუსეთის მფარველობის ქვეშ... ვორონცოვმა პირველმა გაბედულად გამოაცოცხლა ეს დღემდე განუ-





ხორციელებელი იმედი. ქართველთა ეროვნული კულტურა რუსეთის მფარველობის ქვეშ - ეს ოცნება რეალობად იქცა...
ამასთანავე, ა. ჯორჯაძე დასძენს, რომ ვორონცოვი ვერ შექმნიდა ჩვენში ვერც თეატრს, ვერც პერიოდულ პრესას, თვით საზოგადოებაში რომ არ ყოფილიყო ამისათვის საჭირო ელემენტები.

ნაციონალურ-კულტურული აღორძინებისათვის „საჭირო ელემენტები“ 1840-იანი წლების დასაწყისში საქართველოში მართლაც არსებობდა და აქ, პირველ რიგში, უნდა აღინიშნოს ვოლოგდის გადასახლებიდან ახალდაბრუნებული დიმიტრი ყიფიანის „ეროვნული ხსნის პროგრამა“, რომელიც დაფუძნებული იყო თავადაზნაურულ-ლიბერალური განმანათლებლობის იდეოლოგიაზე და ითვალისწინებდა განათლების გავრცელების გზით რუსეთის იმპერიის ფარგლებშივე ქართული კულტურისა და საერთო-ეროვნული თვითმემკვიდრის აღორძინებას. საამისოდ გადადგმული იყო კიდევაც პირველი ნაბიჯები. კერძოდ, 1842 წელს დ. ყიფიანმა დააარსა „ტფილისის კერძო ბიბლიოთეკა“ — საზოგადოებრივ ინიციატივაზე დაფუძნებული პირველი საზოგადოებრივ-კულტურული და საგანმანათლებლო დაწესებულება, რომლის წევრები იყვნენ: ალ. ჭავჭავაძე, ნ. ბარათაშვილი, გრ. და ვ. ორბელიანები, მ. თუმანიშვილი, ზ. ფალავანდიშვილი და სხვ. უნდა აღინიშნოს მანანა ორბელიანის ლიტერატურული სალონიც, სადაც წარმოიშვა და დამუშავდა არაერთი ეროვნული მნიშვნელობის იდეა (პროფესიული ქართული თეატრის ჩამოყალიბება, ჟურნალ „ცისკრის“ დაარსება და სხვ.). **ქართველ მოღვაწეთა მოწინავე ნაწილისა და ვორონცოვის გეგმები დაემთხვა ერთმანეთს და ამგვარმა უნისონმა კულტურის სფეროში ხელისუფლებისა და საზოგადოების სათანამშრომლოდ შექმნა მყარი საფუძველი მისგან გამომდინარე უაღრესად**

პოზიტიური შედეგებით. უნდა ითქვას, რომ თავისი ადმინისტრაციული და კულტურულ-საგანმანათლებლო რეფორმების განხორციელებისას ვორონცოვმა მთავარ თანამშრომლად და დასაყრდენად აირჩია დ. ყიფიანი, რომელსაც, ბარონ ალ. ნიკოლაის მიერ იმპერიის უმაღლესი ხელისუფლებისადმი გაგზავნილი კონფიდენციალური მოხსენების მიხედვით, მიიჩნევდნენ „ავტონომიურ საქართველოზე მეოცნებედ“ და ს. კაკაბაძეც მას უწოდებს „ავტონომიის იდეის... თვალსაჩინო მოტრფიალეს“. დ. ყიფიანმა, თავის მხრივ, კავკასიაში განხორციელებული ძირეული ცვლილებები მაქსიმალურად შეუფარდა ქართველთა ეროვნულ-კულტურულ ინტერესებსა და საჭიროებებს.

ვორონცოვის „კავკასიური პოლიტიკის“ შეფასება ქართულ წყაროებსა და ლიტერატურაში დიამეტრულად განსხვავებულია — უაღრესად პოზიტიურიდან (გრ. ორბელიანი, დ. ყიფიანი, პ. იოსელიანი, ა. ფურცელაძე, ი. მეუნარგია, ა. ჯორჯაძე, მიხ. თამარაშვილი, შ. ამირეჯიბი, ს. ყუბანეიშვილი და სხვ.) უკიდურესად ნეგატიურამდე (ნ. ავალიშვილი, ვახტ. კოტეტიშვილი, ლ. ასათიანი, ს. გერსამია, ალ. კალანდაძე, რ. ჩხეიძე, ნ. ვახანია და სხვ.).

...ვორონცოვის მიმართ წინააღმდეგობრივი დამოკიდებულება ჰქონდათ ნ. ნიკოლაძესა და, განსაკუთრებით, ალ. ორბელიანს, რომლის თხზულებებშიც ჩამოყალიბებულია ორი ურთიერთგამომრიცხავი თვალსაზრისი: „ის დრო ვარანცოვისა საქართველოში, ჩუენგნით გამოუცდელი სულ იყო... მითამ კაიკაცობას გვაჩვენებდა, ნამეტნავად უფრო კიდევ იმათ მომატებით, ვინც რუსეთის ინტერესზე იქცეოდა... ვარანცოვამდისინ ქართულები შორს ვიდექით რუსებზე და იმან რუსებში გაგვრია, მეგვაერთა ამ ცფიერმა დიპლომატმა“; მეორე მხრივ, ალ. ორბელიანის თქმით, „ვორონცოვმა მოგვცა ქართული თიატრი

და ქართული სალიტერატურო ჟურნალი — „აჰა, მარადის გქონდეთ და თქვენის მამა-პაპის კარგის ენით ისიამოვნეთ“... კნიაზ ვარანცოვი იყო დიდი გონების კაცი, სრული განვითარებული და სურდა ჭეშმარიტად ჩვენი კეთილი“.

ვორონცოვმა ნიკოლოზ პირველს 1849-1851 წლების ანგარიში წარუდგინა, რომელშიც ვკითხულობთ: „დაარსდა თეატრი, ლიტერატურა გამოცოცხლდა, წიგნები იბეჭდება, ეს ყველაფერი მაფიქრებინებს — თქვენი იმპერატორობითი უდიდებულესობა კეთილინებებს და ჩათვლის, რომ ამგვარი შედეგი უაღრესად კეთილისმყოფელ გავლენას იქონიებს განათლების გავრცელებაზე, გემოვნების განვითარებაზე, ზნეჩვეულებათა დახვეწასა და რუსებში ადგილობრივთა შერწყმაზე“.

ვორონცოვი იმპერატორს, ცხადია, ვერ მისწერდა, რუსებისგან ქართველების ჩამოშორება მსურსო და, რაც მთავარია, მას არც ჰქონია ამგვარი განზრახვა. პირიქით, ვორონცოვის „**კავკასიური პოლიტიკის**“ მიზანდასახულობა, როგორც ზემოთ ითქვა, სწორედ ეს იყო რუსეთის სახელმწიფოებრივ-პოლიტიკურ და ეკონომიკურ სივრცეში საქართველოს ინტეგრაცია, ოღონდ აუსცილებლად ქართველთა ენობრივი და კულტურული თვითმყოფადობის შენარჩუნებითა და აღორძინებით. ხაზგასმით უნდა ითქვას, რომ ქართველი მოღვაწეებისათვის, დროისა და ვითარების სპეციფიკიდან გამომდინარე, სავსებით მისაღები აღმოჩნდა ასეთი პერსპექტივა, მით უმეტეს, ეს ყველაფერი ხდებოდა ჩვენი საზოგადოებრივი ცხოვრებისა და ეროვნული კულტურის ევროპეიზაციის გზით. დ. ყიფიანისადმი, იმდროინდელი საზოგადოებრივ-კულტურული ცხოვრების მეთაურისა და თვალსაჩინო ევროპეისტიცადმი, მიძღვნილ ერთ-ერთ ნაშრომში ა. ჯორჯაძე აღნიშნავს: „დიალ, ჩვენ რუსეთის ქვეშევრ-



დომნი ვართ და ამავე დროს ქართველნი, — ჰფიქრობდა ყიფიანი. ქართველობით გვინდა, გამოვიდეთ კულტურულ ასპარეზზე. მაგრამ იცოდეთ კარგად, რომ „ქართველობა“ მოითხოვს ქართულ საზოგადოებრივ დანებს. ქართული ენის უზრუნველყოფას სკოლებსა და ეკლესიასში. თუ ამას არ გვანებებთ, ჩვენი ქართველობა შეილახება და, თუ შეილახება ქართველობა, შეილახება ჩვენი ერთგულების გრძნობაცაო. იმ ხანებში უფრო ფართოდ საკითხის დაყენება შეუძლებელი იყო...“

ვორონცოვის „კავკასიური პოლიტიკისადმი“ დამოკიდებულება არც რუსეთში იყო ერთგვაროვანი. ვორონცოვის მმართველობის წლებშივე მის კურსს აკრიტიკებდნენ როგორც კავკასიის ადმინისტრაციულ, ისე რუსეთის ცენტრალურ მმართველობით სფეროებში.

...ვორონცოვი თვალსაჩინო ფიგურაა აკაკი წერეთლის შემოქმედებაში (ლექსები, პუბლიცისტიკა, მემუარები, პოემა „ვორონცოვი“). **აკაკის თხზულებაში ვორონცოვის სახე წარმოჩენილია, როგორც პიროვნებისა და მმართველისა, რომელიც იყო საქართველოში ქმობისა და სიყვარულის დამნაშავე** („ბებიას ნაამბობი“), უსამართლობით გატანჯული ერის გულისტკივილის გამზიარებელი („ქართველი ძეგლის წინ“), ქართველი ხალხის „მამაშვილურად მოყვარული“, რომლის ხელშიც საქართველომ „სული იბრუნა“ („ვარანცოვის ძეგლი“), „ცით მოვლენილი... ზეკაცია“, რომელმაც საქართველოში გაავრცელა სწავლა-განათლება და „ჩაჰწერგანრფელი სიყვარული“ („ვორონცოვი“), მმართველი, „რომელსაც აღტაცებით უყვარდა ქართველები, დიდ პატივს სცემდა მათ წარსულს და მომავალზე იმედობდა“ („ჩემი თავგადასავალი“), ქართული მწერლობის ქომაგი და მასზე უანგაროდ მზრუნველი („მცირე შენიშვნა“) და ა. შ.; აკაკი ეკამათება იმათ, ვინც საქართველოზე ვო-

რონცოვის ზრუნვას ფარისევლობად მიიჩნევდა და აღნიშნავს: „ბრალი არა აქვს, სხვის ხელში / მისი ნამყენი თუ გახმა...“ („ვარანცოვის ძეგლი“).

აკაკიმ სიცოცხლის ბოლომდე შეინარჩუნა გულწრფელი პატივისცემა ვორონცოვის მიმართ და მანვე მოგვცა, ჩვენი აზრით, ვორონცოვის „კავკასიური პოლიტიკის“ ყველაზე ლაკონიური და ზუსტი შეფასება — ვორონცოვი მომავლის საქართველოს განიხილავდა, როგორც „პოლიტიკურად გარუსებულს, მაგრამ თავის სარწმუნოებით, ერთ და ეროვნული ელფერით“ და ამას იგი აკეთებდა „საევროპო სწორის გზით“ („ქართული თეატრის დაარსება საქართველოში“. ანალოგიურ თვალსაზრისს იმეორებს ა. წერეთელი 1912 წელს დაწერილ კიდევ ერთ თხზულებაში „ნარკვევი“ („რაჭა-ლეჩხუმში ჩემი სტუმრობა...“).

ვორონცოვის „კავკასიურ პოლიტიკასა“ და მისგან გამოწვეულ კულტურულ-ლიტერატურულ პროცესებს, ვფიქრობთ, პირდაპირი კავშირი აქვს 1860-იანი წლების საზოგადოებრივ და სალიტერატურო ვითარებასთან და, ამ მხრივ, მართებული გვგონია ქ. ნინიძის შეხედულება: „ეს („თერგდალეულთა“ — თ. ჯ.) ფენა ყალიბდება ვორონცოვის საგანმანათლებლო პოლიტიკის შედეგად“. საქმე ისაა, რომ თითქმის ყველა ენობრივი თუ ლიტერატურული პრობლემა, რომელიც ილია ჭავჭავაძემ წამოაყენა და ამა თუ იმ ფორმით დაამუშავა 1860-იან წლებში, მეტ-ნაკლები სიღრმითა და ინტენსივობით უკვე დასმული იყო წინა ათწლეულში (ქართული სალიტერატურო ენის დემოკრატიზაციის აუცილებლობა, ცხოვრების რეალისტურად ასახვისა და ლიტერატურის საზოგადოებრივი დანიშნულების, ქართული ლიტერატურული აზროვნების ევროპეიზაციის, მთარგმნელობითი პოლიტიკის და სხვ. საკითხები).

ერთი სიტყვით, **1860-იანი წლებისათვის მომზადებული იყო წინადაგი ახალი, დროის მოთხოვნათა შესაფერისი, მკაფიოდ ჩამო-**

ყალიბებულ მსოფლმხედველობრივ და ლიტერატურულ პრინციპებზე დაფუძნებული ეროვნული იდეოლოგიის შესაქმნელად და ცხოვრებაში დასამკვიდრებლად.

დიდად საგულისხმოა, რომ ი. ჭავჭავაძე, როგორც მოაზროვნე და მესვეური საზოგადოებრივ-კულტურული ცხოვრებისა, სწორედ 60-იანი წლების დასაწყისში მოველინა ქვეყანას, როცა წარსულს ბარდებოდა ვორონცოვის მიერ გატარებული ლოიალური, სამოქალაქო და კულტურული ცხოვრების აღმავლობაზე ორიენტირებული პოლიტიკური კურსი და იწყებოდა ახალი ფორმებით საქართველოს რუსიფიკაციის იმპერიული პოლიტიკის განხორციელება. ამგვარ პირობებში კი მეტისმეტად ძნელი იქნებოდა (თუ შეუძლებელი არა) ნოვატორული კულტურულ-იდეოლოგიური სისტემების შექმნა ვორონცოვის-დროინდელი მონარქისტულ-კონსერვატორული მსოფლმხედველობით, პოლიტიკური რეჟიმი-სადმი გამოცხადებული უპირობო ლოიალიზმითა და არსებული კულტურულ-ინტელექტუალური რესურსებით. ამდენად, ეროვნულმა სასიცოცხლო ენერგიამ, რომელიც იმ დროისათვის სიცოცხლისა და მოქმედებისუნარიანი აღმოჩნდა, ილია ჭავჭავაძე მაინცდამაინც მაშინ წარმოშვა, როცა ამისი სასიცოცხლო აუცილებლობა შეიქმნა და ის, რასაც ილია თავის პროგრამულ თხზულებაში „საქართველოს მოამბეზედ“ ზოგადად ამბობდა: „გენიოსი ნაყოფია თავის დროებისაო“ (ილია აქ „გენიოსში“ „წინამძღოლს“ გულისხმობს), თვითონ ამ სიტყვების ავტორზეც უნდა გავრცელდეს — **ილია ჭავჭავაძე ნაყოფია იმ „დროებისა“, რომლის ფსევპიციც, ბარდა ნაციონალური საზოგადოებრივ-პოლიტიკური და კულტურულ-ლიტერატურული ტრადიციებისა, ვორონცოვის „კავკასიურ პოლიტიკაშიც“ უნდა ვეძებოთ.**

თამაზ ჯოლოგუა



შალვა ქიქოძე — ფერწერი, ბრაზილოსი, კარიკატურისტი

შალვა გერასიმე ძე ქიქოძე დაიბადა 1895 წლის 27 მაისს ოზურგეთის მაზრის სოფელ ბახვეში. მხატვრის მამა, გერასიმე ქიქოძე, კოლეგიის რეგისტრატორი იყო. ერთხანს მასწავლებლად მუშაობდა სოფელ ნიგოთში. მხატვრის დედა მატრონე კალანდარიშვილი სუსტი ჯანმრთელობის გამო 1918 წელს გარდაიცვალა. შალვა ქიქოძეს უმთავრესად ბებია ზრდიდა (მამის მხრიდან). შალვას ჰყავდა და-ძმა — სანდრო და ანეტა. ქიქოძეების ოჯახი ზაფხულობით იკრიბებოდა სოფელში ბებიასთან, სადაც ოჯახებით სტუმრად ჩადიოდნენ მამის ძმები — დიმიტრი (მწერალ გერონტი ქიქოძის მამა), მიხეილი და თებრონე.

სოფელ ბახვის ბუნების წიაღში გატარებულმა ბავშვობამ განსაზღვრა მომავალი მხატვრის სიყვარული მშობლიური მხარისადმი. იგი ბავშვობიდანვე გამოირჩეოდა დაკვირვების უნარით, ხატვის სიყვარულით. გერონტი ქიქოძე თავის წერილებში წერს: „შალვა ქიქოძემ ხატვა თითქმის ლაპარაკთან ერთად დაიწყო. ის ფანქრით ხატავდა ყველაფერს, რასაც შეეძლო შთაბეჭდილება მოეხდინა ამ პატრიარქალურ და იდილიურ გარემოში აღზრდილ ბავშვზე... იგი ორი-სამი წლის იყო, როდესაც მარჯვენა ხელზე დამბლა დაეცა და იძულებული გახდა მარცხენა ხელით ეხატა“. გერონტი ქიქოძის და ნატალია კი, თვლიდა, შალვა ქიქოძეს ეს არ დაემართებოდა, რომ იგი — ჩვილი ბავშვი, დედის ავადმყოფობის გამო, მისთვის მომვლელად მიჩენილ ახალგაზრდა გადიას ხელიდან არ გავარდნოდა. ამ საბედსინერო შემთხვევის გამო, შალვა ქიქოძეს სამუდამოდ დაუზიანდა ხელი, თუმცა ამ ფიზიკურ ნაკლს მხატვრის თანამედროვეთა მოგონებით, მის შესანიშნავ გარეგნობაზე დიდად არ უმოქმედია. მხატვარი „მკვირცხლი ბუნების, გამხდარი, მაღალი, ლამაზი, უაღრესად განათლებული, იუმორის გრძნობით დაჯილდოებული ახალგაზრდა იყო“, — იგონებდა ლადო გუდიაშვილი.

1902 წელს შალვა ქიქოძე შევიდა თბილისის ქართულ სათავა-

დაზნაურო გიმნაზიაში. შალვა ქიქოძის დეიდაშვილი, ფსიქოლოგი დარეჯან რამიშვილი იგონებს: სათავადაზნაურო გიმნაზიაში სწავლის დროს, ქალ. დარეჯანის მამამ, რომელიც გიმნაზიის ზედამხედველი იყო, გიმნაზიის შენობაში გამოუყო შალვას ოთახი სახელოსნოდ, სადაც ხატავდა ხოლმე. სწავლის წლები — 1902-1914 იყო რევოლუციური სულისკვეთების აღმავლობის წლები. ახალგაზრდა მხატვარი არ რჩება გულგრილი ამ მოძრაობის მიმართ. იგი აკეთებს სასწავლებელში მოღვაწე რეაქციონერი პედაგოგების კარიკატურებს.

გიმნაზიაში სწავლის პერიოდში შალვა ქიქოძემ რუსულიდან თარგმნა და თვითონვე დაასურათა სერ არტურ კონან დოილის „შერლოკ ჰოლმსის თავგადასავალი“. 1912 წელს იგი ქმნის ილუსტრაციებს ამირანის თქმულებისათვის.

ქართული გიმნაზიის სრული კურსის დამთავრების შემდეგ, 1914 წელს შალვა ქიქოძეს „ქართველთა შორის წერა-კითხვის გამავრცელებელთა საზოგადოება“ სტიპენდიას უნიშნავს და იგი მოსკოვის უნივერსიტეტში იურიდიულ ფაკულტეტზე ირიცხება. პარალელურად იგი გამოცდებს აბარებს მოსკოვის ფერწერის, ქანდაკებისა და ხუროთმოძღვრების ინსტიტუტში, თუმცა ორი წლის მანძილზე ვერ ახერხებს აქ მოხვედრას.

1916 წელს შალვა ქიქოძე ჩაი-



რიცხა მოსკოვის სამხატრო სასწავლებელში ფერწერის ჯგუფში. სადაც მან ისწავლა 2 წელი. პირველ წელს მან ისწავლა ნატურიდან ხატვა, მეორე წელი შემოქმედებით მუშაობას მოანდომა.

შალვა ქიქოძის მეგობარი ლადო გუდიაშვილი წერდა: „ნამდვილი, ხალასი ნიჭის ახალგაზრდა იყო, მკვირცხალი ბუნების, გამხდარი, მაღალი, ლამაზი, ენამახვილი, განათლებული... ჰქონდა კიდევ ერთი საინტერესო თვისება — ცხოვრების იუმორის პრიზმაში დანახვის უნარი“. სწორედ იუმორის შეგრძნების განსაკუთრებულმა უნარმა განაპირობა, ალბათ, მხატვრის აქტიური თანამშრომლობა მოსკოვის ერთ-ერთ ყველაზე პოპულარულ თეატრალურ ჟურნალში „რამპა ი ჟიზნი“.

მხატვრის პირველი მეგობრული შარჟი, ხელმოწერილი ფსევდონიმით შალიკო, გამოჩნდა 1915 წელს მას შემდეგ ცნობილი რუსი მხატვრების: მელნიკოვის, ჩელის, მილიუტინის და სხვათა მეგობრული შარჟების გვერდით სისტე-



„მსახიობთა ყაზის სახლი პარიზში“



„პარიზი, ეიფელის კოშკი“

მატურად ქვეყნდებოდა ახალგაზრდა ქართველის მახვილი კარიკატურები, ჩანახატები და მეგობრული შარჟები.

ა. ბახრუშინის სახელობის სახელმწიფო სათეატრო მუზეუმში დაცულია მოსკოვის თეატრ-კაბარე „ლამურას“ ფარდა, რომელიც შ. ქოქიძის მოხატულია.

მასთან ერთად მოსკოვის უნივერსიტეტში სწავლობდა სერგო კლდიაშვილი, რომელიც გამოთქვავდა გაკვირვებას, თუ როგორ ახერხებდა შალვა პარალელურად სამხატრო სასწავლებელში სწავლას.

სერგო კლდიაშვილი წერდა: „შალვა ქიქოძე ღრმად ერუდირებული ახალგაზრდა გახლდათ, არაჩვეულებრივად ერკვეოდა ხელოვნების ისტორიაში, შესანიშნავად იცნობდა იმ დროინდელ ფრანგულ ხელოვნებას. განსაკუთრებით გატაცებით საუბრობდა იგი ვან-გოგზე და გოგენზე“...

მოსკოვში ყოფნისას შალვა ქიქოძეს სერგო კლდიაშვილთან ერთად უმოგზაურია ვიბორგის მხარეში. როგორც პატივცემული სერგო იგონებდა: „მართალია გა-

ზაფხულის პირი იყო, მაგრამ ძალიან ციოდა. ფული შემოგვაკლდა და ამიტომ ცოტა ხანს დავყავით, შალვა სულ სხვა თვალთაღიქვავდა ყველაფერს. მხატვრის თვალი თითქოს ხსნიდა საიდუმლოს, ამ ხალხის სახეებში აღბეჭდილს, მკაცრი ჩრდილოეთის ჰავა რომ განსაკუთრულ გამომეტყველებას ანიჭებდა“.

1916 წელს არდადეგებზე საქართველოში ჩამოსული ქიქოძე თავისი უფროსი მეგობრის — დიმიტრი შევარდნაძის მიერ ჩამოყალიბებული პირველი პროფესიული საზოგადოებრივ-კულტურული ორგანიზაციის — „ქართველ ხელოვანთა საზოგადოების“ საქმიანობაში ერთვება.

სამშობლო მხარის, მისი ბუნებისა და ხალხის ეროვნული კულტურული მემკვიდრეობის უკეთ შეცნობის მიზნით, შალვა ქიქოძე ხშირად მოგზაურობდა საქართველოს სხვადასხვა კუთხეში. იგი მონაწილეობას იღებს „საქართველოს საისტორიო და საეთნოგრაფიო საზოგადოებისა“ და „ქართველ ხელოვანთა საზოგადოების“ მიერ ერთობლივად მოწყობილ

პირველ სამხატვრო-სამეცნიერო ექსპედიციაში XV საუკუნის ძეგლის — ნაბახტევის ეკლესიის მხატვრობის პირების გადმოსაღებად. ამას გარდა, მხატვარმა ცხენით შემოირა აღმოსავლეთ საქართველოს მთიანეთი, კახეთი, აჭარა. მხატვრის დღიურებმა ამ მოგზაურობებით გამოწვეული ემოციური შთაბეჭდილებები შემოგვინახა.

1918 წელს ქიქოძე სამშობლოში ბრუნდება და საზოგადოებრივ ცხოვრებაში აქტიურად ერთვება. ამავე წლის ბოლოს მას „ქართველ ხელოვანთა საზოგადოების“ მდივნად ირჩევენ. საქართველოში დაბრუნებული ჟურნალებთან მჭიდრო თანამშრომლობას აგრძელებს. მისი კარიკატურები იბეჭდება სატირულ-იუმორისტულ ჟურნალებში „ლახტი“ (ამ უკანასკნელთან ქიქოძე ჯერ კიდევ 1914 თანამშრომლობდა), „ემმაკის მათრახი“. ასევე თეატრალურ ჟურნალებთან „თეატრი და ცხოვრება“, „თეატრი და მუსიკა“, ი. ლვოვისა და დ. ტამუროვის რედაქტორობით გამოცემულ რუსულენოვან „ხელოვნებაში“-ში. ქიქოძე ამ გა-



„სამი მსახიობი“



„ახალგაზრდა მემოზის მოგონება“

მოცემათაგან ზოგიერთის სარედაქციო კოლეგიის შემადგენლობაშიც კი შედის.

1918 წელს მხატვარი რეჟისორ გიორგი ჯაბადარის მიწვევით მის მიერ ჩამოყალიბებული სტუდიის სპექტაკლებს აფორმებს. ცნობილია, რომ ქმნის დეკორაციებს ჯა-

კოსის პიესისათვის „ვითა ფოთლები“ და ბრიეს მუსიკალურ დრამისათვის „სარწმუნოება“. სამწუხაროდ, დეკორაციები არ შემორჩენილა.

მხატვარი დაახლოვებული იყო თეატრთან. არქივში შემონახულია მსახიობების — ვერიკო ან-

ჯაფარიძის, ბაბო გამრეკელისა და სხვათა მოგონებები შალვა ქიქოძის თეატრთან თანამშრომლობის შესახებ. თურმე იგი ვერ ეგუებოდა ზოგიერთი რეჟისორის კონსერვატიულ მეთოდს, რის გამოც მხატვარი თავს შეზღუდულად გრძნობდა შემოქმედებითი



„გურია“



„აჭარა“



„პარიზი, ნაპეზი სენაზე“

საქმიანობის დროს.

ვერიკო ანჯაფარიძე ასე აღწერს თავის თანამშრომლობას შალვა ქიქოძესთან ბრიეს სპექტაკლ „სარწმუნოების“ მომზადების პერიოდში: „სარწმუნოება“ ეგვიპტური მითოლოგიიდან იყო. მე, მთავარი მოქმედი პირის, იაუმას შემსრულებელს, უნდა მცმოდა ისტორიულად დაცული ეგვიპტური მძიმე სამოსი, ერთი-მეორეზე

ჩაცმული რამდენიმე კაბა — ამას მოითხოვდა გიორგი ჯაბადარი.

შალვა ქიქოძე, როგორც ჩანს, არ ეთანხმებოდა რეჟისორს მე კი, თითქოს, რაღაცა ხელს მიშლიდა, ვერ ვიგრძენი იაუმას სახე, გვიან მივხვდი, თურმე ჩაცმულობა მბოჭავდა. გავიხადე ჯერ ერთი, მეორე კაბა და ბოლოს დავრჩი თხელ სამოსში. მხოლოდ მაშინ ვიგრძენი შვევა, შევეუთანხმე შა-



„გურული ქალი“



„აჭარელი ქალი“

ლვას, მასაც მოეწონა ჩაცმულობა, გვერდით კიდევ ჩაჭრა ისედაც გამჭვირვალე კაბა. გადავწყვიტეთ, თითქოს ნახევრად შიშველი წარმდგარიყავი მაყურებლის წინაშე, რითაც ერთგვარ „სიურპრიზს“ მოვუმზადებდი გ. ჯაბადარს. ასეც მოვიქეციით“.

მსახიობი ბაბო გამრეკელი ვერიკო ანჯაფარიძისადმი მიძღვნილ საიუბილეო კრებულში (1957 წ.) იგონებს ბრიეს „სარწმუნოებაზე“ მუშაობის პერიოდს: „ახალგაზრდები ღამითაც ვიკრიბებოდით ვერიკოსთან ტანისამოსის ან ეგვიპტური მოძრაობის დასამუშავებლად. ამაში დიდ დახმარებას გვინევდნენ ჩვენთან მომუშავე ახალგაზრდა ენთუზიასტები, ნიჭიერი მხატვრები შალვა ქიქოძე და გიორგი ერისთავი. მოძებნილი გმირისათვის ისინი გვთავაზობდნენ სხვადასხვა ქსოვილს სხვადასხვა ფერის კოსტუმებისათვის, გვირჩევდნენ ამა თუ იმ ეგვიპტურ პოზას, მოძრაობას...“

1919 წელს მხატვარი მონაწილეობას იღებს თბილისში „დიდების ტაძარში“ გამართულ მასშტაბურ გამოფენაში.

1920 წლის 13 იანვარს „ქართველ ხელოვანთა საზოგადოების“ მიერ დანიშნული სტიპენდიით შალვა ქიქოძე სხვა ნიჭიერ მხატვრებთან ერთად სასწავლებლად პარიზში მიემგზავრება.


1921 წელს მონაწილეობა მიიღო დამოუკიდებელი მხატვრების საზოგადოების ყოველწლიურ გამოფენაში. მისი გამოფენები მოეწონა სხვადასხვა გალერეაში: კერძოდ „ლა ლიკორნსა“ და „დამოუკიდებელთა სალონში“.

1921 წლის აგვისტოს დასაწყისში ქლექით დაავადებული შალვა ქიქოძე პარიზიდან გერმანიაში, კერძოდ, ფრაიბურგში მიემგზავრება, სადაც აღესრულა კიდევ. 1921 წლის 7 ნოემბერს ფრაიბურგის ქართველობამ საქართველოდან შორს, გერმანიის მიწა-წყალს მიაბარა შალვა ქიქოძე.

შალვა ქიქოძის ნამუშევრები სამშობლოში მხატვრის მამამ და დავით კაკაბაძემ დააბრუნეს.



შალვა თიოცაძე — კონსტანტინე გამსახურდიას შარში



ISSN 1987-5908



9 1771987 590006